

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

1.1 Siunnersuummut tunngaviusut

Kalaallit Nunaanni tarnimikkut napparsimasunik napparsimavimmut pinngitsaaliissummik unitsitsisarneq 1980-imiilli pisarsimavoq. Tarnimikkut napparsimasut nakorsarneqarnissaannut tunngatillugu pinngitsaaliissummik iliuuseqarsinnaanermut tunngasoq 2008-mi Kalaallit Nunaannut, inatsit nr. 1406 decembarip 27-ani 2008-meersoq tunngavigalugu, nuunneqarpoq. Inatsimmi tassani aalajangersarneqarpoq, inatsit taamanikkut attuuttoq tarnimikkut napparsimasut napparsimavimmi uninngatitaasarnerat pillugu inatsit apriliip 13-ianni 1938-meersoq Kalaallit Nunaanni atuutiinnassasoq, Namminersorlutik Oqartussanit maleruaqusanit atuutilersinneqartunit allanngortinneqarnissaata imaluunniit atorunnaarsitsisoqarnissaata tungaanut.

Maannakkut atuuttoq Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisaat nr. 24, 3. december 2012-meersoq juulimi 2013-imi atuutilerpoq. Inatsit tassaavoq tarnimikkut napparsimasut pillugit Kalaallit Nunaanni inatsit siullerpaaq, tassani Kalaallit Nunaanni tarnimikkut napparsimasut nammineersinnaajunnaarsinneqarnerannut tunngatillugu allatigullu pinngitsaaliissummik nakorsarneqartarnerannut il.il. atatillugu inatsisitigut inissisimanerat sukumiisumik maleruaqsaliorneqarpoq.

Tarnimikkut nappaatilinnik kiffaanngissusiaaneq allatigullu pinngitsaaliissummik iliuuseqarneq pillugu Inatsisartut Inatsisaata allanngortinnera pillugu Inatsisartut inatsisaat nr. 12, 3. juni 2015-meersoq aqutugalugu ilaatigut ilanngunneqarput Tarnimikkut Nappaatillit Maalaa-rutaannik Aalajangiisartut aalajangiivigisaat pillugit naammagittaalliutit Kalaallit Nunaanni Eqqartuussivimmut ingerlateqqinneqartassasut, tamanna tikillugu eqqartuussisoqarfinnut ingerlatitseqqiisarnermut taarsiullugu. Taamatuttaaq Tarnimikkut Nappaatillit Maalaa-rutaannik Aalajangiisartut aalajangiivigisaannut tunngatillugu naammagittaalliutit ingerlateqqinneqarnissaannut kingusinnerpaamik piffissaliussanik ilanngussisoqarpoq.

Inatsisartut Ombudsmandianit misissuiartortitat 2017-imi aprilimi Nuummi Dronning Ingridip Napparsimavissuani Tarnikkut Nappaatilinnut Immikkoortortaarfiani A1-imi siumut nalunaaruteqaaqaarluni misissuineq ingerlappaat. Misissuiartornerup kingunerisaanik nalunaarusiortoqarpoq, tassani ilaatigut Tarnikkut Napparsimasunut Immikkoortortaarfimmi naammaginangitsut arlaqartut, aammattaaq inatsisitigut tarnimikkut napparsimasut pillugit inatsisip aamma tamanna tunngavigalugu nalunaarutit atuutilersinneqarsimasut akornanni assortuuttut uparuarneqarput. Taamatuttaaq Folketingets § 71-tilsynia immikkoortortaarfimmi tassani 2017-imi novembarimi misissuiartorluni takusaavoq. Tamanna tunngavigalugu misissui-

artortitat ilaatigut apeqquteqarfigaat Peqqissutsimut Iisimatusarnermullu Naalakkersuisoqarfiup Inatsisartut Ombudsmandiata misissuinermit nalunaarusiaani isornartorsiorneqartut qanoq iliornikkut iluarsiiiffiginiarnerai.

Inatsisitigut assortuuttut uparuarneqartut iluarsiiiffigineqarnissaat siunertaralugu, aammattaaq Kalaallit Nunaanni tarnimikkut napparsimasut nammineersinnaajunnaarsinneqarnertunut aamma pinngitsaaliissummik nakorsarneqarnertunut atatillugu il.il. inatsisitigut inissisimaneerat pitsangorsarniarlugit, siunnersuut manna saqqummiunneqarpoq.

1.2 Siunnersuutip imarisai ataatsimut isigalugit

Siunnersuummi tarnimikkut napparsimasut pillugit inatsimmi atuuttumi tunngaviusut ingerlateqqinneqarput, kisianni aammattaaq allannguutinik arlaqartunik ilaqarlutik.

Siunnersuummi periarfissaliissut pisariaqartoq pilersinneqarpoq, tassa nakorsat allat Dronning Ingridip Napparsimavissuani tarnikkut nappaatilinnut immikkoortortaqarfianni nakorsaaneq peqanngitsillugu pisuni arlalinni tarnimikkut napparsimasut pillugit inatsit naapertorlugu aalajangiisinnaapput, taakkua tamatuma kingornatigut nakorsaanermit akuersissutigineqartussanngortillugit.

Tamatuma saniatigut siunnersuummi ilaavoq pinngitsaaliissummik nakorsaatitortitsinermit nakorsaatip toqqarneqartup sunniutaata saniatigut allamik sunniuteqarneranut qanoq naleqqiusinissamat erseqqissaat.

Taamatutaaq oqaaseqatigiinnik aqqissuussisoqarpoq aamma naleqqussaasoqarluni tamatumani siunertarinqarluni inatsisip imarisaanik erseqqissaaneq aamma paasiuminarsaaneq.

2. Siunnersuutip immikkoortui pingaarnerit

2.1 Siunnersuutip tullerriaarnera pingaarneq

Siunnersuummi tarnimikkut nappaatillit pillugit inatsit atuuttoq annertuumik ingerlateqqinneqarpoq, tassa Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut Inatsisissaat nr. 24, 3. december 2012-imeersumi aalajangersarneqartoq. Inatsimmi danskit tarnimikkut napparsimasut pillugit inatsisaat 2015-imeersoq (Inatsisitigut nalunaarusiaqnr. 1160 af 29. September 2015) isumassarsiorfigineqarpoq, taamaattorli immikkoortuni arlaqartuni allaaneruvoq, taamaaliornikkut inatsit maani nunami pissutsinut naleqqussarneqarluni.

Siunnersuummi ilaapput:

Kapitali 1, inatsisip atuuffianik malittarisassiuussivoq, tak. §§ 1-2.

Kapitali 2, tassani ilaapput aalajangersakkat pinngitsaaliissummik atuinermi aalajangersakkat nalinginnaasut, tak. §§ 3-6.

Kapitali 3, tassani nammineersinnaajunnaarsitsinermut (napparsimavimmut pinngitsaaliissummik unitsitsinermut, napparsimavimmi pinngitsaaliissummik uninngatitsinermut aamma oqqussinermut) piumasaqaatit malittarisassiuunneqarput, tak. §§ 7-13.

Kapitali 4, tassani pinngitsaaliissummik nakorsarneqarnissamut periarfissat malittarisassiuunneqarput, tak. §§ 14-15.

Kapitali 5, tassani napparsimavimmit angerlartinneqarnerup kingornatigut malinnaaffigineqarneq malittarisassiuunneqarpoq, tak. §§ 16-20.

Kapitali 6, tassani sukaterussineq il.il. (pinngitsaaliissummik sukaterussineq, nukiit atorlugit pissaanermik atuineq, sernissuiniarluni sukaterussineq, immikkut nakkutiginninneq aamma immikkoortorta qarfimmi matunik parnaarsuineq) malittarisassiuunneqarput, tak. §§ 21-31.

Kapitali 7, tassani allagarsianik/nassiussarsianik, napparsimasut inaannik aamma pigisaanik, timimik satsaalluni misissuineq aammattaq pigisanik arsaarinnissuteqarneq aamma suujunnaarsitsineq malittarisassiuunneqarput, tak. §§ 32.

Kapitali 8, tassani pinngitsaaliissuteqarnernik nalunaarsuineq aamma pinngitsuugassaangitsumik nalilersueqqinneq malittarisassiuunneqarput, tak. §§ 33-34.

Kapitali 9, tassani napparsimasunik siunnersuisut malittarisassiuunneqarput, tak. §§ 35-40.

Kapitali 10, tassani naammagittaalliuteqarsinnaanermut il.il. ilitersuineq malittarisassiuunneqarpoq, tak. §§ 41-45.

Kapitali 11, tassani naammagittaalliornissamut periarfissat aamma eqqartuussivikkut ingerlatisisinnaaneq malittarisassiuunneqarput, tak. §§ 46-49.

Kapitali 12, tassani ilaapput atuutilersitsinermut, atorunnaarsitsinermut aamma ikaarsaariarnermut il.il. aalajangersakkat, tak. § 50.

2.2 Inatsimmi pineqartoq

2.2.1 Inatsit atuuttoq

Inatsimmi aalajangersarneqarpoq nammineersinnaajunnaarsitsineq aamma pinngitsaaliissummik allamik atuineq Dronning Ingridip Napparsimavissuani tarnikkut nappaatilinnut immikkoortorta qarfianni taamaallaat pisinnaasoq aamma taamaallaat inatsisartut inatsisaanni matumani maleruaqqusat naapertorlugit, tak. § 1, imm. 1

Inatsimmi Dronning Ingridip Napparsimavissuani unitsinneqarnermut, uninnganermut aamma nakorsartinnermut atatillugu pinngitsaaliissummik atuinerit tamarmik malittarisassiuunneqarput.

Inatsimmi § 1, imm. 1 malillugu pinngitsaaliissummik unitsinneqarneq aamma pinngitsaaliissummik uninngatinneqarneq taamaallaat Dronning Ingridip Napparsimavissuani tarnikkut napparsimasunut immikkoortorta qarfimmi taamaallaat pisinnaapput. Taamaattorli pinngitsaaliissummik unitsitsineq peqqinnissaqarfiup suliffeqarfiini allani aallartinneqarsinnaavoq. Unitsitsinerit taamaattut Dronning Ingridip Napparsimavissuani tarnikkut nappaatilinnut im-

mikkoortorta qarfianni nakorsaaneermit aalajangerneqassapput nakorsaq aggersarneqarsimasoq isumaqatigalugu.

Oqariaatsini peqqinnissaqarfiup suliffeqarfiini allani eqqarsaatigineqarput nunap immikkoortuini napparsimaviit aamma najukkani napparsimaviit. Taamaattumik aalajangersakkat inunnut plejehjemiittunut imaluunniit isumaginninnermi suliffeqarfinniittunut atuutinngillat, naak taakku peqqissutsimikkut qanoq innerat siunnersuummi ilaatinneqartussatut isiginneqarsinnaagaluartoq.

Napparsimavimmut pinngitsaaliisummik unitsitsinerit aallartinneqartut pineranni Dronning Ingridip Napparsimavissuanut nuutsitsineq nalunaaquttap akunnerisa 48-t tikitsinnagit ingerlanneqassaaq, nalinginnaasumik angallannerup tamanna pinngitsoortinngippagu. Napparsimasumik angallassineq nalinginnaasumik aallartoq siulleq aqputigalugu ingerlanneqassaaq. Taamaalluni angallassineq angallassigasuarnerit ingerlanneqassanngilaq, naak kingusinnerpaa-mik piffissarititaasoq nalunaaquttap akunneri 48-t qaangerneqaraluartut, imaangippat napparsimasup qanoq innerata imaluunniit ulorianassusiata tamanna pisariaqartillugu. Naatsorsuutigineqarpat napparsimasup qanoq issusia tassanngaannartumik pilluni qaangiukkiartussasoq sivikitsuinnaassasorlu taava nuutsitsineq pissanngilaq. Dronning Ingridip Napparsimavissuani tarnikkut nappaatilinnut immikkoortorta qarfianni nakorsaaneq taannaavoq, nuutsitsinerup ingerlanneqarnissaanut imaluunniit ingerlanneqannginnissaanut aalajangiisuusassaaq.

Siunnersuummi pinngitsaaliisummik atuineq imatut nassuiaaserneqarpoq, ilisimatitsereraluarluni taamaattorli akuersisoqarsimanngitsoq iliuuserineqartut ingerlanneqarneratut. Taamaalluni pinngitsaaliisummik iliuuseqarneq oqariaatsimut ilisimatinneqareerluni akuersinermut attuumassuteqarpoq. Oqariaaseq aammattaq napparsimasut inatsisitigut inissisimanerat pillugu Inatsisartut peqqussutaanni tunngavigineqartoq, tak. peqqussummi kapitali 2. Oqariaatsip ilisimatinneqareernikkut akuersinerup qanoq paasineqarnissaa pillugu § 2-mi immikkut oqaaseqaatit ilanngullugit innersuunneqarput.

2.2.2 *Siunnersuut matumani pineqartoq, tak. kapitali 1 §§ 1-2*

Siunnersuummi inatsisitigut atugassarititaasut atuuttut oqaasertai annikitsumik erseqqissarlugit ingerlateqqinneqarput.

§ 1, imm. 3-mi ilanngunneqarpoq timmikkut anniaatigisap pinngitsaaliisummik nakorsarneqarnissaa pisariaqarpat tamanna timikkut anniaatilinnut immikkoortorta qarfimmi ingerlanneqarsinnaasoq, tak. § 15. Ilanngunneqartumi qulakkeerniarneqarpoq tamatumunnga tunngavisaqartoqarnerata paatsuungassutigineqannginnissaa.

§ 1, imm. 4-mi nutaajusumi takuneqarsinnaavoq napparsimasoq tarnimikkut napparsimasunut immikkoortorta qarfimmi unitsinneqarsimasoq, Kalaallit Nunaata avataani tarnimikkut napparsimasunut immikkoortorta qarfimmut matoqqasumut nuunneqarsinnaasoq, imaappat napparsimasoq avatangiisiminut ima ulorianartigisoq Dronning Ingridip Napparsimavissuani tar-

nikkut nappaatilinnut immikkoortorta qarfianni uninngatinneqarnissaa illersorneqarsinnaanani. Aalajangersakkami inatsimmi atuuttoq aamma suleriaaseq ingerlateqqinneqarput, tak. § 9. imm. 2-mi atuuttoq.

2.3 Aalajangersakkat nalinginnaasut

2.3.1 Inatsit atuuttoq

Inatsimmi tunngaviusumik isumaavoq pinngitsaaliissummik iliuuseqarnermik atuinerup pitsaaliornissaa aamma ator neqartannginnissaata sapinngisamik annertunerpaajutinnissaa.

Nakorsartinnissamut suugaluartumulluunniit nammineq piumassutsimik peqataaneq tunngaviuvoq pitsaanerpaq, anguniagarlu taannaavoq ullumikkut anguniarneqareersaq. Taamaattumik pingaaruteqarpoq isumaliutigissallugu iliuutsit sorliit atussallugit tulluarnerunersut napparsimasup nammineq piumassutsiminik peqataanissaanut periarfissai anguniarlugit.

Inatsimmi ilaavoq nalinginnaasumik maleruaqqusaq nakorsap pisussaaffigisaa nammineerluni, tarnimikkut napparsimasunut nakorsarneqartunut anguniagaq aamma taakku nakorsarneqarneranni nakorsaatit ator neqartut suunerinik peqqinnissaqarfiup napparsimaviinut unitsitsinermut atatillugu, ilisimatissallugit, tak. § 3, imm. 2, imm. 1-imut ataqatigiissillugu. Iitersuinissamut pisussaaffiup qulakkiigaa tassaavoq napparsimasup isummernissaminut tamatumalu kingornatigut ilisimatinneqareerluni akuersisinnaanissaminut pisariaqartumik tunngavissaqarnissaa. Pinaveersaartitsinermut atatillugu matumani kissaatiginarpoq aammattaaq napparsimasup qaniginerpaasai napparsimasup nakorsarneqarnera pillugu ilisimatinneqarnissaat. Taamaattorli taamatut ilisimatitsinermi piumasaqataassaaq napparsimasup akuersissuteqarnissaa.

Dronning Ingridip Napparsimavissuani tarnikkut nappaatilinnut immikkoortorta qarfianni nakorsaaneq pisussaaffeqarpoq tarnimikkut napparsimasunut tamanut nakorsarneqarnissaaq pillugu pilersarusiornissamik, tassani apeqqutaatinnagu napparsimavimmi pinngitsaaliissummik uninngatinneqarnerisut imaluunniit namminneq piumassutsiminnik uninnganersut, tak. § 3, imm. 3. Nakorsarneqarnissaaq pillugu pilersarusiaq sapinngisamik piaartumik napparsimavimmut unitsinneqarnerup kinguninnguatigut suliarineqartariaqarpoq aamma napparsimasup pisariaqartitsinera tunngavigalugu ingerlaavartumik naleqqussarneqassalluni. Nakorsarneqarnissaaq pillugu pilersaarut taamaattoq paasitinneqareersimalluni akuersissuteqarnissap anguneqarnissaanut atussallugu tulluassaaq. Nakorsartinnissaaq pillugu pilersaarut pigineqanngippat taava napparsimasumit qanoq pisoqassanersaq, kiisalu pineqartup taassuma suna akuerineraa imaluunniit akerlerineraa paasineqarsinnaangilaq.

Imatut pisoqartillugu napparsimasup nammineq piumassutsiminik peqataanissaa anguneqarnani, taava napparsimasup isumaa nalinginnaasumik ataqqinneqassaaq, tamatumalu kingunerissallugu napparsimavimmut unitsitsitsineq pissanngitsoq aamma nakorsarneqarneq aallartineqassanngitsoq. Pinngitsaaliissummik iliuuseqarnissamut piumasaqaatit pigineqarpata, tak. matuma kingorna immikkoortumi 2.4-imi nammineersinnaajunnaarsitsinermut tunngasooq,

taava qulakkeerneqassaaq pinngitsaaliissummik iliuseqarnerup taamaallaat pisariaqavissu-
mut killilerneqarnissaa. Tamanna tassaavoq annikinnerpaamik periuseqarnermi atorneqartus-
satut taaneqartartoq.

2.3.2 *Siunnersuut matumani pineqartoq, tak. kapitali 2 §§ 3-6*

Siunnersuummi inatsisitigut atugassarititaasut atuuttut ingerlateqqinneqarput, oqaasertai anni-
kitsumik § 5-imi erseqqissarlugit.

Maannakkut paasissutissiinissaaq pillugu aalajangersagaq § 38-miittoq kapitali 2-mi § 4-mut
nuunneqarpoq, tassa aalajangersagaq aalajangersakkanut nalinginnaasunut allanut tulluurtu-
mik attuumassuteqarmat.

Namineersinnaajunnaarsitsineq tunngaviummik inatsimmi § 71 naapertorlugu erseqqilluin-
nartumik inatsisitigut tunngavissaqartussaavoq. Tarnimikkut napparsimasut pillugit inatsimmi
atuuttumi Dronning Ingridip Napparsimavissuani tarnikkut nappaatilinnut immikkoortortaqa-
fianni nakorsaaneq inuttut arlalinnik pisinnaatitaaffilerneqarpoq ilaatigut napparsimavimmu-
t pinngitsaaliissummik unitsitsinissamut aamma pinngitsaaliissummik sukaterussinissamut ata-
tillugu.

Kisiannili Dronning Ingridip Napparsimavissuani tarnikkut nappaatilinnut immikkoortorta-
qarfianni sulisoqarnikkut killilimmik isumalluuteqartoqarpoq, taamaattumik piviusumik peri-
arfissaanngilaq nakorsaanermik tamatigut pigaartuusoqartarnissaa, tassa matuma siuliani taa-
neqartunik aalajangiisinnaasumik. Tamanna pisinnaatitaaffiit isumannaatsuunissaannut aam-
ma peqqissutsikkut suliatigut eqqarsarnartoqarpoq, tassami sulisut imatut inississinnaammata
toqqaasariaqalersinnaallutik pinngitsoornani aalajangiinissamut inatsisitigut pisussaaffeqar-
nerminnit qaffasinnerusumik inissisimasumi, imaluunniit suliassaq peqqissutsimut tunngasoq
nakorsarneqarnissamik pisariaqartitsineq pisariaqartoq pinngitsuussalluni. Taamaattumik
Naalakkersuisut siunertaqarluartutut isigaat inatsimmi aammattaaq isummertoqarnissaa qanoq
iliortoqarnissaanut, tassa aalajangiinissamut pisinnaatitaaffik nakorsaanermut inuttut pisis-
sannagortinneqarnerani, kisianni aalajangiineq allatut ajornartumik nakorsamit appasinnerusu-
mi inissisimasumit aalajangerneqartariaqalerpat, soorlu assersuutigalugu napparsimasoq un-
nuakkut napparsimavimmukaanneqarpat pinngitsaaliissummik unitsinneqarnissaa siunertari-
neqarluni, tassanilu periarfissaqartoqarnani pinngitsaaliissummik unitsitsinissamut apeqqut
nakorsaanermut saqqummiutissallugu.

Nakorsaanerup peqannginnera soorlu assersuutigalugu napparsimanermik, feeriarnermik ima-
luunniit qinikkatut pisortanillu toqqakkatut suliaqarnermik patsiseqarsinnaavoq.

Tarnimikkut napparsimasut pillugit inatsisimmi § 6 siunnersuutip kingunerissavaa aalajangi-
nerit aalajangersakkami taaneqartut, soorlu assersuutigalugit napparsimavimmu-
t pinngitsaa-
liissummik unitsitsinermut aamma napparsimavimmi pinngitsaaliissummik uninngatitsiner-

mut tunngasut, nakorsaannermit inuttut aalajangerneqassasut imaluunniit nakorsaaneq peqanngitsillugu taava nakorsamit, nakorsaanerup peqannginnera pissutigalugu Dronning Ingridip Napparsimavissuani tarnikkut nappaatilinnut immikkoortorta qarfianni nakorsaasoqarnissamut tunngatillugu akisussaassuseqartumik. Aalajangersakkami qulakkeerneqarpoq tarnimikkut napparsimasut pisariaqartumik nakorsarneqarsinnaanerat, aammattaaq taamatut pisoqartillugu tamanna pisariaqarpat nakorsaanerup peqannginnerata nalaani.

Nakorsaq nakorsaanerup peqannginnerata nalaani aalajangiippat, taava nakorsaanerup *piaarnerpaamik* aamma kingusinnerpaamik nalunaaquttap akunnerisa 24-t qaangiunnerini isummerfigissavaa nakorsap pinngitsaaliissummik iliuuseqarnissamut aalajangiinera, tassa imaappoq periarfissami siullerpaami. Nakorsaanerup isummenera pinngitsaaliissummik iliuuseqarneq pillugu allattaavissuarmut ilanngunneqassaaq. Taamaalilluni maleruaqqusap siunnersuutigineqartup tunngaviusumik aallaaviusoq atuutsiinnassavaa, tassa taamatut annertuumik pisoqarnissaanut aalajangiinerit tunngaviusumik nakorsaanerup pisinnaatitaaffianut ilaasut.

Malugineqassaaq nakorsaaneq tassaasoq suli akisussaassuseqarnerpaajusoq, tassa nammineersinnaajunnaarsitsinermi aamma pinngitsaaliissummik allamik atuinermi tarnimikkut napparsimasup pillugit inatsimmi maleruaqqusat naapertorlugit pisariaqartitsisoqarnera sinnerlugu atuisoqannginnissaanut, tak. § 34, imm. 1.

2.4 Nammineersinnaajunnaarsitsineq

2.4.1 *Napparsimavimmut pinngitsaaliissummik unitsitsineq aamma napparsimavimmi pinngitsaaliissummik uninngatitsineq*

2.4.1.1 *Inatsit atuuttoq*

Silanngajaarneq tassaavoq pinngitsaaliissummik napparsimavimmut unitsitsinissamut aamma pinngitsaaliissummik uninngatitsigallarnissamut qitiusutut piumasaqaatit tunngavissaasoq, tak. § 5. Silanngajaarneq inunntu pineqartunut qanoq innerannik naliliinermi killiinissamut sapinngisamik ilisarnaatit annikinnerpaatut isigineqartariaqarpoq, tassa ulorianassutsimut aamma nakorsartinnissamut ilisarnaatip eqquutsinneqarnissaanut atatillugu taakku tarnimikkut napparsimasunut immikkoortorta qarfimmi nammineersinnaajunnaarsinneqarsinnaanerinut.

Silanngajaarneq (isumaqatigaa tarnikkut perulunneq) tassaavoq tarnikkut pissuseq pisarnertut ittuunngitsoq. Siullermik ilisarnaataavoq piviusunik naliliisinnaanerup allanngornera, napparsimasup avatangiisiminik aamma imminik misiginnissinnaanermik, nammineq qanoq innerminik aamma iliuuserisaminik naliliisinnaanermut periarfissaqarneranut "piviusunut" naleqqiussilluni ajoquteqalerneq.

Retslægerådip paasinninnera naapertorlugu suliatigut atituumik isumaqatigiittoqarpoq silanngajaarnerup (tarnikkut perulunnerup) suuneranut tunngatillugu. Tarnikkut perulunnerit assigiinngitsut suunerinut sumut killeqarnerat pillugit tarnikkut nappaateqarnerit pillugit ilinniarfinni ataasiakkaani assigiinngitsunik isumaqarneq apeqqutaatinnagu, kiisalu ajornartorsiutit i-

matut: tarnimigut peruluppoq – tarnimigut perulunnigilaq aalajangiinissamut ajornartorsiutinut attuumassuteqartut apeqqutaatinnagit, taamaalilluni oqariaaseq tarnikkut perulunneq pingaaruteqartumik aalajangersimavoq. Pinngitsaaliissummik unitsitsinermut aamma pinngitsaaliissummik uninngatitsinermut atatillugu tarnikkut nakorsaasarnermi napparsimanerup suussusianik aalajangiinermi silanngajaarnerup saniatigut aammattaaq ilaapput *imatut pissuseqarneq tamanna silanngajaarnermut sanilliunneqarsinnaalluarluni*. Pissuseq misissuinerup nalerpiani silanngajaarnermit allaanerusutut immikkoortinneqassanngilaq taamaattumillu aammattaaq assinganik nakorsarneqassaaq, imaappat qanoq issusermik naliliinissamut nakorsartinnissamut aamma ulorianassutsimut ilisarnaatit tamatumunnga atatillugu eqquutsinneqarsimapata.

Piumasaqaatigineqarpat imaattoqarnera "imatut pissuseqarneq tamanna silanngajaarnermut sanilliunneqarsinnaalluarluni" taava allanneqassaaq, tamatumani pineqartoq tassaavoq sammisami killiliussat annikitsuararsuunerat. Assigiissutsip naammassinera pissutissaqavissaguni taava assigiissuseqarnissamut piumasaqaatit eqqorluinnartumik naammassinnissapput. Tamanna taamaattoqarneratut isigineqartariaqarpoq soorlu assersuutigalugu sakkortoorujussuarmik puuarrallalluni pissuseqarnermi, pissusissamisuumngitsumik tassanngaannaq iliorneq siannissutsip allangorneranik malitseqartumik, imigassamik aamma/imaluunniit tarnikkut napparsimasunut nakorsaatnik peqquteqartumik nappaateqartutut pissusilersorneq, pissutsit inuttut inuunermut attuumassutillit, noqartarnermik nappaateqarneq pissutigalugu noqarnermi pujorsuup iluaniinneq aamma neriumajunnaarnermik nappaateqarnermi – nukillaarnermik anertuumik aamma inuunerup navianartorsiortinneqarneranik kinguneqartumik.

Silanngajaarneq imaluunniit imatut tamatumunnga sanilliunneqarsinnaalluartumik pissuseqarneq pisariaqarpoq – kisianni naammanngilaq – napparsimavimmut pinngitsaaliissummik unitsitsinermut imaluunniit napparsimavimmi pinngitsaaliissummik uninngatitsinermik aallartitsinissamut atussallugu.

Napparsimasup *nakorsarneqarnissamut ilisarnaat imaluunniit ulorianassutsimut ilisarnaat pigissavai*. Tamatuma saniatigut piumasaqaataavoq napparsimavimmut unitsinneqarnermi imaluunniit napparsimavimmi uninngatinneqarnermi *nakorsarneqarnissaq siunertarineqassasoq*. Taamatut piumasaqaateqartoqarnera nakorsarneqarnissamik ilisarnaat tunngavigalugu nammineersinnaajunnaarsitsinissamut atuutiinnanngilaq, kisianni aammattaaq ulorianassuseqarnermik ilisarnaat tunngavigalugu namminneersinnaajunnaarsitsinissamut atuuppoq.

Napparsimasoq pissuseqarnermigut *imminnut navianartorsiortissaaq imaluunniit allanut navianartorsiortitsilluni*. Imminnut toqunnissaq imaluunniit imminut ajoqusernissaq aarlerinarpat, taava napparsimasoq imminut navianartorsiortissinnaavoq. Allanut navianartorsiortitsinnaaneq ilisarnaateqarpat taava periarfissiissutigineqassaaq pinaveersaartitsinermik iliuseqarnissaq inuit allat illersorneqarnissaat piinnarnagu aammali tarnimigut napparsimasoq mianeralugu, taanna pinngitsaaliissummik unitsinneqaruni inatsisinik unioqqutitsinissaanut iller-

sorneqassammat. Inatsisitigut unioqqutitsinerit immaqa eqqartuussisutigut malersorneqarnermik kinguneqaratarsinnaasut.

Tarnimikkut napparsisunut immikkoortorta qarfimmi nammineersinnaajunnaarsitsinermut taarsiussineq imaattariaqanngilaq pineqartumut iliuuseqartoqassanngitsaq, imaappat ilisarnaat "allanut ulorianarnek" isumakkeernekarluni. Tamatumunnga paarlaallugu akuttunngitsumik politiinit pineqaatissinneqarnek pisinnaavoq, soorlu assersuutigalugu tigusaaneq imaluunniit isertitsivimmiitinneqarnek pinerlussimanermik, aalakooujussuarnermik imaluunniit tamat ornittagaanni akornusersuinernek pissuteqartumik il.il., tamannalu inunnut tarnimikkut napparteqartunut aaqqiissutissatut kissaatiginarnaviannngilaq.

Nakorsarneqarnissamut ilisarnaat tunngavigalugu nammineersinnaajunnaarsitsineq pisinnaavoq imaappat, taamak iliortoqanngippat *peqqissinissamut imaluunniit malunnaateqarluartumik aamma pingaarutilimmik peqqinnerulernissamut periarfissat malunnaateqarluartumik ajornerulertussaallutik*. Piumasaqaatigineqarsinnaanngilaq silanngajaarluni napparsimanerup qaangivillugu ajorunnaarsinnaanera, tamanna imatut paasineqassaaq napparsimasup napparsimavimmi nakorsarneqarnermi kingornatigut peqqissivinnissani naatsorsuutigisinnaanngikkaa. Taamaattorli nakorsartinneq malunnaateqarluartumik peqqinnerulernermik imaluunniit qanoq issutsip tassangaanaq ajornerulernissaata pitsaaliorneqarnera erseqqissumik tunngavissaqassapput. Nakorsartinnissamut ilisarnaatinut piumasaqaatit naammassineqartutut isigineqarsinnaapput naammaginarumik malunnaateqarluartumillu iluaallatsitsineq misigineqarpat. Piviusorsortumik ilimagineqarsinnaassaaq napparsimasup napparsimavimmi nakorsartereernermi kingornatigut ima pitsanngortigisimanissaa, nakorsartinnerup inernerisinnaallugu napparsimavimmit angerlartinneqarnek.

Tarnimigut napparsimasooq matuma siuliani § 5-imi piumasaqaatit nassuiaatigineqartut eqquutsinneqarpata napparsimasooq napparsimavimmut pinngitsaaliissummik unitsinneqarsinnaavoq imaluunniit napparsimavimmi pinngitsaaliissummik uninngatinneqarsinnaalluni. Pinngitsaaliissummik uninngatitsineq atuutsinneqassaaq napparsimasooq nammineq piumassutsini naapertorlugu napparsimavimmi uninngasooreerpat imaluunniit napparsimavimmi pinngitsaaliissummik uninngatinneqareerpat.

Napparsimasup napparsimavimmut pinngitsaaliissummik unitsinneqareernermi kingornatigut angerlartinneqarnissani kissaatigippagu Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup nalilissavaa § 5-imi piumasaqaatit suli aortinneqarnerisut. Taamaappat angerlarniarnek itigartitsissutigineqassaaq napparsimasorlu pinngitsaaliissummik uninngatinneqassalluni.

Napparsimavimmi pinngitsaaliissummik uninngatitsinissamut taamatuttaaq allamik periarfissaqarpoq, aammattaaq Dronning Ingridip Napparsimavissuani nammineq piumassusertik naapertorlugu uninngasunik. Tassani pineqartut tassaapput napparsimasut napparsimavimmut pinngitsaaliissummik unitsitsinneqarnissamut inatsimmi § 5-imi piumasaqaatini pineqartut

namminerlu piumassutsiminnik uninngareerlutik napparsimavimmit angerlarusuttut. Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaanermit inatsimmi § 5-imi piumasaqaatit atortinneqarnissaat nalilerneqarpata, napparsimavimmit angerlarnissaq itigartitsissutaasinnaavoq napparsimasorlu pinngitsaaliissummik uninngatinneqalissalluni.

Nappasimasoq silanngajaartoq nammineq piumassutsini naapertorlugu peqqinnissaqarfiup napparsimaviisa arlaanni uninngasoq angerlarusuppat inatsimmilu § 5-imi pinngitsaaliissummik unitsitsinermut piumasaqaatit atortinneqarnerat aallaavigalugu itigartinneqarpat, taava Dronning Ingridip Napparsimavissuani tarnikkut nappaatilinnut Immikkoortortaqarfiannut § 1 imm. 2-mi maleruaqqusat naapertorlugit napparsimavimmut pinngitsaaliissummik unitsinneqarnissaa aallartinneqassaaq.

2.4.1.2 Siunnersuut matumani pineqartoq, tak. §§ 7 aamma 11

Siunnersuummi inatsisitigut pisinnaatitaaffiit atuuttut ingerlateqqinneqarput. Nunami allami tarnikkut napparsimanermik nakorsarneqarnissamut napparsimasunik nuussinissamik periarfissaliissut § 1, imm. 4-mut nuunneqarpoq.

2.4.2 Pinngitsaaliissummik oqqussinnek aamma nammineersinnaajunnaarsitaanerup atuukkunnaarsinneqarnera

2.4.2.1 Inatsit atuuttoq

Inatsimmi atuuttumi § 10 naapertorlugu uninngavimminnit qimaasimasunik aamma takkutinngitsoortunik oqqussisoqarsinnaavoq. Taamaattorli takkutsinngitsoornerup paasineqarneraniit sapaatit akunnerata ataatsip qaangiutinnginnerani taamaallaat oqqussisoqarsinnaavoq. Takkutinngitsoornerup paasineqarneraniit sapaatit akunnera ataaseq qaangiutereersimappat napparsimavimmut unitsitsinermut atatillugu pappiaqqanik nutaanik suliaqartoqarnissaa piumasaqaataavoq. Aninissamut akuerineqareerluni pineqartoq takkutinngitsoorpat utertitsinissamut taamatuttaaq piumasaqaataavoq, ullut pingasut sinnerlugit unnuinertalerlugu aninissamut akuersisoqarsimannginnissaa.

Nammineersinnaajunnaarsitsineq § 11 naapertorlugu ingerlaannartumik taamaatinneqassaaq § 5-imi piumasaqaatit atuukkunnaarsimappata.

2.4.2.2 Siunnersuut matumani pineqartoq, tak. § 12-13

Siunnersuummi inatsisitigut pisinnaatitaaffiit atuuttut ingerlateqqinneqarput.

Erseqqissarneqarpoq nammineersinnaajunnaarsitsinerup taamaatinneqarnissaanut nakorsaanek kisimi aalajangiinissamut pisinnaatinneqartoq. Siunnersuummi § 13-imi oqaaseqaatigineqartut immikkut ittut innersuussutigineqarput.

2.4.3 Pinngitsaaliissummik napparsimavimmut unitsitsinermi periuseq

2.4.3.1 *Inatsit atuuttoq*

Napparsimavimmut unitsitsinermut periuseq §§ 6-8-imi sukumiisumik nassuiaatigineqarpoq.

Tassani ilaatigut allassimavoq napparsimavimmut pinngitsaaliisummik unitsitsinissap ingerlanneqarnissaanut politiit aalajangiissasut aamma tamatumani ikiuutissasut. Taamaalillutik politiit tassaapput pinngitsaaliisummik unitsitsinerup ingerlanneqarnerani periutsip malinneqarneranik nakkutiginnittussat.

Dronning Ingridip Napparsimavissuani tarnikkut nappaatilinnut immikkoortortaqaarfianni nakorsaanerup aalajangissavaa napparsimavimmut pinngitsaaliisummik unitsitsinermut piumasagaatit atuutsinneqarnerisut, aamma napparsimasoq tamanna tunngavigalugu tarnimikkut napparsimasunut immikkoortortaqaarfimmut pinngitsaaliisummik unitsinneqarsinnaanersoq.

2.4.3.3. *Siunnersuut matumani pineqartoq, tak. §§ 8-10*

Siunnersuummi inatsisitigut pisinnaatitaaffiit atuuttut ingerlateqqinneqarput. Oqaatsitigut a-taasiakkaanik erseqqissaateqartoqarpoq.

2.5 Pinngitsaaliisummik nakorsarneqarneq

2.5.1 *Inatsit atuuttoq*

Tunngaviusumik piumasagaataavoq nakorsamit pinngitsaaliisummik nakorsarneqarni tamani taamaallaat napparsimasut uninngasut pinngitsaaliisummik nakorsarneqarsinnaanerat piumasagaataasoq. Taamatuttaaq piumasagaataavoq napparsimasut taakku pinngitsaaliisummik uninngatinneqarnissaannut piumasagaatit naammassineqarsimanissaat. Dronning Ingridip Napparsimavissuani tarnikkut nappaatilinnut immikkoortortaqaarfianni nakorsaaneq kisimi pinngitsaaliisummik unitsitsinissamut aalajangiisnaavoq, tassunga ilanngullugit pinngitsaaliisummik nakorsarneqarnerup suunissaanik sivisussusissaanillu aalajangiilluni.

Pinngitsaaliisummik nakorsarneqarneq pinngitsaaliisummik nakorsaatitortitsinertalik, innaallagiaq atorlugu sianiutunik sunniineq aamma pinngitsaaliisummik nerisitaaneq taamaallaat Dronning Ingridip Napparsimavissuani aallartinneqarsinnaapput aamma ingerlanneqarsinnaallutik.

Innaallagiaq atorlugu sianiutunik sunniineq atorlugu nakorsaanissamut immikkut piumasagaataapput napparsimasup piffissami tassanerpiaq qanoq issusia imatut inissisimassalluni inuunera navianartorsiorsinnaalluni.

Pinngitsaaliisummik nakorsaatitortitsinissaq aallartinneqassanngilaq peqqinnissaqarfiup suliffeqarfiini allani pinngitsaaliisummik unitsitsinernik aallartitsereersuni. Tamatumani pinngaartinneqarpoq suliffeqarfinni taakkunanani ingerlaannartumik nakorsaatitortitsinissamut periarfissap suli atuutiinnarnissaa. Taamatut nakorsaatitortitsineq pinngitsaaliisummik ingerlanneqassappat timi atorlugu pissaanermik atuineq pillugu maleruagassani periarfissaliisoqassaaq aamma ili-

uuseqarnertut sakkukinnerusutut eqqissinartumik kapuummik kapitineq atornerqarpat, tak. § 22 imm. 2. Sivisuumik nakorsaatitortitsinissamut pilersaarusiornissamut, tassunga ilanngullugu pinngitsaaliissummik nakorsaatitortitsinissamut periarfissaqarnissamut piumasaqaataavoq napparsimasumik piffissami sivisuumi nakkutiginninnissaq, tamannalu taamaallaat Dronning Ingridip Napparsimavissuani tarnikkut nappaatilinnut immikkoortorta qarfianni illersorneqarsinnaasumik ingerlanneqarsinnaavoq.

Inatsimmi periarfissiisoqarpoq napparsimasunik pinngitsaaliissummik uninngatinneqarnissamut piumasaqaatinik naammassinnittunik timikkut anniaatinik pinngitsaaliissummik nakorsaanissamut. Taamaattorli pinngitsaaliissummik nakorsaanissamut periarfissaq tamatumani killilerneqarpoq napparsimasut inuunerat imaluunniit peqqissusiat annertuumik navianartorsi orpat. Timikkut nappaatinik pinngitsaaliissummik nakorsaanissamut aalajangiineq tarnimikkut napparsimasunut immikkoortorta qarfimmi nakorsaanerup aamma timikkut napparsimasunut immikkoortorta qarfimmi pineqartumi nakorsaanerup ataatsimoorlutik aalajangiiffigissa vaat. Tarnimigut napparsimasoq Dronning Ingridip Napparsimavissuani tarnikkut nappaatilinnut immikkoortorta qarfimmi inngippat maleruaqqusaq taanna naapertorlugu pinngitsaaliissummik nakorsaanissamut piumasaqaataavoq, tamanna sioqqullugu pinngitsaaliissummik unitsitsinermut uppernarsaatip naammassineqarsimanissaa, aamma tarnimikkut napparsimasunut immikkoortorta qarfimmi nakorsaanerup pinngitsaaliissummik unitsitsinermut piumasaqaatit naammassineqarnerat aalajangiiffigisimappagu.

2.5.2 Siunnersuut matumani pineqartoq, tak. kapitali 4 §§ 14-15

Siunnersuummi inatsisitigut pisinnaatitaaffiit atuuttut ingerlateqqinneqarput.

Tarnimikkut napparsimasut pillugit inatsit atuuttuusoq ullumikkut ima oqaasertaqartinneqarpoq nakorsaatit misilittarneqareersimasut nalinginnaasumik annertussusilerlugit aamma sapinngisamik ikinnerpaanik peruluutaasunik saniatigut sunniuteqartartut atorneqassasut.

Nakorsaatilli allatut sunniutigisinnaasaat assigiinngisitaartuupput, oqaaseqatigiinnilu taakkunani atorneqartuni soorlu assersuutigalugu uummatikkut ajoquteqalersinnaanermut aamma nutsat ilanngartulersinnaanerisa nalorninartoqarsinnaanera immikkoortinneqanngillat.

Siunnersuummi erseqqissarneqarpoq nakorsaatit allatut sunniutigisinnaasaasa amerlassusiat aalajangiisuunngitsaq, illuatungaatigulli nakorsaatit allatut sunniutigisinnaasaasa perulunnartut amerlassusiat. § 14, imm. 4-mi ilanngussap qulakkiissavaa nakorsaatit napparsimasunut sapinngisamik annikinnerpaamik ajoqusiisut atorneqassasut.

2.6 Napparsimavimmit angerlartinneqarnerup kingornatigut malinnaaffiginninneq

2.6.1 Inatsit atuuttoq

Inatsimmi § 14-imi allassimavoq Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup akisussaaffigigaa napparsimasut napparsima-

vimmit angerlartinneqarnermik kingornatigut peqqissuunissaq anguniarlugu nakorsarneqar-nissamut imaluunniit isumaginninnikkut neqeroorutit, napparsimasup peqqissusianut pisaria-qartut pillugit namminneq saaffiginninnissaat naatsorsuutigineqanngitsunut napparsimavim-mit angerlartitaanermut isumaqatigiissuteqarfigineqassasut. Napparsimasoq § 14-imi pineqar-toq napparsimavimmit angerlartitaanermut atatillugu isumaqatigiissuteqarfigineqarnissamut peqataajumanngippat nakorsaanerup akisussaaffigaa napparsimasup nakorsarneqarnissamut tunngasutigut aamma isumaginninnikkut neqerooruteqarfigineqarnissamut ataqatigiissaakka-mik pilersaarusiortoqarnissaa, takuuk § 15.

Napparsimavimmit angerlartinneqarnermut atatillugu isumaqatigiissuteqartoqarsimappat ima-luunniit ataqatigiissaakkamik pilersaarusiortoqarsimappat tarnikkut nappaatilinnut immik-koortorta qarfiup aamma pisorta qarfiit allat, peqqinnissamik suliallit il.il. akornanni paasis-sissanik, napparsimasup inuttut nammineq inuuneranut tunngasunik paarlaasseqatigiittoqartar-sinnaavoq.

Sullinniakkat taakkuupput napparsimasut tarnimikkut peruluutillit peqqissutsimikkut anner-tuumik eqqorneqartussat arlaatigut nakorsarneqarnissamut tunngasunik imaluunniit isuma-ginninnikkut tapersorsorneqanngikkunik. Tamatumani assersuutitut taaneqarsinnaasut tas-saapput napparsimasut skitzofreniimik napparsimasut tamannalu ilutigalugu atornerluinermik ajornartorsiuteqartut imaluunniit inuttut inuuniarnerminni annertuumik ajornartorsiuteqartut.

Napparsimavimmit angerlartinneqarnermut atatillugu isumaqatigiissut imaluunniit ataqatigiis-saakkamik pilersaarut napparsimasup maanna siunissamilu nakorsarneqarnissamut isumagin-ninnikkullu pisariaqartitaanik neqeroorutinik imaqartariaqarpoq. Taamatuttaaq nakorsarneqar-nissamut tunngasutigut tulluurtunik neqeroorutinik oqartussaasunik pineqartunik il.il. siuller-mik ataatsimiinnissamut ullua nalunaaqutaalu ilanngullugit aammattaaq ilanngunneqartaria-qarput. Taamatullu isumaqatigiissut eqquutsinneqanngippat kina malinnaaffiginninnissamut akisussaasuunersoq kinalu qisuariassanersoq allassimasariaqarput. Kiisalu isumaqatigiissu-mi allassimasariaqarpoq qaqugu isumaqatigiissut taamaatinneqassanersoq qaqugulu naliliivi-gineqassanersoq.

Tarnimikkut napparsimasut sanngiinneraanik ikiuineq annertusiniarlugu napparsimavimmit angerlartitaarenermi pinngitsaaliissummik malinnaaffigineqarnissamut periarfissiisoqarpoq. Napparsimasut namminneq aalajangiisinnaatitaanerannut ataqqinninneq tarnimikkut peruluu-tillit katsorsartinnissamik annertuumik pisariaqartitsisut, nappaateqarnerminnilli paasisimasa-qanngitsut, ilaginnarneqarnerannik kinguneqassanngilaq. Siunnersuummi pineqartumi taama-tut tarnimikkut napparsimasunik naammaginartumik katsorsarneqarnissamut tungiorneqarnis-samullu namminneerlutik ujartuisinnaanngitsunik tamanna sumiginnaanertut isigisariaqas-saaq. Inatsisitigut illersugaanissaq eqqarsaatigalugu pinngitsaaliissummik malinnaaffiginnin-nissamut tunngavilersuutit sukangasuut atuutilersinneqarput. Tamatumuuna ajortumik inger-lasoqalinnginnissaa aamma periarfissat pisariaqanngitsumik atorneqannginnissaat qulakkeer-

niarneqarput. Napparsimavimmit angerlartinneqarnermut atatillugu pinngitsaaliissummik malinnaaffiginninnissaq pillugu tunngavilersuutit sukumiinerusut § 17-imut immikkut oqaaseqaatinut innersuussutigineqarput.

Napparsimavimmit angerlartinneqarnerup kingornatigut pinngitsaaliissummik malinnaaffiginninnissaq pillugu nakorsaanerup aalajangiinera peqqinnissaqarfiup suliffeqarfiisa arlaanni nakorsaatitortinneqarnissamut takkunnissamut peqquneqarnermik taamaallaat imaqassaaq. Napparsimasoq takkutinnigppat politiit ikiorsiullugit aaneqarnissaa peqqinnissaqarfimmilu pineqartumi pinngitsaaliissummik nakorsaatitortinneqarnissaa nakorsaanerup aalajangersinnaavaa. Peqqinnissaqarfimmi pinngitsaaliilluni uninngatitsineq pineqartoq sivikitsuinnaassaaq (ulloq ataaseq). Pinngitsaaliissut tassanngaannaq pisoq taamaallaat atorneqassaaq napparsimasup, tarnimikkut nappaatilinnut immikkoortortaqarfimmit angerlareernermini, nakorsaatitortiinnarnissaa peqqissusianut apequtaappat, tarnimikkut napparsimasunut immikkoortortaqarfimmut unitsitseqqaarnagu pisariaqartumik nakorsaatitortiinnarnissaanut allatigut periarfissaqavinnigppat.

Pinngitsaaliissummik malinnaaffigineqarnissap aalajangiunneqarnera qaammatit pingasut qaangiukkaangata nakorsaanermit naliliiffigeqqinneqartassaaq. Nakorsaanerup tassani nalilissavaa tunngavissaqartumik aarleqqutaasinnaanersoq aamma tunngavissaqartumik nalorninar-toqarnersoq qaammatit pingajussaasa qaangiunneranni napparsimasup pisariaqartitamik nakorsartinnerminik taamaatitsinissaa. Taamaattoqassappat nakorsaanerup aalajangersinnaavaa pinngitsaaliissummik malinnaaffigineqarnerup qaammatit pingasukkaarlugit angullugit sivit-sorneqartarnissaa.

Kissaatigineqanngilaq tarnimikkut napparsimasut pineqartut inuttut nammineersinnaajunnaarsinneqarnerat qaqugumulluunniit atuuttussamik akuliuffigineqarnissaa. Napparsimavimmi uninngatinneqarsimanerup malinnaaffigineqarnera pineqarmat, inatsimmi allassimavoq napparsimasup sivilunerpaamik qaammatini aqqaneq-marlunni pinngitsaaliissummik malinnaavigineqarsinnaanera. Taamatut napparsimasup pinngitsaaliissummik malinnaavigineqarsinnaaneramik qaffasinnerpaaffissaasumik killiliinikkut napparsimasumik piffissami siviluallaami pinngitsaaliissummik katsorsartinnissamik pinngitsoortitsivoq. Taamaalilluni angerlareernermi pinngitsaaliissummik malinnaaffigineqarnissaa aatsaat aallartinneqaqqissinnaavoq napparsimasup matuma siuliani taaneqartut piumasaqaatit naammassippagit.

Napparsimavimmit angerlareernermi pinngitsaaliissummik malinnaaffigineqarnissamut piumasaqaatit pinngitsaaliissummik unitsitsinissamut aamma pinngitsaaliissummik nakorsarneqarnissamut piumasaqaataasut assiginngilaat, tak. siunnersuummi kapitali 3 aamma 4. Napparsimasut silanngajaartuusut aamma kapitalit taakku naapertorlugit nakorsarneqarnissamut imaluunniit ulorianartorsiornermut ersiutinik pigisaqartut Dronning Ingridip Napparsimavissuani tarnikkut nappaatilinnut Immikkoortortaqarfimmut unitsillugit suli nakorsarneqarsinnaapput. Pinngitsaaliissummik malinnaaffigineqarnissamut siunertaavoq taamaaliornikkut taamatut

napparsimasup, napparsimanerata ima ajornerulernissaa pinngitsoorniarlugu, pinngitsaaliis-
summik unitsitseqqinnissaq pisariaqalerluni.

Pinngitsaaliissummik malinnaaffiginninnissamut aalajangiineq inatsisitigut illersugaanerup
sakkortuunik qularnaveeqquserneqarneranik malitseqartinneqarpoq. Napparsimasoq taamaa-
lilluni automatiskiusumik siunnersortilerneqassaaq, pineqarnerlu Tarnimikkut Nappaatillit
Maalaarutaannik Aalajangiisartunut, maalaarutip tiguneraniit kingusinnerpaamik ulluinnaat
arfineq marluk qaangiunneranni aalajangiisussanut, maalaarutigineqarsinnaavoq. Napparsima-
sup maalaaruteqarnissani kissaatigippagu pinngitsaaliissummik malinnaaffiginninnissaq aal-
lartinneqarsinnaanngilaq Tarnimikkut Nappaatillit Maalaarutaannik Aalajangiisartunit pin-
ngitsaaliissummik malinnaaffiginninniarnepup akuersissutigineqartinnagu. Tarnimikkut Nap-
paatillit Maalaarutaannik Aalajangiisartunit napparsimasoq naammagittaalliutigisani pillugu i-
lalerneqarpat pinngitsaaliissummik malinnaaffiginninnissaq aallartinneqarsinnaanngilaq.

Napparsimasoq Tarnimikkut Nappaatillit Maalaarutaannik Aalajangiisartunit ilalerneqanngip-
pat aalajangiineq eqqartuussivikkut aalajangigassanngortinneqarsinnaavoq. Pinngitsaaliisum-
mik malinnaaffigineqarnerup sivitsorneqarneri tamaasa Tarnimikkut Nappaatillit Maalaaru-
taannik Aalajangiisartunut maalaaruteqartoqaqqissinnaavoq eqqartuussivikkut suliareqqitas-
sanngortitsinermik periarfissalimmik.

Malugeqquneqarpoq angerlareernermi pinngitsaaliissummik malinnaaffigineqarnerup kingu-
nerissagaa taamatut pinngitsaaliissummik iliuseqarnerup siunnersuummi iliuserisassat allat
assigalugit immikkoortortaqarfiup pinngitsaaliissummik protokolianut ilanngunneqassasoq
Nunatsinnilu Nakorsaannermut nalunaarutigineqassalluni, tak. § 30.

2.6.2 *Siunnersuut matumani pineqartoq, tak. kapitali 5 §§ 16-20*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.7 Sukaterussineq il.il.

2.7.1 *Inatsit atuuttoq*

Inatsimmi atuuttumi pinngitsaaliissutit tamarmik, sukaterussinerit imaluunniit najumminnin-
nerit, pingaarnernut ukununnga immikkoortinneqarput: Pinngitsaaliissummik sukaterussineq,
timi atorlugu pissaanermik atuneq, sernissuiniarluni sukaterussineq, immikkut nakkutilliineq,
immikkoortortaqarfimmi matunik parnaarsuineq kiisalu pinngitsaaliissummik timikkut eqqi-
luisaartitsineq.

Una eqqarsaatigalugu *pinngitsaaliissummik sukaterussinerup aamma sernissuiniarluni suka-
terussinerup immikkoortinniarnepup*, iliuseqarnermut siunertaasoq aalajangiisuuvoq
sukaterussinerit taakkua marluk sorliunerannut. Siunertarineqarpat ajoqusernissamut uloria-
nartorsiornissap pinngitsoortinnissaa, napparsimasup siunertarippagu imminut ajoqusernissani
imaluunniit avatangiisiminiittunik ajoqusiiniarnissani, taava pinngitsaaliissutitut tamanna taa-
neqassaaq. Akerlianik sernissuiniarneq pineqarpoq tassani siunertaappat napparsimasoq taa-

mak pinianggikkaluarluni nammineq timini malunnaateqarluartumik ulorianartorsiortilerpagu, tamakkua ilisarnaatigaat ulluinnarni iliuuserisakkat iliuuseriniarsarippagit, naak pineqartup tamakkua ingerlannissaat sapilersimagaluarlugit.

Siunertap saniatigut iliuuserisap suunera immikkoortitsiniarnermi pingaaruteqarpoq. Qitequtit, ungerutit assannut aalajangiissutit, ungerutit isikkanik aalajangiissutit aamma aaqqatit siunnersuut naapertorlugu pinngitsaaliissummik sukaterussinermi taamaallaat atorneqassapput.

Inatsimmi § 19, imm. 2 naapertorlugu *pinngitsaaliilluni sukaterussineq* taamaallaat atorneqarsinnaavoq pisariaqarpat napparsimasoq imminut ajoquseriataarsinnaaneranik imaluunniit allanik timikkut imaluunniit peqqissutsikkut ajoquseeriataarnissaanik pinngitsoortitsitsiniarluni. Taamatuttaaq pinngitsaaliilluni sukaterussineq pissaaq napparsimasoq uninngaqatiminik malersuippat assigisaanilluunniit sakkortuumik ajoqusiippat imaluunniit annertuumik aserorterippat. Tamatumani piomasagaataangilaq pineqartup silanngajaartuunissaa imaluunniit tamatumunnga assingusumik pissuseqarnissaa.

Immikkut maleruaqqusaqangilaq pinngitsaaliissummik sukaterussinissamik aalajangiinissamut kina pisinnaatitaaffeqarnerseq, tak. inatsimmi § 20. Inatsimmi § 21-mi allassimavoq napparsimasut qiteqummik pinngitsaaliissummik sukaterussat aalajangersimasumik pigaartoqartarnissaat pillugu maleruaqqusaq.

Atorneqartartut pillugit piomasagaatinut assingusunut, pinngitsaaliissummik sukaterussinermut atuuttunut, napparsimasup pineqartup *timimi nukiit atorlugit najumminissaanut* aamma pineqartup sumiiffissamut allamukaanqarsinnaanissaanut periarfissaqarpoq, tak. § 22 imm. 1, naggat siulleq. Pisuni ataasiakkaani pinngitsaaliissummik sukaterussineq imaluunniit taamaallaat timi atorlugu pissaanermik atuinissaq pillugit apeqqut annikinnerpaamik iliuuserisamut tunngavilersuutaasup qimerloorneqarnerani aalajangiiffigineqassaaq.

§ 22-mi imm. 1, naggatit aappaanni allassimavoq inuit nammineersinnaajunnaarsinneqartut napparsimavimmit qimagunnissaat pinngitsoortinneqarsinnaasoq qanorluunniit timi atorlugu pissaanermik atuinissamut piomasagaataasut nalinginnaasut atuutinnikkaluarpata. Aalajangersakkami matut silarliit parnaarnissaat ilaatigut periarfissiissutigineqarpoq.

§ 22, imm. 2-mi periarfissaqarpoq pisariaqassappat pinngitsaaliissummik napparsimasoq eqqissiveqangitsoq eqqissisaammik nakorsaatitortinneqarnissaa. Tamanna peqqissutsimut tunngatillugu pisariaqarsinnaavoq napparsimasup pitsaanerulernissaa ilaatigut sinilersinneratigut anguneqarsinnaasarmat. Aammattaaq iliuuserisat atorneqarsinnaavoq, soorlu assersuutigalugu pinngitsaaliissummik qiteqummik sukaterussinermi tamanna annikinnerusumik akuliunertut iliuuserisaammatt.

§ 23-imi *sernissuilluni sukaterussinermut* maleruaqqusaq ilanngunneqarpoq. Taamaaliornikut pinngitsaaliissummik iliuseqarnek imatut paasineqassaaq napparsimasup siunertarinni-saminik imminut annertuumik ulorianartorsiortinnissaanut illersorniarlugu iliuserisatut.

Ullumikkut ima pisoqartarpoq napparsimavimmi sulisut nakkutilliiuaannartarlutik, tassunga ilanngullugu napparsimasup imminut toqunnissaanut imaluunniit napparsimaqatiminik ajoqusiinissaanik pinngitsoortitsiniaalluni eqqannguaniittarlutik. Taamatut periuseqarnek inuup nammineersinnaassuseqarneranut akulerunnertut taaneqarsinnaasoq, inatsimmi periarfissiissutigineqarpoq § 24 *inummi immikkut nakkutiginninneq*. Inummik immikkut nakkutiginninneq nakorsap, napparsimasumit misissuereernerme kingornatigut, aalajangersinnaavaa.

Ullumikkut aammattaaq pisoqartarpoq napparsimasup isumannaatsuutinnissaa siunertarlugu nalilerneqartarluni *immikkoortorta qarfimmi matut parnaarneqarnissaat*. Taamatut periuseqarnek inuup nammineersinnaassuseqarneranut akulerunnertut aammattaaq taaneqarsinnaavoq, tamanna inatsimmi § 26-imi immikkut periarfissiissutigineqarpoq.

Tarnimikkut napparsimasut imminut eqqiluisaarnissaminnut pisariaqartumik isumaginnissinnaangitsut soorlu asattornermik pillugit, periarfissaliisoqarpoq taamatut *imminut eqqiluisaarnissap* pinngitsaaliissummik atuinnikkut ingerlanneqarsinnaasoq, tak. § 27.

2.7.2 *Siunnersuut matumani pineqartoq, tak. kapitali 6 §§ 21-31*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.8 Allagarsianik/nassiussarsianik, ininik napparsimasut uninngaviinik, pigisanik timilu satsillugu misissuisarneq kiisalu pigisanik arsaarinnissuteqartarnek suujunnaarsitsisarnerlu.

2.8.1 *Inatsit atuuttoq*

Inatsimmi § 29-mi napparsimasup allagarsiaanik misissuinissamut, napparsimavimmi inaanik pigisaanillu misissuinissamut aammattaaq timaa satsillugu misissuinissamut piginnaatitsisoqarpoq. Pigisanik arsaarinnissuteqarnek aamma atortunik il.il. suujunnaarsitsisinnaaneq, inatsit naapertorlugu taamatutaaq inatsimmi namminerme malittarisassaliuunneqarpoq.

2.8.2 *Siunnersuut matumani pineqartoq, tak. kapitali 7 § 32*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.9 Pinngitsaaliissutinik atorneqartunik allattuisarneq aamma pinngitsuugassaangitsumik nalilersueqqinneq

2.9.1 *Inatsit atuuttoq*

Inatsisissatut siunnersuummi § 30, imm. 1 naapertorlugu pinngitsaaliinnikkut iliuseqarnerit suugalulluunniit tamarmik inatsimmi aalajangersakkat atuuttut tunngavigalugit immikkoor-

tortaqarfimmi pinngitsaaliissutit atorneqartut pillugit nalunaarsuiffimmut, kiisalu iliuuserisaq aamma tamatumunnga pissutigisaaq suunersut ilanngullugit, nalunaarsorneqassapput.

Nalunaarsuineq pisariaqarpoq napparsimasut ataasiakkaat inatsisitigut illersugaanerat eqqarsaatigalugu, soorlu assersuutigalugu naammagittaalliutit suliarineqarnerannut atatillugu. Taamatutaaq pinngitsaaliissummik atuisarnerit pillugit inuiaqatigiinni kisitsisitigut paasissutissanik pigisaqarnissamut nalunaarsuineq iluaqutaavoq. Pinngitsaaliissummik iliuitsit qitiusumik nalunaarsorneqarnerat napparsimasut inatsisitigut illersugaanerannut toqqammavissat pingaernerit ilagaat. Nalunaarsuineq sammisamut tunngatillugu nakkutilliinissamut aamma nakkutiginninnissamut tunngaviususaaq.

§ 31 Naapertorlugu Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaaneq pisussaavoq nakkutigissallugu, pinngitsaaliissummik iliuuseqarnerit inatsimmi periarfissalerneqartut pisariaqartitsisoqarnera sinnerlugu atorneqannginnissaat. Tamatumunnga atatillugu nakorsaanerup piffissatut killiliussaasut tunngavigalugit nakkutigissavai nammineersinnaajunnaarsitaanermut aamma sernissuiniarluni aamma pinngitsaaliissummik sukaterussinermut piunasaqaataasut suli eqquutsinneqarnissaat nakkutigissavaa. Napparsimasooq aamma napparsimasunut siunnersortaasooq nammineersinnaajunnaarsitaanerup atuutiinnarnissaa pillugu aalajangernermik ilisimatinneqassapput.

Danskit tarnimikkut napparsimasut pillugit inatsisaanni ullup unnuallu ingerlanerani pingasoriarluni nalilersueqqittoqartarpoq. Kalaallit Nunaani tarnimikkut napparsimasut amerlanngitsut Dronning Ingridip Napparsimavissuani tarnikkut nappaatilinnut Immikkoortortaqarfianni uninngasarmata, Danmarkimi pissutsinut naleqqiullugu napparsimasut ataasiakkaat qaninnerusumik attaveqarfigineqarput. Tamanna tunngavigalugu ulloq unnuarluni ataasiarluni takusaaqqittoqartarnissaa naammattutut nalilerneqarpoq. Taamatutaaq Danmarkimi tarnimikkut napparsimasut pillugit inatsimmi piunasaqaateqarpoq nalileeqqinneq tarnip nappaataanut nakorsamit, tarnikkut nappaatilinnut immikkoortortaqarfimmi napparsimasup uninngaviani sulusuunngitsumik, ingerlanneqartassasooq, taamaaliornikkut qulakkeerniarlugu attuumassuteqanngitsumik naliliinissaaq. Kalaallit Nunaanni Dronning Ingridip Napparsimavissuani tarnikkut nappaatilinnut Immikkoortortaqarfianni tarnip nappaataanut nakorsamik taamaallaat atorfeqartoqarmat Kalaallit Nunaanni tamatumunnga assingusumik attuumassuteqanngitsumik naliliisarnissamik piunasaqaateqarnissaaq periarfissaanngilaq.

2.9.2 *Siunnersuut matumani pineqartoq, tak. kapitali 8 §§ 33-34*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.10 Napparsimasunik siunnersuisartut

2.10.1 *Inatsit atuuttoq*

Inatsit malillugu pinngitsaaliissummik unitsinneqartunut, pinngitsaaliissummik uninngatinneqartunut imaluunniit pinngitsaaliissummik nakorsarneqartunut, angerlartinneqarnerup kingor-

natigut pinngitsaaliisummik malinnaaffigineqartunut, pinngitsaaliisummik sukaterunneqartunut, timi atorlugu pissaanermik atuineramik pineqarsimasunut, sernissuiniarluni sukaterunneqarsimasunut, immikkut nakkutigineqartunut kipisuitsumik nalunaaquttap akunneri 24-t sinerlugit atuuttuni, aammattaaq § 32, imm. 1, naapertorlugu immikkoortortaqarfimmi matut paarnaarneqarnerannut atatillugu taamatut pineqartunut tamanut napparsimasumik siunnersuisoqartitsisoqassaaq.

Napparsimasumik siunnersuisoq napparsimasumik ilitsersuissaaq aamma siunnersuilluni napparsimavimmut unitsinneqarnermut, napparsimaveqarfiup napparsimaviini uninnganermut aamma nakorsartinnermut atatillugu, kiisalu napparsimasoq naammagittaalliuteqassappat tamatuminnnga aallartitsinissamut aamma naammassinninnissamut atatillugu ikiuissalluni. Napparsimasumik siunnersuisup atuuffia aamma pisinnaatitaaffii inatsimmi §§ 32, 34, 35 aamma 36-mi sukumiisumik nassuiaatigineqarput.

Toqqaanermut ingerlatseriaaseq inatsimmi § 33-mi takuneqarsinnaavoq.

2.10.2 Siunnersuut matumani pineqartoq, tak. kapitali 9 §§ 35-40

Siunnersuummi inatsisitigut pisinnaatitaaffiit atuuttut ingerlateqqinneqarput, taanna Inatsisartut Inatsisaat nr. 12, 3. juni 2015-imeersoq aqutugalugu kingullermik allannngortinneqarpoq. Siunnersuummi erseqqissaatigineqarput napparsimasumik siunnersuisumik toqqaasoqassasoq pissaaneq atorlugu nakorsaammik eqqissisaatitortitsisoqartillugu.

2.11 Ilisimatitsineq aamma naammagittaalliornissamut ilitsersuineq il.il.

2.11.1 Inatsit atuuttoq

Nammineersinnaajunnaarsitaanerup aallartinnginnerani aamma pinngitsaaliisummik iliuuseqarnerup allap atorneqalinnginnerani maleruaqqusaq pingaarneq tassaavoq napparsimasup ilisimatinneqarnissaa, pinngitsaaliissutip atorneqarniartup suuneranik, qanoq ittuuneranik, tungavigisaasumik aamma siunertaasumik. Napparsimasoq iliuuserisap naammagittaalliutigineqarsinnaanera pillugu tamatigut ilitsersorneqartassaaq.

2.11.2 Siunnersuut matumani pineqartoq, tak. kapitali 10 §§ 41-45

Siunnersuummi inatsisitigut pisinnaatitaaffiit atuuttut ingerlateqqinneqarput.

Tarnimikkut nappaatilinnik nammineersinnaajunnaarsitsineranut allatigullu pinngitsaaliisummik iliuuseqarnermut atatillugit ilisimatitsineq maalaaruteqarsinnaanermillu ilitsersuineq pillugit Namminersorlutik Oqartussat nalunaarutaat nr. 16, 2. december 2013-imeersup atorunnaarsinneqarnerata kingunerisaanik, aalajangersakkat arlallit nalunaarummiittut inatsisissatut siunnersuummut nuunneqarput. Inatsimmit toqqaannartumik maannakkut ersersinneqarpoq napparsimasup ilisimatinneqarnissaa, tassa naammagittaalliut qanoq annertutigisumik kinguartitsisoqarsinnaaneranut sunniuteqarnerisooq, tak. inatsisissatut siunnersuummi § 41, imm. 1. Taamatuttaaq inatsimmi maannakkut ersersinneqarpoq napparsimasoq piumasaqaateqarnini

naapertorlugu Tarnimikkut Nappaatillit Maalaarutaannik Aalajangiisartunut naammagittaalliornissamut periuseq pillugu ilitserorneqassasoq.

Ilisimatitsinissaq pillugu aalajangersagaq kapitali 2-mut aalajangersakkanut nalinginnaasunut tunngasunut nuunneqarpoq.

2.12 Naammagittaalliornissamut periarfissaq aamma eqqartuussivitsigut misiliineq

2.12.1 Inatsit atuuttoq

Tarnimikkut Nappaatillit Maalaarutaannik Aalajangiisartut naammagittaalliutitut suliaasangortinneqartunut aalajangiisartuupput, tamatumani pineqarput; napparsimavimmut pinngitsaaliissummik unitsitsineq, napparsimavimmi pinngitsaaliissummik uninngatitsineq, oqqunneqarneq, pinngitsaaliissummik nakorsarneqarneq, napparsimavimmit angerlartinneqareernerup kingoratigut pinngitsaaliissummik malinnaaffigineqarneq § 17 tunngavigalugu, pinngitsaaliissummik sukaterussineq, timi atorlugu pissaanermik atuineq, sernissuiniarluni sukaterussineq, immikkut nakkutiginninneq, kipisuitsumik nalunaaquttap akunneri 24-t sinnerlugit siviussuseqartut aammattaaq immikkoortortaqaarfimmi matunik parnaarsuinerit.

Aalajangiisartut tassaapput eqqartuussissuserisumik siulittaasoqartut. Eqqartuussissuserisoq pineqartoq napparsimaveqarfimmut attuumassuteqqartuussanngilaq, taamaalinikkut politikikkut attuumassuteqqannginneq qulakkeerneqassaaq. Taassuma saniatigut aalajangiisartunut ilaasortaapput Nunatsinni Nakorsaaneqarfimmit sinniisuutitaasoq aammattaaq tarnimikkut eqqarsartaatsimikkullu nappaateqartut peqatigiiffiannit sinniisuutitaasoq.

Ilaasortat Peqqissutsimut Ilisimatusarnermullu Naalakkersuisumit toqqarneqassapput ilaasortanut sinniisussat taamatuttaaq taassuma toqqassavai. Toqqagaaneq ukiuni sisamani atuutisaaq aamma toqqaagaaqqittoqarsinnaavoq. Suliata ataasiakkaat oqaluuserineqarneranni aamma aalajangiiffigineqarneranni aalajangiisartut ilitserorneqarnissaminnut attuumassuteqqanngillat.

Inatsimmi § 41, imm. 2 naapertorlugu Nunatsinni Nakorsaaneqarfik allatseqarnikkut isumaginnittussatut toqqarneqarpoq.

Pinngitsaaliissummik iliuseqarnerit tamarmik Kalaallit Nunaanni Eqqartuussivimmut ingerlateqqinneqarsinnaapput.

2.12.2 Siunnersuut matumani pineqartoq, tak. kapitali 11 §§ 46-49

Siunnersuummi inatsisitigut pisinnaatitaaffik atuuttoq ingerlateqqinneqarpoq, taanna Inatsisartut Inatsisaat nr. 12, 3. juni 2015-imeersoq aqqutigalugu kingullermik allanngortinneqarpoq.

Siunnersuummi erseqqissarneqarpoq pissaanermik atuilluni eqqissisaammik nakorsaaitortit-sineq aammattaaq Tarnimikkut Nappaatillit Maalaarutaannik Aalajangiisartunut saqqummiun-neqarsinnaasoq.

Taamatuttaa Tarnimikkut Nappaatillit Maalaarutaannik Aalajangiisartut aalajangiineri pillu-git naammagittaalliutit eqqartuussivinnut ingerlateqqinnerat immikkut pilertortumik misilii-nissamut periarfissaqartitsinermit ilaatinneqartut erseqqissaatigineqarput, pinerluttulerinermi inatsimmi kapitali 28 naapertorlugu.

2.13 Oqaaseqatigiinnik aqqissuussinnerit

Soorlu taaneqartutut siunnersuummi tarnimikkut nappaatilinnik nammineersinnaajunnaarsitsi-neq allatigullu pinngitsaaliissummik iliuseqarneq pillugu Inatsisartut inatsisaanni aalaja-ngersakkat arlallit ingerlateqqinneqarput. Taamaattorli siunnersuummi oqaaseqatigiinnik aq-qissuussisoqarpoq aamma naleqqussaasoqarluni, tamatumani siunertarineqarpoq inatsisip i-marisaataa erseqqinnerulernissaa aamma paasiuminarnerulernissaa.

3. Pisortanut aningaasaqarnikkut aamma allaffissornikkut kingunerisassai

Siunnersuutip pisortanut aningaasaqarnikkut aamma allaffissornikkut kinguneqarnissaa naat-sorsuutigineqanngilaq, siunnersuut tunngavimmigut tassaamat maannakkut tarnimikkut napparsimasunik nakorsaanissamut neqeroorutininik ingerlatsitseqqinneq, tamatuma malitsigi-saanik naatsorsuutigineqanngilaq missingersuutitut ilanngunneqareersimanngitsunik aningaa-sartuuteqarnissaaq.

4. Aningaasaqarnikkut aamma allaffissornikkut inuussutissarsiuutinik ingerlatsisunut ki- ngunerisassai

Siunnersuutip inuussutissarsiuutinik ingerlatsisunut aningaasaqarnikkut aamma allaffissornik-kut kinguneqarnissaa naatsorsuutigineqanngilaq.

5. Avatangiisinut, pinngortitamut aamma innuttaasut peqqissusiannut kingunerisassai

Siunnersuummi tarnimikkut napparsimasut ikiorneqarnissaat annertunerusumik periarfissiis-sutigineqarpoq, taakku naak nakorsartinnissamik pisariaqartitsigaluarlutik namminneq ikior-neqarnissamut ujartuinissamut sapertut imaluunniit tamatuma pisariaqarneranik akuerinnissin-naanngitsut.

Siunnersuutip avatangiisinut imaluunniit pinngortitamut malunnaateqartumik allatigut kingu-neqarnissaa naatsorsuutigineqanngilaq.

6. Innuttaasunut kingunerisassai

Siunnersuut tarnimikkut napparsimasut nammineersinnaajunnaarsinneqarsinnaanerannut aam-ma allatut pinngitsaaliissummik iliuseqarfigineqarsinnaanerannut piginnaatitsivoq. Aallaavi-

gineqarpoq pinngitsaaliisummik atuinissamik nakorsaaneq aalajangiisartuussasoq. Taamaatorli Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup saniatigut nakorsaq alla, nakorsaanerup peqannginnerani, tamanna pillugu aalajangiisinnaavoq. Taamaattoqarsimappat tamatuma kingornatigut sapinngisamik piaarnerpaamik aalajangiineq nakorsaanermit akuersissutigineqassaaq.

Tamatumani siunertarineqartoq tassaavoq tarnimikkut napparsimasut pisariaqartumik nakorsarneqarnissaat, sulisutigut isumalluutit qanoq ittuuneri apeqqutaatinnagit, tassa piffissami tassanerpiaq Dronning Ingridip Napparsimavissuani tarnikkut nappaatilinnut Immikkoortorta qarfianniittut.

Napparsimasut inatsisitigut isumannaatsuunissaat napparsimasunik siunnersuisoqarnikkut, naammagittaalliutit suliarineqartarnerisigut aamma eqqartuussivikkut misiliinissamik periarfissatigut atuutereersutigut qulakkeerneqarpoq.

7. Sunniutaasussat allat malunnaateqarluartut

Siunnersuutip allatigut malunnaateqarluartumik sunniuteqarnissaa naatsorsuutigineqanngilaq.

8. Oqartussaasunik aamma kattuffinnik il.il. tusarniaaneq

Siunnersuut 2. oktober 2018 tusarniaanermut nittartakkami uani www.naalackersuisut.gl tamanut saqqummiunneqarpoq, kingusinnerpaamik tusarniaanermut 2. november 2018 akissuteqarfissalerlugu.

Tusarniaanermut akissuteqaatit tamarmik peqqaarnerminni allanneqarnerattut Inatsisartuni ataatsimiititaliamut suliarinnittumut ilanngullugu nassiunneqassapput.

Aallaqqaasiut

Matuma kinguliani tusarniaanermut akissuteqaatit aamma allannguutissatut siunnersuutit tiguneqarsimasut sammineqarput.

Tusarniaanermut akissuteqaatit tamakkerlugit allaqqinneqarput uingasumik naqinnilerlugit aamma ilanngunneqarput Naalackersuisut taakkununga Naalackersuisut oqaaseqaataat. Tusarniaanermut akissuteqaatini innersuussutit tusarniaanermi atukkat uteqqippaat.

Siunnersuut piffissami uani 2. oktobarimiit 2018 2. novembarimut 2018 tusarniaaffigineqartuni makkunani tusarniaassutigineqarpoq:

Namminersorlutik Oqartussani naalackersuisoqarfimmi tamani

Kommunini tamani

Nunatsinni Nakorsaaneqarfimmi

Nunatsinni Eqqartuussivinni
 Nunatsinni Eqqartuussisuuneqarfimmi
 Kalaallit Nunaanni Politimestereqarfimmi
 Peqqinnissamut aamma Pitsaaliuinermut Aqutsisoqarfimmi
 Dronning Ingridip Napparsimavissuani tarnikkut nappaatilinnut Immikkoortortaqarfik, Nuuk
 Tarnimikkut Nappaatillit Maalaarutaannik Aalajangiisartuni
 Tarnimikkut Nappaatillit Peqatigiiffianni, Sugisami
 Nunatsinni Meeqqat pisinnaatitaaffii pillugit sullissivimmi, MIO-mi
 Kalaallit Nunaanni Nakorsat Peqatigiiffianni
 PK/PPK
 Sundheds- og Ældreministeriet
 Justitsministeriet
 Afdeling R, Aarhus Universitetshospital (Psykiatrien i Region Midtjylland)

Tamakku saniatigut uku tulluuttut tusarniaanermut kajumissaarneqaratik akissuteqarsimapput:

Tilioq – Innarluutillit oqaaseqartartoqarfiat
 Institut for Menneskerettigheder

Tusarniaassuteqarnermi akissuteqaatit 13-nit tiguneqarput taakkunannga oqaaseqaateqanngitsut tassaallutik:

Inuussutissarsiornermut Nukissiuuteqarnermullu Naalakkersuisoqarfik, Aningaasaqarnermut Sulisoqarnermullu Aqutsisoqarfik, Aatsitassanut, Suliffeqarnermullu Naalakkersuisoqarfik, Kommuneqarfik Sermersooq, Sundheds- og Ældreministeriet.

Tusarniaassuteqarnermut akissuteqaatit siunnersuummut oqaaseqaatitaqartut matuma kingulianiittut tassaapput:

Kalaallit Nunaanni Politimesteri, Peqqissutsimut Pitsaaliuinernullu Aqutsisoqarfik, Tarnimikkut Nappaatillit Maalaarutaannik Aalajangiisartut, Tarnimikkut Nappaatillit Peqatigiiffiat, Sugisaaq, Nunatsinni Meeqqat pisinnaatitaaffii pillugit sullissivik, MIO, Tilioq – Innarluutillit oqaaseqartartoqarfiat, Institut for Menneskerettigheder, Qeqertalik Kommune aamma Nunatta Eqqartuussisuuneqarfia.

Kalaallit Nunaanni Politimesterimit tusarniaanermut akissuteqaat

Kalalaallit Nunaanni Politiit maluginiarpaat Kalaallit Nunaanni Politiit annertunerusumik suliassaqartinneqalersimannngitsut imaluunniit piginnaaneqalersinneqarnatik. Taamaattorli oqaaseqaatigiit " Kalaallit Nunaanni Politimesterip Danmarkimilu Inatsisinik Atuutsitsinermit Ministereqarfiup akuersinerisigut politiit..." ukunani §§ 9,11 aamma 19 allanngortinneqartariaqarput, taamaallutik Kalaallit Nunaanni Pinerluttulerinermi Inatsimmi § 61-imut naleqquttunngorlugit, taanna malillugu taamaallaat justitsiministeri politiinik suliassiisinnaammat.

Siunnersuummi matumani siusinnerusukkut inatsisip § 29-a allanngortinnagu § 30-tut ingerlateqqinneqarpoq. Imm. 3-mi allanneqarpoq pigisanik nakorsaaneq "arsaarinninnaasoq". Taamatut oqaasiliorneq tulluannilaq tassami immaammat taamaallaat politiit pigisani arsaarinnissinnaapput. Taanna allanngortinneqartariaqarpoq assersuutigalugu "paarineqassasut" imaluunniit oqaaseqatigiit allanik attuumassuteqanngitsunik. Taassuma saniatigut Kalaallit Nunaani Politiinit politiit suliassaannut tunngatillugu kissaatigineqarpoq aalajangersakkami tassani eqqornerusumik oqaaseqatigiiliortoqarnissaa. Tamanna tunngavigalugu siunnersuutigineqarpoq, tassa § 30, imm. 3-mi naggat kingulleq imatut oqaasertalerneqassasoq: "Atortut il.il. napparsimasumit pigineqartut inatsisinik nalinginnaasunik unioqutitsisumik, (...) nakorsaanermik politiinut tunniunneqassapput."

Aalajangersakkamut tassunga oqaaseqaatini iluaqutaasumik ersersinneqarsinnaavoq, politiit suliassat taamaattut suliarissagaat pinerluttulerinermi suliassatut allatut, taamaaliornikkut erseqqissarneqassaaq soorlu assersuutigalugu eqqartuussisutigut ingerlatitsisoqassaaq tamanna pisariaqarpat.

Akissuteqaat:

Naalackersuisut tusaatissatut tiguaat oqaaseqatigiit "Kalaallit Nunaanni Politimesterip Danmarkimilu Inatsisinik Atuutsitsinermut Ministereqarfiup akuersinerisigut (...)

siunnersuummi § 9, imm. 3, § 11, imm. 2 aamma § 19 [all. maanna § 10, imm. 3, § 12, imm. 2 aamma § 20-mit erseput] ilumoortumik allanngortinneqartariaqarpoq, taamaalilluni aalajangiinissamut piginnaatitsissummik aalajangiinissamut Kalaallit Nunaanni Pinerluttulerinermi Inatsimmi § 61, imm. 2-imi allassimasunut tulluartunngorlugu.

Malugineqassaaq maleruaqqusat sukumiinerusut maannakkut nalunaarutini aalajangersarneqarsimapput aalajangersakkat taaneqartut tunngavigalugit, taakkunani politiit suliassat sukumiisumik nassuiaatigineqarlutik. Soorlu assersuutigalugu Namminersorlutik Oqartussat nalunaarutaanni nr. 17, 2. december 2013-imeersumi § 7-imi pinngitsaaliissummik napparsimavimmut unitsitsinerit ingerlanneqarnissaat pillugu, tassa politiit ilaatigut nakkutigissagaat nakorsap uppersaataani paasissutissat pinngitsaaliissummik unitsitsinermut tunngaviusut pisariaqartut ilanngunneqarsimassasut, aamma § 8-imi allassimavoq politiit Dronning Ingridip Napparsimavissuani tarnimikkut nappaatilinnut immikkoortortaqarfik isumaqatigiissuteqarfigisagaat, pinngitsaaliissummik sumi unitsitsisoqarnissaa pillugu, piffissaq pinngitsaaliissummik unitsitsinissap aallartinneqarnissaa pillugu, imaangippat unitsitsinissap ingerlaannartumik aallartinneqarnissaa pisariaqarluni.

Naalackersuisut paasinninnerat naapertorlugu aalajangersakkat taamatut ittut pisariaqartippaat peqqinnissaqarfiup aamma najukkani politiit qanimut suleqatigiinnissaat aamma oqaloqatigiittarnissaat.

Naalackersuisut isumaat naapertorlugu Kalaallit Nunaanni Pinerluttulerinermi Inatsimmi § 61, imm. 2-mi erseqqissumik allassimannilaq, immikkuualuttuni qanoq annertutigisumik politiit

suliassaat Justitsministeriaqarfimmit akuersissutigineqartassanersut. Isumaqarnarpoq Justitsministeriaqarfimmit sapinngisamik annertunerpaamik politiit peqataatinneqassasut suliassanik tunniussinissaq sioqqullugu, aamma politiinut taamatuttaarlu Peqqissutsimut Naalakkersuisoqarfimmut erseqqissaatigineqassasoq politiit qanoq ittumik pisinnaatitaanersut namminneq aalajangersaanissaminnut piumasaqaatinik sukumiinerusunik peqqinnissaqarfimmit suleqateqarnermi piumasaqaataasunut aamma pissutsinut tunngatillugu.

Matuma siulianiittut tunngavigalugit oqaaseqatigiit "*Kalaallit Nunaanni Politimesterip Danmarkimilu Inatsisinik Atuutsitsinermut Ministereqarfiup akuersinerisigut (...)*" uaniittut § 9, imm. 3, § 11, imm. 2 aamma § 19 [all. maanna § 10, imm. 3, § 12, imm. 2 aamma § 20-mit erserput] imaalillugit "*(...) Danmarkimi Justitsministeriap akuersissuteqarneratigut aalajangersarneqassapput.*"

Naalakkersuisut isumaqatigaat siunnersuummi § 30, imm. 3 [All. maanna § 32, imm. 3-mit erserput] allanngortinneqartariaqartoq. Taamaattumik § 30, imm. allanngortinneqarpoq imaalillugu: "*Nakorsaaneq aalajangersinnaavoq nakorsaatit, aanngajaarniutit aamma atorlut navianartut imm. naapertorlugu misissuinermi nassaarineqartut paarineqarnissaannik. Nakorsaaneq aalajangersinnaavoq nakorsaatit, aanngajaarniutit aamma atorlut navianartut imm. naapertorlugu misissuinermi nassaarineqartut paarineqarnissaannik. Atortut il.il. napparsimasumit pigineqartut inatsisinik nalinginnaasunik unioqqutitsisumik, tamatumunnga ilanngullugit aanngajaarniutit pillugit inatsimmik aamma sakkut pillugit inatsimmik, nakorsaanermik politiinut tunniunneqassapput.*" Taamatuttaaq aalajangersakkamut oqaaseqaatit allanngortinneqarput siunnersuutigisaaq malillugu.

Peqqinnissamut aamma Pitsaaliuinermit Aqutsisoqarfimmit tusarniaanermut akissuteqaat:

Ataatsimut isigalugu Peqqinnissamut Aqutsisoqarfiup maluginiarpaat tarnimikkut napparsimasut eqqartuunneqarsimaneq tunngavigalugu nakorsarneqartut nammineq immikkut malittarisassaliuunneqarsimanngitsoq, kisianni taamaallaat taaneqarluni tarnimikkut napparsimasut eqqartuunneqarsimasut Danmarkimut nuunneqarsinnaasut, tak. inatsisissatut siunnersuummi § 10, imm. 2. Nuussisinnaanermut periarfissap tamatumu Peqqinnissamut Aqutsisoqarfiup inatsimmi annertunerusumik malittarisassaliuunneqarnissaa kissaatigaa. Peqqinnissaqarfimmit malugeqquneqarpoq napparsimasut eqqartuunneqarsimaneq tunngavigalugu nakorsarneqartut amerliartornerat, tassa Danmarkimi R3-imi inissamik amigaateqartoqarnera pissutigalugu, taamaattumik inuit eqqartuunneqarsimasut paarnaarussaannissaannut taarsiullugu inissinneqarsimasut Dronning Ingridip Napparsimavissuani tarnikkut nappaatilinnut Immikkoortortaqarfimmi nakorsarneqartut.

Nakorsaatilik toqqaanermut atatillugu maleruagassiornermi tassa tassanngaannartumik nakorsaatitortitsinermut atatillugu peqqinnissamut aqutsisoqarfik isumaqarpoq arlalinnik

naleqqutinngitsoqartoq. Nalunaarneqarpoq nakorsaatit atorineqartut sapinngisamik ikinnerpaanik saniatigut sunniuteqartartuussasut. Tamatumunnga tunngatillugu oqaatigineqassaaq kiffaanngissuseqartumi nakorsaatinik toqqaasinnaaneq tunngavigalugu nakorsap akisussaaffigigaa, saniatigut sunniutaasartut pisorpiami pitsaanerpaamik sunniuteqartussat saniatigut sunniutaasartunut tamatigut naleqqiussisarnissaq. Tassangaannarmik nakorsaatitortitsineq tunngaviusumik tamatigut pisarpoq ulorianarsinnaasutut ilisarnaateqarneq tunngavigalugu, taamaattumik nakorsaatip sunniutaa aammattaaq apeqqutaasarpog. Taamaattumik inassutigineqarpoq nakorsaatitortitsinermi pisorpiaq tunngavigalugu nakorsap nakorsatut naliliinera tunngavigineqassasoq. Peqqinnissamut Aqutsisoqarfiup paragrafinut ataasikkaanut oqaaseqaatigisai imaapput: §1, imm. 2:

"...nakorsaanerup, nakorsap unitsitsisup isumasioqatigineratigut aalajangissavaa, pinngitsaaliissummik unitsitsinissap qanoq pisariaqartiginera." Peqqinnissamut Aqutsisoqarfik isumaqarpoq oqaaseq "nakorsaanerup" erseqqissarneqartariaqartoq. Nunap immikkoortuani nakorsasup nalilersortarpaa pinngitsaaliissummik napparsimavimmut unitsitsinissamut ilisarnaatit piunersut. Nakorsaq nakorsamut pigaartuusumut saaffiginnittarpoq, taanna amerlanertigut tassaasarpog tarnimikkut napparsimasunut nakorsaq immikkut ilinniarsimasog, Dronning Ingridip Napparsimavissuani tarnikkut nappaatilinnut Immikkoortortaqarfiani sulisumut, taannalu aalajangiisarpoq napparsimavimmut pinngitsaaliissummik unitsitsisoqarnissaanik tassunga ilanngullugit sumi aamma qaqugu.

§8 aamma §9:

Peqqinnissamut Aqutsisoqarfiup erseqqissorinnigilaa kina napparsimavimmut pinngitsaaliissummik unitsitsinissamut aalajangiisuunersog. § 8, imm. 1, tunngavigalugu politiit napparsimavimmut pinngitsaaliissummik unitsitsinissap aallartinneqarnissaanik aalajangiisarput. § 8, imm. 2-mi aalajangersarneqarpoq napparsimavimmut pinngitsaaliissummik unitsitsineq taamaallaat ingerlanneqarsinnaasog nakorsamit nalunaarut tunngavigalugu, nakorsaq, Dronning Ingridip Napparsimavissuata tarnimikkut napparsimasunut immikkoortortaqarfiani atorfeqartuussanngilaq. § 9, imm. 2-mi aalajangersarneqarpoq Dronning Ingridip Napparsimavissuata tarnimikkut napparsimasunut immikkoortortaqarfiani nakorsaanerup pinngitsaaliissummik unitsitsinermut piunersaqaatit eqqortinneqarnerisut aalajangiiffigissagaa. Paragrafit matuma siuliani taaneqartut imminnut assortuutut ippit. Siunnersuutigineqarpoq nakorsaq napparsimavimmut unitsitsisup nalilissagaa pinngitsaaliissummik unitsitsinissamut ilisarnaatit eqqortinneqarneranik nalilissasoq. Tamatuma kingornatigut politiit isummerfigissavaat, namminneq nakorsamit allagartaq tunngavigalugu napparsimavimmut pinngitsaaliissummik unitsitsinermut peqataassanerlutik, tamatuma kingornatigut nakorsaanerup nalilissavaa, napparsimavoq napparsimavimmut unitsinneqassanersog.

§10:

Peqqinnissamut Aqutsisoqarfik isumaqarpoq § 10 erseqqippallaanngitsoq napparsimavimmi pinngitsaaliissummik uninngatitsinissap ingerlanneqarnissaanut piffissarititaasumut naleqqiussilluni. Imm. 1 tunngavigalugu napparsimasumik napparsimavimmi pinngitsaaliissummik uninngatitsineq pissaaq nakorsaanerup nalilerpagu pinngitsaaliissummik unitsitsinissamut ilisarnaatit pigineqarnersut. Imm. 3 tunngavigalugu napparsimavimmit angerlartinneqarnissamut, ulloq unnuallu siulliup ingerlanerani qinnuteqaat, saqqummiunneqarsimasoq nakorsaanermit nalilerneqassasoq kiisalu taassuma aalajangernera nal. akunnerisa 48-t qaangiutsinnagit ilisimatitsissutigineqassalluni. Erseqqinngitsutut ippoq napparsimasoq napparsimavimmi pinngitsaaliissummik uninngatinneqassanersoq pinngitsaaliissummik unitsitsinermut atatillugu imaluunniit pinngitsaaliissummik uninngatitsineq atsaat pissanersoq nakorsaaneq aalajangereerpat aamma tamanna napparsimasumut nalunaarutigineqareerpat.

§18, imm. 3:

Naleqatigiissorinangilaq napparsimavoq nakorsarneqarluni agginngitsoortoq politiinit aaneqarnissaa peqqinnissaqarfiullu napparsimaviisa ilaanni pinngitsaaliissummik nakorsaatitortikkiartorlugu. Poliitiit aallernissaat sioqqullugu eqqarsaatigineqartariaqarpoq nunap immikkoortuani tarnimikkut napparsimasunik nakorsaasartut napparsimasumik takusaassanersut, kiisalu nakorsaatiniq nakorsaaneq angerlarsimaffimmi ingerlallugu. Tamanna politiit ikiortigalugit pisinnaassaaq pisup uloriarnartutut ingerlalersinnaaneranut nalorninartoqarpat. Atsaat taamaattoqareerpat nakorsaaneq aalajangersinnaavoq, tak. § 18, imm. 3.

Akissuteqaat:

Inuit nakorsarneqartussanngorlugit eqqartuunneqarsimasut - § "tarnimikkut napparsimasut eqqartuunneqarsimaneq tunngavigalugu nakorsarneqartussanik" taaneqartartut – inatsisartut inatsisaanni atuuttumi, Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut Inatsisissaat nr. 24, 3. december 2012-imeersumi, toqqaannartumik ilaatinneqanngillat imaluunniit siunnersuummi matumani. Eqqartuunneqarsimasunik nakorsartinnissaq siunertaralugu Danmarkimut nuussinissamut atatillugu pisinnaatitsissut Kalaallit Nunaanni Pinerluttulerinermi inatsimmi § 157-imiippoq, tak. inatsimmi tassani kapitali 33. Taamaattumik eqqartuunneqarsimaneq tunngavigalugu tarnimikkut napparsimasunik nuussinissamut piginnaatitsissut pineqanngilaq, siunnersuummi § 10, imm. 2-mi [all. maanna § 10, imm. 4-mit erserpoq], napparsimasunik nunani allani nakorsarneqartussanngortitsinermi, tassa eqqartuussinikkut nakorsarneqarnissamik eqqartuussinissamut piginnaatitsissut eqqartuussiveqarfimmiimmat. Taamatuttaaq Justitsministeri pisussaavoq aalajangersakkanik aalajangersaassalluni tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuseqartarneq pillugit inatsisartut inatsisaanni aalajangersakkat tarnimikkut napparsimasut eqqartuunneqarsimaneq tunngavigalugu nakorsarneqartussanut qanoq annertutigisumik

atuutsinneqarnissaa pillugu, tak. pinerluttulerinermi inatsimmi § 263 a. Siunnersuutip § 1-iani immikkoortumik nutaamik ilanngussisoqarpoq, tassa ersersinneqarpoq napparsimasoq tarnimikkut napparsimasunut immikkoortorta qarfimmi uninngatinneqartoq, Kalaallit Nunaata avataani tarnimikkut napparsimasunut immikkoortorta qarfimmu matoqqasumut nuunneqarsinnaasoq, imaappat napparsimasoq avatangiisiminut ima ulorianartigisutut isigineqarluni, napparsimasup Dronning Ingridip Napparsimavissuani tarnikkut nappaatilinnut immikkoortorta qarfianni uninngatinneqarnissaa illersorneqarsinnaanngitsutut isigineqarpat. Tamatuma tarnimikkut napparsisunik nuussinissamut piginnaatitsissut erseqqissarpaa aamma assigilerpaa siunnersuummut oqaaseqaatini § 10, imm. 2-mut [all. maanna § 1, imm. 4-mit erserpoq] allassimareersut.

Aqutsisoqarfiup § 13, imm. 4-mut [all. maanna § 14, imm. 4-mit erserpoq] oqaaseqaatai, tassa pinngitsaaliissummik nakorsaatitortitsinermi nakorsaammik toqqaanermut tunngatillugu siunnersuummik allanngortitsitsinissamut pissutissaqartitsinngillat. Siunnersuummi erseqqissaatigineqarpoq nakorsaatit saniatigut sunniutigisartagaasa qanoq amerlatiginerat aalajangiisuunngitsoq, kisianni akerlianik nakorsaatit saniatigut sunniutaasa peruluutaasut qanoq amerlatiginerat. Nakorsaatit saniatigut annertuumik sunniutigisartagaasa ilanngunneqarneranni napparsimasoq nakorsartinnerup nalaani annertuumik persaqusersorneqarnissaanut illersorniarneqarpoq. Taamaalilluni § 13-imi [all. maanna § 14-mit erserpoq] ilanngunneqartup qulakkiissavaa nakorsaatit atorneqartut napparsimasunut sapinngisamik annikinnerpaamik akornusiinissaat. Nakorsaatit saniatigut sunniutaannut sapinngisamik pitsaanerpaamik sunniuteqarnerannut naleqqiussineq piviusumik nakorsat suliatigut oqimaalutassavaat, kisianni nakorsaatit arlallit toqqarneqarsinnaaneranni siunnersuummi erseqqissaatigineqarpoq, pingaaruteqartoq tassaasoq nakorsaammi saniatigut sunniutaat *peruluutaasut* amerlassusiat; imaanngitsoq nakorsaatit saniatigut sunniutaasa *katillugit amerlassusiat*.

Aqutsisoqarfiup § 1, imm. 2-mut oqaaseqaataanut tunngatillugu: "Nakorsaanerup" nakorsaq tassaavoq uninngasunut immikkoortorta qarfimmi, napparsimasup uninngaffigisaani nakorsatut akisussaassuseqartoq. Taanna tassaasinnaavoq allaffissornermi nakorsaaneq kisianni taamaattuusariaqanngilaq. Tarnimikkut napparsimasunut immikkoortorta qarfimmi imaluunniit immikkoortorta qarfinni nakorsaaninngortinneqarsimasoq angalappat imaluunniit allamik pissuteqarluni peqanngikkallarpas, taava nakorsaq pisortap peqannginnerani pissutsit atuuttut tunngavigalugit immikkoortorta qarfimmi nakorsaanerugallassaaq, nakorsaanerup piginnaatinneqarnera, imaanngippat pisunut ataasiakkaanut tunngatillugu immikkut aalajangersaasoqarsimalluni. Aalajangiineq inatsisartut inatsisaat maannakkut atuuttoq tunngavigalugu "nakorsaanermit" aalajangerneqassappat, tamanna imatut paasineqassaaq nakorsaanerup pisinnaatitaanera allanut tunniunneqarsinnaanngitsoq, immikkoortorta qarfimmi nakorsanut appasinnerusumik inissisimasunut tassa nakorsaaneq sivikitsumik peqanngitsillugu, soorlu assersuutigalugu unnuakkut napparsimavimmu pinngitsaaliissummik unitsitsisoqassatillugu imaluunniit pinngitsaaliissummik

uninngatitsisoqassatillugu. Siunnersuummi matumani tulluanngitsoq taanna aaqqiiffigineqarpoq taamaaliornikkut aammattaaq appasinnerusumik inissisimasoq, nakorsat sulisut pigaartuusut nakorsaanerup peqannginnerani aalajangiisinaalerlutik, tamatuma pisariaqartillugu, tak. siunnersuutip § 5-ia [all. maanna § 6-mit erserpoq]. Aalajangersakkami tassani siunnersuutigineqarpoq nakorsaaneq sapinngisamik piaartumik aamma kingusinnerpaamik nal. akunneri 24 qaangiunneranni aalajangiineq pillugu isummissasoq. Innersuussutigineqarput siunnersuummut aalajangersakkat nalinginnaasut, immikkoortoq 2.3.2.

Aqutsisoqarfiup §§ 8 aamma 9-mut [all. maanna §§ 9-mit aamma 10-mit erserput] oqaaseqaataanut tunngatillugu: Tassa ilimagineqartariaqarmat inuup napparsimavimmut pinngitsaaliissummik unitsinneqarnissaminut akuttunngitsumik timini atorlugu pinaannissaa, taava piviusumik napparsimavimmut pinngitsaaliissummik unitsitsinissaq politiinut tunniunneqarpoq. Taamaattumik politiit aalajangiissapput napparsimavimmut pinngitsaaliissummik unitsitsinissap aallartinneqarnissaanut, tak. siunnersuummi § 8, imm. 1 [all. maanna § 9, imm.1-mit erserpoq], tamanna pissusissamisoorutut isigineqarpoq tassami tamatumunnga politiit ikiuuttussaammata.

Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup aalajangissavaa, napparsimavimmut pinngitsaaliissummik unitsitsinissamut piunnaasaqaaasut naammassineqarnersut, tak. siunnersuummi § 9, imm. 2. [all. maanna § 10, imm. 2-mit erserpoq].

Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup napparsimasumit tiguisussap, taamaalilluni inaarutaasumik piginnaaneqarpoq aalajangissallugu, napparsimasoq napparsimavimmut pinngitsaaliissummik unitsitaasut unitserneqassanersoq. Nakorsaaneq naliliinermit, nakorsamit aggersarneqarsimasumit naliliutigineqarsimasumit pituttugaanngilaq, tak. § 7, imm. 3. [all. maanna § 8, imm. 3-mit erserpoq] Tamanna § 9, imm. 2-mut [all. maanna § 10, imm. 2-mit erserpoq] oqaaseqaatini erserpoq.

Taamaalilluni nakorsaaneq napparsimavimmut pinngitsaaliissummik unitsitsinissaq naaggaarsinnaavaa aamma naaggaassallugu, nammineq napparsimavimmut pinngitsaaliissummik unitsitsinissamut atortussat imaluunniit piunnaaneqartut piunnaasaqaaatit, tak. § 6 [all. maanna § 7-mit erserpoq] aamma § 9, imm. 1 [all. maanna § 10 imm. 1-mit erserpoq], eqqortinneqarsimanngitsut nalileruniuk. Oqaaseqaatit siunnersuummik allanngortitsinissamut pissutissaqartitsinngillat, tassami matuma siulianiittut siunnersuummi aamma tamatumunnga oqaaseqaatini takuneqareersinnaammata. Oqaaseqaatini oqaatsit "nakorsaq napparsimavimmut unitsitsisoq" allanngortinneqarput imatut "nakorsaq aggersarneqarsimasoq", taamaalilluni piginnaasanik agguataarineq erseqqinnerulerpoq.

Aqutsisoqarfiup §10-mut [all. maanna § 11-mit erserpoq] oqaaseqaataanut tunngatillugu: Napparsimavimmi pinngitsaaliissummik uninngatitsinissaq piviusunngortinneqartussaassaaq

napparsimasoq tarnikkut nappaatilinnut immikkoortorta qarfimmi, nammineq piumasutsiminik imaluunniit pinngitsaaliissummik unitsitsineq aqqutigalugu uninngasooreerluni angerlartinneqarnissaminut qinnuteqartillugu. Napparsimasup qinnuteqarnerminut akissuteqarfigineqassaaq sapinngisamik piaarnerpaamik aamma qinnuteqarnerup saqqummiunneqarneranit naatsorsorlugu nal. akunnerisa 24-t ingerlaneranni, tak. § 10, imm. 3, naggat siulleq, [all. maanna § 11, imm. 2, naggat siulleq-mit erserpoq]. Imaappat napparsimasup (suli) siunnersuutip § 6-iani [all. maanna § 7-mit erserpoq] piunasaqaatit naammassisimappagit taava napparsimasoq napparsimavimmit angerlartinneqarnissaminut itigartinneqassaaq. Taamaattoqarpat taava napparsimasoq napparsimavimmi pinngitsaaliissummik uninngatinneqassaaq. Napparsimasunut ungasinngitsukkut pinngitsaaliissummik uninngatinneqalersimasunut pisariaqassaaq Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneq nakkutiginninnissamut piffissaqartinneqarnissaa, tassa nal. akunnerinik 24-nik sivisunerusumik isummerfigissammagu napparsimavimmi pinngitsaaliissummik unitsinneqarsimasoq uninngatinneqarnissaanut tunngatillugu. Nalinginnaasumik oqaaseqaatit immikkoortoq 2.4.1 innersuunneqarput, aammattaaq § 10-mut [all. maanna § 11-mit erserpoq] immikkut oqaaseqaatigineqartut.

Aqutsisoqarfiup §18, imm. 3-mut [all. maanna § 19, imm. 3-mit erserpoq] oqaaseqaataanut tunngatillugu: Inatsisartut Inatsisaanni piunasaqaatit killeqartut arlallit allattorneqarput, taaku eqqortinneqarsimassapput pinngitsaaliissummik malittarinnerup atorneqalinnginnerani. Nakorsarneqarneq »napparsimasup peqqissusianut pisariaqassaaq«, tamanna imatut paasineqassaaq, tassa nakorsaaneq tamatumunnga naliliinerminut naleqqiussilluni pingaartissavaa, nakorsarneqarneq unitsinneqarpat tamanna napparsimasup peqqissusianut qanoq kinguneqassanersoq. Tamatumunnga ilaapput piunasaqaatit kinaassusersiornertaqanngitsut.

Nakorsaaneq aalajangiineranut tarnikkut napparsimasunut napparsimaveqarfiup saniatigut sumiiffinni allani nakorsaasoqarnissaanut peqqusummik ilaqarsinnaanngilaq. Napparsimasut napparsimavimmit angerlartinneqareermik kingornatigut pinngitsaaliissummik malinnaaffigineqartussanngortinneqarsimasut, taamaalillutik angerlarsimaffimmini nakorsarneqarsinnaanngillat, napparsimasoq nammineq angerlarsimaffimminiikkaluarpalluunniit, tamatumunnga ilanngullugit angerlarsimaffittut neqeroorutit imaluunniit unnuisarfimmi il.il.

Aalajangersagaq killeqartumik atuutsinneqarfeqarsinnaammat aamma qaqutigunnaq atorneqartarluni, isumaliutigineqarsimavoq pinngitsaaliissummik malittarinninnermut maleruaqqusat inatsimmit peerneqarnissaat. Tamatuma assigisaanik danskit inatsisissatut siunnersuummik tusarniaassuteqarput, tassani ilaatigut pinngitsaaliissummik malinnaaviginninnermut maleruaqqusat peerneqarnissaat anguniarneqarluni, tamatumani tunngavigineqassaaq aalajangersakkap atorneqartarnera pillugu nalilersuineq. Tamatuma assinganik aallartitsisoqarsinnaavoq imaappat aalajangersakkap atorneqarnissaata pisariaqarunnaartutut nalilerneqarpat.

Tarnimikkut Nappaatillit Maalaarutaannik Aalajangiisartunit tusarniaanermut akissuteqaat:

Ataatsimoortumik isiginnilluni siunnersuummi suli nakorsap unitsitsisup aamma Dronning Ingridip Napparsimavissuani tarnikkut nappaatillit immikkoortortaqaarfianni nakorsaanerup tigusisussap akornanni erseqqissumik immikkoortitsisoqanngilaq, tassa tarnimikkut napparsimasunik nakorsaasarnermi nammineersinnaajunnaarsitsinermik aamma pinngitsaaliissummik atuinernik allanik aalajangiinermut tunngatillugu. Aalajangiisartut isumaqarput tulluurtuunngitsoq Dronning Ingridip Napparsimavissuanut pinngitsaaliissummik unitsitsinissap aallartinneqarnissanik aalajangiineq nakorsaq unitsitsisoq isumasioqatigereerlugu aalajangiineqassappat, tassa piumasarineqartut aamma atorineqartut eqqarsaatigalugit nalorninartoqalersinnaammat, ilumut pinngitsaaliissummik unitsitsineq attuumassuteqannginneq tunngavigalugu ingerlanneqarneris.

Aalajangiisartut siunnersuutigaat siunnersuummi nakorsap unitsitsisup aamma tarnimikkut napparsimasunut immikkoortortaqaarfimmi nakorsaanerup akornanni immikkoortitsisoqarnissaa, aammattaaq inatsimmi ersersinneqassasoq nakorsap unitsitsisup nakkutigissagaa inatsimmi napparsimavimmut pinngitsaaliissummik unitsitsinermut piumasagaataasut eqqortinneqarnerat, tamatumunnga ilanngullugit nakorsap misissuereerluni nappaatigisatut ilimagisaa, napparsimasut silaqassutsimigut qanoq inissisimaneq aamma pissutsit nakorsamit tapersiisut, tassa inatsimmi § 6, normu 1-imi (nakorsartittariaqarnermut ersiut) imaluunniit normu 2 (ulorianassutsimut ersiut) taakkua naammassineqarsimanersut, taamatuttaaq nakorsaaneq tigusisoq aalajangiissasoq, ilumut napparsimavimmut pinngitsaaliissummik unitsitsinissamut piumasagaatit naammassineqarsimanerannut tunngatillugu.

Inatsisissatut siunnersuummi siunnersuutigineqarpoq inatsimmi § 5 allanngortinneqassasoq imatut ilisillugu, piginnaatitsissut ilanngunneqassaaq pinngitsaaliissummik atuinissamut aalajangerneq tarnimikkut napparsimasunut immikkoortortaqaarfimmi nakorsamit allamit aalajangerneqarsinnaasoq, tassa nakorsaanerup peqannginnerani aamma nakorsaaneq piaartumik kiisalu kingusinnerpaamik nal. akunnerisa 24-t qaangiunnerini aalajangiineq pillugu isummissasoq.

Tarnimikkut Nappaatillit Maalaarutaannik Aalajangiisartut siunnersuutigaat aalajangersakkami taarsiullugu ilanngunneqassasoq, nakorsaanerup "pisariaqanngitsumik kinguarsaanertaqanngitsumik" aalajangiineq pillugu isummissasoq.

Tamatumunnga tunngavilersuutaasoq tassaavoq tarnimikkut napparsimasunik nakorsaasarnermi pinngitsaaliissummik atuinissamut piumasagaataavoq, akulerunnissamut taamak annertutigisumut aalajangiineq nammineersinnaajunnaarsitsineq aamma pinngitsaaliissummik allamik atuneq pillugit, aalajangiinerit tamatigut tarnimikkut napparsimasunut nakorsaasarnermi nakorsamit immikkut ilinniarsimasumit

aalajangerneqartarnissaat, kiisalu tarnimikkut napparsimasunut immikkoortorta qarfimmi akuttunngitsumik nakorsanik pigaartuusartunik atorfeqartoqartarmat, tarnimikkut napparsimasunut tunngatillugu immikkut ilisimasaqanngitsunik. Periarfissaliissut pilersinneqarpat tassa aalajangiinermik nakorsamit allamit aalajangiisoqarsinnaanngortitsilluni, kiisalu tamatumunnga ilutigitillugu ersersinneqarpoq nakorsaanerup aalajangiineq piaarnerpaamik akuerissagaa, tamannalu pissasoq aalajangiinerup kingornatigut kingusinnerpaamik nal. akunnerisa 24-t qaangiunnerisigut, taamaattoqarneratigut nalorninartoqalersinnaavoq tassa tarnimikkut napparsimasunut nakorsaasarnermi nakorsamit immikkut ilinniarsimasumit akuersineq nal. akunnerinut 24-nut qaninnerulernissaa akerlianik sapinngisamik piaartumik pilluni. Tamanna tarnimigut napparsimasup inatsisitigut illersorneqarneranik qasukkartitsinermik kinguneqarsinnaasutut Aalajangiisartut isigaat, taamaattumilli Aalajangiisartut siunnersuutigaat matuma siuliani allanneqartutut oqaaseqatigiit allannngortinneqarnissaat.

Siunnersuummi § 1, imm. 2-mut Aalajangiisartut oqaaseqatigaat napparsimavimmut pinngitsaaliissummik unitsitsinissamik aalajangiinerup kingornatigut nal. akunnerinik 48-nik kingusinnerpaamik piffissaliinissaq ilanngunneqassasoq, Dronning Ingridip Napparsimavissuani tarnikkut nappaatilinnut immikkoortorta qarfiannut nuussisoqarnissaanut, taamatuttaaq tamanna nalorninartoqalersinnaavoq nuussinerup nal. akunnerinut 48-nut qaninnerulersinnaaneranut imaanngitsoq piaarnerpaamik pinnani, tak. matuma siulianiittoq. Tamanna tunngavigalugu Aalajangiisartut siunnersuutigaat kingusinnerpaamik piffissarititaasoq oqaaseqatigiinnik ukuninnga "pisariaqanngitsumik kinguarsaanertaqanngitsumik".

Inatsimmut oqaaseqaatini siunnersuummut § 1, imm. 2-mut allassimavoq: "Naatsorsuutigineqarpat napparsimasup qanoq issusia tassanngaannartumik pilluni qaangiukkiartussasoq sivikitsuinnaassasorlu taava nuutsitsineq pissanngilaq." Inatsimmi taamatut piginnaatitsineq erseqqissorinannngilaq.

Siunnersuummut oqaaseqaatini § 3, imm. 3-5 allassimavoq Dronning Ingridip Napparsimavissuani tarnikkut nappaatilinnut immikkoortorta qarfianni nakorsaaneq "[...] taassuma tarnikkut nappaatit pillugit immikkut pisariaqartumik ilisimasaqarnissaa naatsorsuutigineqarmat [...]. Aalajangiisartunit tunngavigineqarpoq Dronning Ingridip Napparsimavissuani tarnikkut nappaatilinnut immikkoortorta qarfianni nakorsaanerup atorfinitsinneqassagaanni tarnimikkut napparsimasunut nakorsaasinnaanermut nakorsatut immikkut ilinniarsimasutut akuersissummik pigisaqartoqartussaavoq, taamaattumik Aalajangiisartut siunnersuutigaat inatsimmi oqaaseqaatit oqaasiliornermi atorineqartut assingusut atorineqassasut, taamaalilluni allanneqassaaq, tassa [...] tarnimikkut napparsimasunut nakorsaasinnaanermut nakorsatut immikkut ilinniarsimasutut akuersissummik pigisaqassaaq [...]"

Akissuteqaat:

Naalackersuisut siunnersuut manna aqqutigalugu napparsimavimmut pinngitsaaliissummik unitsitsinermik aalajangiinissamut kina inaarutaasumik piginnaatitaanersoq erseqqissarniarlugu misilippaat. Tamatuma kingunerisaanik ilaatigut oqaatsit aalajangersimannngitsut "Nakorsaq" inatsisartut inatsisaanni atuuttumik § 6, imm. 2-mi allanngortinneqarpoq imatut "Nakorsaq aggersarneqarsimasoq", siunnersuummi § 7, imm. 2-mi [all. maanna § 8, imm. 2-mit erserpoq]. Naalackersuisut isumaqatigaat Dronning Ingridip Napparsimavissuani tarnikkut nappaatilinnut immikkoortoqarfianni nakorsap unitsitsisup aamma nakorsaanerup assigiinngissutaat sulii erseqqissarnerusariaqartoq, taamaalilluni qularneq pilersinneqassanngimmat napparsimavimmut pinngitsaaliissummik unitsitsinermut aalajangiinermut kina aalajangiisuunersoq. Taamaattumik siunnersuummut oqaaseqaatini oqaatsit "nakorsaq unitsitsisoq" allanngortinneqarput imatut "nakorsaq aggersarneqarsimasoq", taamaalilluni piginnaatinneqarnerup sumiinnera erseqqissarneqarpoq. Pissutigineqartoq tamanna pissutigalugu siunnersuummi § 1, imm. 2, allanngortinneqarpoq, tassani pineqarpoq napparsimavimmut pinngitsaaliissummik unitsitsinerit, peqqinnissaqarfiup peqqinnissaqarfiinit allanit aallartinneqartunut tunngatillugu. § 1, imm. 2, naggatit aappaat allanngortinneqarpoq imaalillugu *"Dronning Ingridip Napparsimavissuani tarnikkut nappaatilinnut immikkoortortaqarfianni nakorsaanerup nakorsaq aggersarneqarsimasoq isumasioqatigalugu aalajangiivigissavaa, paasissutissat pigineqartut tunngavigalugit aamma nakorsap aggersarneqarsimasup misissuisimanera tunngavigalugu pinngitsaaliissummik unitsitsinissaq ilumut pisariaqarnersoq."*

Dronning Ingridip Napparsimavissuani tarnikkut nappaatilinnut immikkoortoqarfianni tigusinerimi nakorsaanerup inaarutaasumik aalajangiineq aalajangissavaa, napparsimavimmut pinngitsaaliissummik unitsitsinissamut piunasaqaatit naammassineqarsimanersut, tak. siunnersuummi § 9, imm. 2 [all. maanna § 10, imm. 2-mit erserpoq]. Taamaattumik pineqarpoq marloqiusamik misiliinissaq tassa nakorsaaneq naliliinermi pituttorsimannngimmat, nakorsap aggersarneqarsimasut naliliisimaneranik kiisalu politiit qanoq ittuugaluarnerumik iliuseqarsimanerannut.

Taamaalilluni tigusinissaq sioqqullugu nakorsap aggersarneqarsimasup akisussaaffigivaa atortussanut piunasaqaataasut § 6 [all. maanna § 7-mit erserpoq] naapertorlugu napparsimavimmut pinngitsaaliissummik unitsitsinissamut naammassineqarsimasut, tak. § 7, imm. 4 [all. maanna § 8, imm. 4-mit erserpoq]. Pisup ingerlanerani piffissap taassuma nallernerani nakorsaanerup akisussaaffeqarnera naliliinissaq sinnerlugu annertusineqarsinnaanngilaq, ilumut pinngitsaaliissummik napparsimavimmut unitsitsinissaq pisariaqavinnersoq, *tassa paasissutissat pigineqartut tunngavigalugit tamanna eqqortuunersoq.*

Taamaalilluni nakorsaanerup akisussaaffiginngilaa paasissutissat nakorsamit aggersarneqarsimasumit ingerlateqqinneqartut imaluunniit napparsimasumik naliliineq eqqortuunngitsut paasinarsippata, kiisalu tamakku tunngavigalugit nakorsaaneq

aalajangiinermik kukkusumik aalajangiinermut peqataasimalluni, tassa napparsimasup pinngitsaaliisummik napparsimavinnut unitsinneqarnissamut piumasaqaatinik naammassinninneranut tunngatillugu.

Siunnersuummut § 1, imm. 2-mut oqaaseqaatit matuma siulianiittut kingunerisaannik allanngortinneqarput.

Naalackersuisut suli annertunerusumik erseqqissaaqqinnissaq pisariaqartutut isiginngillat, tassa nakorsap aggersarneqarsimasup nakkutiginninnissaanut tunngatillugu inatsimmi napparsimavimmut pinngitsaaliisummik unitsitsinissamut piumasaqaatit naammassineqarsimanerannut atatillugu. Tamanna siunnersuutip § 7, imm. 3-mi aamma 4-mi [all. maanna § 8, imm. 3-mit aamma imm. 4-mit erserput] ersersinneqareerpoq. Pinngitsaaliisummik unitsitsinermi periutsit pillugit Namminersorlutik Oqartussat nalunaarutaanni nr. 17, 2. december 2013-imeersumi § 5-imi toqqaannartumik ersersinneqarpoq, nakorsaq aggersarneqarsimasoq nappaatip suusinnaanerani, napparsimasup tarnimigut pissusaanik aamma nakorsap Inatsisartut inatsisaanni § 6, normu 1 [all. maanna § 7, imm. 1, normu 1-mit erserpoq] (nakorsarneqartariaqarnerup ersuitaa) imaluunniit imm. 2 (ulorianartorsiornermut ersiutaa) naapertorlugu, piumasaqaatit eqquutsinneqarnerannut isumaqataanermik imalimmik nalunaarusiussaaq.

Tarnimikkut Nappaatillit Maalaarutaannik Aalajangiisartut siunnersuutip § 5-ianut [all. maanna § 6-mit erserpoq] oqaaseqaataat aalajangersakkamik allanngortitsinissamut pissutissaqartitsinngilaq. Oqariaatsimi atornerqartumi "piaarnerpaamik" paasinarpoq nakorsaaneq isummissasoq sapinngisamik piaartumik aamma sapinngisamik piffissap sivikinnerpaap ingerlanerani. Taamaattumik Naalackersuisut paasinninnerat naapertorlugu oqariaatsimi paasinareerpoq, tassa nakorsaanerup isummernissaa pissasoq pisariaqanngitsumik kinguarsaanertaqanngitsumik, taamaattumik oqariaaseq naannerusoq "piaarnerpaamik" atorusunneqarneruvoq. Oqariaaseq inatsimmi atuuttumi ilisimaneqareerpoq aalajangersakkammi tassaniittut ingerlateqqinneqarmata, ilaatigut §§ 8-mi aamma 9-mi [all. maanna §§ 10-mit aamma § 11-mit erserput] 'sapinngisamik' "piaarnerpaamik" atornerqarpoq. Taamatuttaaq isumaqarnarpoq nutserineq eqqarsaatigalugu taaguusersuutit assigiit suli atornerqarunik, oqariaatsinut tunngatillugu Naalackersuisut paasinnerat naapertorlugu taakku assigiipput.

Naalackersuisut isumaqataannngillat piffissanik kingusinnerpaaffiusussamik killissarititaasunik nal. akunnerinik 24-nik § 5-mi [all. maanna § 6 imm. 1-mit erserpoq] aamma nal. akunnerinik 48-nik § 1, imm. 2-mi ilanngussinerup nalorninaroqalersinnaanera kingunerissagaa, tassa aalajangiineq nakorsaarnermit atsaat nal. akunneri 24-t qanillineranni pissasoq imaanngitsoq sapinngisamik piaarnerpaamik. Piffissap killissarititaasup nakorsaanerup isummernissaanut kingusinnerpaaffiususaaq pineqarpoq, tamatuma Naalackersuisut paasinninnerat naapertorlugu innuttaasoq inatsisitigut illersorneqarnera pitsanngortippaa, "piaarnerpaamik" allassimasoqaannarneranit. Inatsimmi atuuttumi § 9, imm. 3-mi nalunnginneqareerpoq, taannalu siunnersuutip § 10, imm. 3-anni [all. maanna § 11, imm.

2-mit erserpoq] ingerlateqqinneqarpoq, tamannalu Aalajangiisartut eqqarsarnartoqartillugu uparuarsimannngilaat.

Tarnimikkut Nappaatillit Maalaarutaannik Aalajangiisartut oqaatigaat, piginnaatitsissut oqaaseqatigiinni ukunani *"Naatsorsuutigineqarpat napparsimasup qanoq issusia tassanngaannartumik pilluni qaangiukkiartussasoq sivikitsuinnaassasorlu taava nuutsitsineq pissannngilaq."* oqaaseqaatsini nalinginnaasuni, immikkoortoq 2.2.1-imi siunnersuummi ingerlateqqinneqartoq, taanna erseqqippallaanngitsoq. Oqaaseqaatini siunnersuummi § 1, imm. 2 innersuunneqarpoq. Siunnersuummi § 1, imm. 2-mi pineqarpoq napparsimavimmut pinngitsaaliissummik unitsitsinerit peqqinnissaqarfiup immikkoortuini allani aallartinneqartut. Tassani pineqarpoq soorunami nalinginnaasumik piffissami utaqqisoqassaaq napparsimavimmut pinngitsaaliissummik unitsitsinissap aalajangerneqarneranit aallartitsinermut, napparsimasup Dronning Ingridip Napparsimavissuani tarnikkut nappaatilinnut immikkoortoqarfiannut tikinnissaata tungaanut, tassami napparsimasup angalanissaa aallartinneqassammat aamma piviusunngortinneqarluni. Napparsimasup qanoq innera nalilerneqarpat tassaasoq *tassanngaannartumik pilluni qaangiukkiartussasoq sivikitsuinnaassasorlu*, taava tamatumani pissusissamisoorlutut piginnaatitsisoqanngilaq Dronning Ingridip Napparsimavissuani tarnikkut nappaatilinnut immikkoortoqarfiannut pinngitsaaliissummik unitsitsinissaq aallartissallugu, tassami inuk tikiunnermini pinngitsaaliissummik unitsinneqarnissamut siunnersuummi § 6-imi [all. maanna § 7-mit erserpoq] atortussanut ilaatinneqarnera atorunnaassammat.

Naggasiullugu maalaarutininik aalajangiisartut allapput iluaqutaassasoq § 3, imm. 3-5-imut oqaaseqaatini taaneqartut erseqqissarneqarpata, tassa Dronning Ingridip Napparsimavissuani tarnikkut nappaatilinnut immikkoortoqarfimmi nakorsaaneq tarnimikkut napparsimasunut nakorsaasinnaanermut nakorsatut immikkut ilinniarsimasutut akuersissummik pigisaqassasoq. Naalackersuisut aalajangiussimavaat oqaaseqaatit allanneqarsimasut naammattutut isigineqartariaqartut, tassa nakorsaanerup piginnaasaanut naleqqiussilluni. Naalackersuisut isumaqatigaat tarnimikkut napparsimasunik nakorsaasarneq aamma nakorsaanerup pisinnaatitaanerit pigisai, taakkunani piunasaqaataasoq tarnimikkut napparsimasunik nakorsaasarnermut pisariaqartumik tunngaveqarnissaq aamma ilisimasaqarnissaq, soorlu Tarnimikkut Nappaatillit Maalaarutaannik Aalajangiisartut tusarniaanermut akissuteqarnermini tamanna naatsorsuutigigaat.

Tarnimikkut Nappaatillit Peqatigiiffianit, Sugisamit, tusarniaanermut akissuteqaat:
Peqatigiuffik tusarniaaffigineqartunut ilaavoq 2012-imi tarnimikkut napparsimasut pillugu inatsimmut siullermut atatillugu, kiisalu matumuuna pingaarnertut tunngaviusut isummanut tunngaviusunut, inatsimmut matumunnga tunngavigineqartut ilalerlugit.

Siunnersuutip matuma atuarnerani uagut paasivarput matuma siuliani tunngaviusut pingaarnertut aamma isummat tunngaviusut allannorsimannngitsut, siunnersuummi

matumani allannguutissatut siunnersuutigineqartuni. Allannguutissatut siunnersuutini taakkunani napparsimasut inatsisitigut isumannaatsuunissaasa ajornerulernissaat siunertarineqanngitsoq, kisianni siunertarineqartoq tassaavoq inatsisip tulluarsarnissaa piviusunut aamma atugassarititaasunut, maani Kalaallit Nunatsinni atuuttunut.

Taamaalilluta paasinnippugut taperserniarlugulu inatsimmi piginnaatitsisoqarnissaa nakorsap allap nakorsaanerup saniatigut pinngitsaaliissummik iliuuseqarnissamut aalajangiisinnaneranut, taamaaliornikkut nakorsaanerup aalajangiineq tamanna nal. akunnerisa 24-t qaangiutinnginnerini isummerfigissallugu.

Taamatuttaaq paasilluarparput aamma taperserlugu nakorsaatiniq napparsimasumut sapinngisamik ikinnerpaamik saniatigut peruluutaasartunik sunniuteqartartunik atuisarnissaq. Uagut isumarput tassaavoq tarnimikkut napparsimasunik nakorsaasarnerni annertunaarlugit nakorsaatitortitsisoqannginnissaa imaluunniit kukkusumik nakorsaatitortitsisoqannginnissaa.

Akissuteqaat:

Peqqissutsimut Naalakkersuisoqarfiup nalunaarpaa Tarnimikkut Nappaatillit Peqatigiiffiannit Sugisap siunnersuut taamatut saqqummiunneqarnermisut isikkoqartillugu tapersersinnaagaa.

Nunatsinni Meeqqat pisinnaatitaaffii pillugit sullissivimmit, MIO-mit akissuteqaat:

Nalinginnaasumik oqaaseqaatit

Meeqqat Illersuisuata iluaraa, tarnimikkut napparsimasut kiffaanngissusiiagaasarnermut allatigullu pinngitsaaliissummik iliuuseqarfigineqartarnermut il.il. atatillugu inatsisitigut inissisimaffiat Kalaallit Nunaanni nukittorsarneqarnissaa siunnersuutip siunertarimmagu.

Siunnersuut pineqartoq NP’p Meeqqat Pisinnaatitaaffii pillugit Isumaqatigiissutaanut atatillugu immikkut meeqqat inuusuttullu isiginnittaasiatigut Meeqqat Illersuisuata nalilerpaa:

NP-artikeli 3: Meeqqap pisariaqartitai

1. Meeqqanut tunngatillugu sulissuteqarnerni tamani, tamakku inuttut atugarissaarnissaq siunertaralugu pisortatigoortumik imaluunniit inuinnarnit ingerlassatut suliffeqarfinit, eqqartuussivinnit, suliffeqarfinni pisortanit imaluunniit inatsisiliornikkut pisortaqarfinit ingerlanneqaraluarpataluunniit, meeqqamut namminermut pitsaaneruserisaaq salliutinneqartassaaq.

2. Naalagaaffiit peqataasut meeqqap ineriartornermini pisariaqartitaatut illersorneqarnissaa isumagineqarnissaalu piginnaatitaaffiit pisussaaffiillu meeqqap angajoqqaavinut, taakku sinnerlugit perorsaasumut inunnulluunniit allatut inatsisinik tunngaveqarlutik meeqqamut akisussaaffiginnittunut atuuttut naapertorlugit isumannaallisassavaat, tamannalu siunertaralugu inatsiseqarnerup tungaatigut aammalu pisortaaffiginninnikkut iliuusissanut

maleruagassanik naleqquttunik tamanik aalajangersaassallutik.

3. Naalagaaffiit peqataasut isumannaallisassavaat suliffeqarfiit, sullissinerit pisortaqarfillu meeqqanik isumaginninnissamut illersuinissamulluunniit akisussaassuseqartut najoqqutassianut, pisortanit aalajangiisinnaatitaasunit aalajangersarneqartunut naapertuuttuunissaat, pingaartumik isumannaatsuunissap, peqqinnissap, sulisorisat amerlassusissaasa piukkunnaateqarnerisalu kiisalu suliamut paasisimasalinnit nakkutigineqarnissaasa tungaasigut.

NP-artikeli 12: Meeqqap tusaaneqarnissamut pisinnaatitaaffia

1. Naalagaaffiit peqataasut qularnaassavaat meeqqap, nammineerluni isummaminik saqqummiuussisinnalereersup, isummaminik taamaattunik pissutsini meeqqamut namminermut tunngassutilinni tamani akornuserneqarani oqaatiginnissinnaatitaanissaa; meeqqap isummamisut saqqummiussai qassinik ukioqarnera aammalu inerisimassusia naapertorlugit pingaartinneqartassapput.

2. Tamanna siunertaralugu meeraq periarfissinniarneqartassaaq pingaartumik suliassat meeqqamut tunngassutillit pisortanit imaluunniit nakkutiginninnikkut pisortanit eqqartuussivitsigoortumik aalajangiiffiginiarneqarnerini tamani oqaaseqaateqarnissaanut nammineerluni imaluunniit sinniisitut aallartitaq aqqutigalugu imaluunniit pisortaatitaq naleqquttoq aqqutigalugu naalagaaffiup eqqartuussiviini periaaserineqartartut naapertorlugit.

NP-artikeli 24: Meeqqap peqqissutsimik sapinngisamik pitsaanerpaamik angusaqarnissaanut pisinnaatitaaffia

Naalagaaffiit peqataasut akuersaarpaat peqqinnissap tungaatigut isumagineqarnikkut, napparsimalermermi nakorsarneqarsinnaanikkut aammalu napparsimareermermi peqqissarneqarnikkut pitsaanerpaamik angusaqarnissamut meeqqap piginnaatitaanera. Naalagaaffiit peqataasut qularnaarniagassaraat meeqqat arlaannaataluunniit taamatut nakorsartinnissamut paarineqarnissamullu pisinnaatitaaffimminnik arsaarneqannginnissaat. Meeqqat Illersuisuata tusarniaanermi akissutai tamakku aallaavigalugit isigineqassapput.

Nalinginnaasumik isiginninneq

Meeqqat Illersuisuata innersuussutigaa, tarnimikkut napparsimasunik kiffaanngissusiaasarnermut allatigullu pinngitsaaliissummik iliuuseqarfigineqartarnermut atatillugu meeqqat inuusuttullu inatsisitigut inissisimaffiannik nassuiaaneq inatsisit oqaasertaanni, nalunaarummi aamma tassunga ilitersuutini immikkoortortami ataatsimi immikkut katersorneqassasut. Meeqqat aallaavittut mianerisassaapput, meeqqallu tarnimikkut nappaatillit suli mianerisassaanerupput. Taamaattumik Meeqqat Illersuisuata siunnersuutigaa, inatsit meeqqat inuusuttullu inatsisitigut inissisimaffiannik ersarissaanermik imaqassasoq kiisalu immikkut immikkoortuni ersarissarneqassallutik.

Tamatuma saniatigut Meeqqat Illersuisuata innersuussutigaa, erseqqissarneqassasoq,

meeqqat inuusuttullu tarnimikkut napparsimasut aallaavittut inatsisitigut inissisimaffimmi, inatsimmik makkununga atatillugu malinnittumik ilaatinneqassasut:

- *Meeqqat inuusuttullu napparsimasunik siunnersuisartumik kinaassusersiunnigitsumik, meeqqanik inuusuttunillu oqaloqateqarnissamut ilinniarsimasumik neqeroorfigineqartassasut.*
- *Erseqqissarneqassasoq, meeraq/inuusuttoq naammagittaalliornissamut pisinnaatitaaffeqartoq.*
- *Meeqqat inuusuttullu sapinngisamik annertunerpaamik katsorsartinneqarnermini ilaatinneqartassasut.*
- *Paasissutissanik meeqqat inuusuttut oqaasii atorlugit suliaqartoqassasoq, taamaasilluni meeqqap/inuusuttup katsorsartinneqarnini kiisalu napparsimmavimmi uninngatitaanermi inatsisitigut illersugaanini pillugit ilisimasaqalerniassammat.*
- *Peqqinnissaqarfiup meeqqallu atuarfiata akornanni suleqatigiittoqassasoq, taamaasilluni meeqqap/inuusuttup napparsimmavimmi uninnganerani atuarnera sapinngisamik annikinnerpaamik sunnerneqassammat.*
- *Tarnikkut napparsimasut immikkoortortaanni immikkut ittumik meeqqat-inuusuttut immikkoortortaata ilusilersorneqarnera meeqqat inuusuttullu piumasaannik ilusilersorneqassasoq.*

Meeqqanut sunniutaasussanik naatsorsuineq

Meeqqat Illersuisuat isumaqarpoq, sunniutissanik naatsorsuinernut allanut atatillugu, inatsisissatut siunnersuummi immikkoortumik ataatsimik ilanngussisoqartariaqartoq "Meeqqanut inuusuttunullu sunniutissat":

Kalaallit Nunaat NP Meeqqat pillugit Isumaqatigiissutaannut ilanngunnikuuvoq, taamaattumillu qulakkeertariaqarlugu pisortani imaluunniit namminersortuni aaqqiissutit meeqqanut inuusuttunullu attuumassutillit, taakku pisariaqartitaannik siullertut inissiissasut. Isumassarsiorfissatut Skandinaviami nunat arlallit "Meeqqanut sunniutaasussanik naatsorsuinerit" atorneqartarput.

Akissuteqaat:

Inatsisissatut siunnersuummi ilaapput nammineersinnaajunnaarsitsineq aamma tarnimikkut napparsimasut nakorsarneqarneranni pinngitsaaliissutinik allanik atuinerit. Taamaattumik siunnersuummi aammattaq ilanngunneqarput meeqqat aamma inuusuttut tarnimikkut napparsimasunut, Dronning Ingridip Napparsimavissuani immikkoortorta qarfiannut unitsinneqartut. Naalakkersuisut eqqumaffigaat Meeqqat Illersuisuata isumaqatigiissummi tunngaviit pingaernerit saqqummiussai, isumaqatigiissut Kalaallit Nunaannit akuersaarneqarsimavoq.

Tarnimikkut napparsimasut nakorsaasarneq, napparsimasunik sullissinerup nalinginnaasup ilagaa sammisaq immikkut ittoq. Naalakkersuisut isumaqarput periutsit amerlasuut Meeqqat Illersuisuanit erseqqissaqqullugit ujartorneqartut, peqqissutsimut inatsimmi nalinginnaasumi ersersinneqartut. Taamatuttaaq siunnersuummi § 2-mi piginnaatitaaffiit arlallit malittarisassiuunneqarput, napparsimasunut 15-it inorlugit ukioqartunut imaluunniit paasissutissinneqareernikkut akuersissuteqarnissamik piginnaasaqarnermik ataavartumik annaasaqarsimasunut, taamatuttaaq napparsimasunut ukiukitsunut 15-inik ukioqalersimasunut kisianni isummernermik kingunerisassaannik paasinnissinnaanngitsutut isigineqartunut.

Tamatamani taamatuttaaq pineqarpoq periutsinik atuutereersunik ingerlatitseqqinneq aammattaaq marloqiusamik malittarisarsionnissamik pinngitsoortitsiniarneq.

Immikkoortut tulleriiaarneqarsimasut ulluinnanit ingerlatsinermut aamma isumalluuteqarnermut tunngasorujussuupput, apeqqutit taakkununga immikkut tunngatinneqarput. Naalakkersuisut immikkoortunut ataasiakkaanut oqaaseqarniarput imatut:

- Meeqqat inuusuttullu napparsimasunut siunnersuisartumik allanut attuumassuteqanngitsumik tarnimikkut napparsimasutut allatulli neqeroorfigineqarput. Kalaallit Nunaanni peqqinnissaqarfiup nammineq nalilissavaa tarnikkut napparsimanerit pillugit immikkut ilinniarsimasumik meeqqanik inuusuttunillu oqaloqateqartarnermut, tamanna isumalluutit eqqarsaatigalugu naleqquttuunersoq.
- Tarnimikkut napparsimasut naammagittaalliornissamut periarfissaat inatsimmi erseqqipput. Taakkua aammattaaq ukiukitsunut atuupput.
- Naalakkersuisut siunnersuut aqqutigalugu siunertaraat nakorsarneqarnerup ingerlanneqarnerani peqataatinneqarnissap pisariaqartup qulakkeerneqarnissat. Soorlu assersuutigalugu napparsimasunik siunnersuisoqarnermut maleruaqqusani aamma siunnersuummi aalajangersakkani nalinginnaasunik kapitali 2-mi tamanna erserpoq.
- Paasissutissat ujartorneqartut itutt peqqinnissaqarfiup suliassarissavai. Peqqissutsimut Naalakkersuisoqarfiup nalunaarutigisimavaa peqqinnissaqarfimmi aqutsisoqarfik aperiniarlugu meeqqat oqaasii atorlugit suliaqarnissamik eqqarsaateqarnersut.
- Malinnaaffigiininnermut aamma nakorsartinnissamut pilersaarutit pigineqareerput tassani soqutigisaqartut naleqquttut suleqatigineqassapput. Tarnimikkut napparsimasut atuarnerminnut malinnaasinnaanerit nakorsarneqarnerup ingerlanneqarneranut ilutigitillugu, tamanna piviusumik pineqartorpianut sulisunit tamatumunnga naleqquttunik nalilersorneqartuusariaqarpoq.
- Maannakkorpiaq immikkut ittumik meeqqanut-inuusuttunut tarnimikkut napparsimasunut immikkut immikkoortortaqarfimmi pilersitsisoqarnissaanik pilersaaruteqartoqanngilaq.

"Meeqqanut sunniutaasunik naatsorsuineq" tarnimikkut napparsimasunik nammineersinnaa-junnaarsitsisarneq allatigullu pinngitsaaliissummik iliuuseqartarneq pillugit inatsisartut inatsisissaattut siunnersuutip matuma avataaniippoq. Meeqqat Illersuisuannut inassutigineqarpoq tamanna pillugu Inatsisartunut toqqaannartumik saaffiginnequllugu.

Tusarniaanermut akissuteqaat Tilioq – Innarluutillit oqaaseqartartoqarfiat:

Innarluutillit oqaaseqartartoqarfiannit nuannaarutigineqarpoq Peqqissutsimut Ilisimatusarnermullu Naalakkersuisoqarfiup Ombudsmandip isornartorsiorsimasai aaqqiiviginiarmagit.

Innarluutillit oqaaseqartartoqarfiannit paasilluarneqarpoq pisoqarnerisa ilaanni pisariaqarsinnaammat nakorsaanerup peqannginnerani pisuni arlaqartuni aalajangiinerit nakorsanit allanit aalajangerneqarsinnaasunnngormata. Taamaattorli nuannaarutigaarput nakorsaanerup sapinngisamik piaarnerpaamik aamma nal. akunnerisa 24-t ingerlanerini nakorsap allap aalajangernera akuerisussaammagu.

Taamatuttaaq Innarluutillit oqaaseqartartoqarfiata nuannaarutigaat nakorsaatit saniatigut sunniuteqartarnerannut apeqqut erseqqissaaffigineqarmat, aammattaaq oqaatsitigut naleqqussaasoqarmat tulluarsaasoqarlunilu, taakku inatsimmi pineqartut erseqqinnerulersippaat aamma ataatsimoortumik takuneqarsinnaasunnngortippat.

Allanguutinit allanik oqaaseqaatissaqanngilagut.

Akissuteqaat:

Peqqissutsimut Naalakkersuisoqarfiup nalunaarpaa Innarluutillit oqaaseqartartoqarfiannit siunnersuut taamatut saqqummiunneqarnermisut isikkoqartillugu tapersinnaagaa.

Tusarniaanermut akissuteqaat uanngaanniit Institut for Menneskerettigheder:

Instituttip pitsaasutut isigaa siunnersuummi periutsip atorineqartartup inatsisitigut tunngavissaqartinneqarnissaa siunertarineqarmat, tamatuma kingunerisaanik nakorsaanerup peqannginnerani pisuni assigiinngitsuni aalajangiinernik nakorsat allat aalajangiisinnaallutik, tamatumalu kingornatigut aalajangiinerit nakorsaanermit akuersissutigineqassallutik. Instituttip tapersersorsinnaavaa nakorsaanerup peqannginnerani killilimmik aalajangiisinnaanerup inatsisitigut malittarisassiuunneqarnissaa, tamatumani eqqarsaatigineqarpoq nakorsaanerup peqataanerata inatsisitigut illersugaanermut qulakkeerinninnissamut pingaaruteqarnera.

Insitutti siunnersuummut allanik oqaaseqaatissaqanngilaq.

Akissuteqaat:

Peqqissutsimut Naalackersuisoqarfiup nalunaarpaa Institut for Menneskerettigheder siunnersuut taamatut saqqummiunneqarnermisut isikkoqartillugu tapersersinnaagaa.

Qeqertalik Kommunimit tusarniaanermut akissuteqaat:

Kommune Qeqertalik Inatsisartut inatsisissaattut siunnersuutip nassiunneqartup imarisaanut isumaqataavoq, siunnersuummullu allanik oqaaseqaatissaqarnani.

Kommune Qeqertalimmit naatsorsuutigineqarpoq Peqqissutsimut Ilisimatusarnermullu Naalackersuisoqarfiup kingusinnerusukkut inatsimmut ilitsersuutinik suliaqarnerminut atatillugu immikkoortut ataasiakkaat erseqqissassagai, ilaatigut § 2-mut tunngatillugu tassani pineqarput meeqqat inuusuttullu 15-it inorlugit aamma sinnerlugit ukioqartut.

Akissuteqaat:

Peqqissutsimut Naalackersuisoqarfiup nalunaarpaa Qeqertalik Kommuniata siunnersuut taamatut saqqummiunneqarnermisut isikkoqartillugu tapersersinnaagaa.

Meeqqanut inuusuttunullu tunngatillugu Peqqissutsimut Naalackersuisoqarfiup MIO-mut akissuteqaat innersuusutigaa aamma tusarniaaqqinnissaq pilersaarutigineqartoq.

Nunatsinni Eqqartuussisuuneqarfimmi tusarniaanermut akissuteqaat:

Pilertortumik suliassat aallat pissutigalugit ajoraluartumik tusarniaanermut akissuteqaat, tusarniaanermut kingusinnerpaamik piffissarititaasup qaangiutinnginnerani, nassiunnissaa angumerisinnaasimangilara.

Taamaattorli inatsisissatut siunnersuummut § 45-imut tassungalu oqaaseqaatigineqartunut ataasituamik oqaaseqaatissaqarpunga, tassani arlaleriarluni allanneqarpoq nammineersinnaajunnaarsitaaneq allaffissornikkut aalajangerneqartoq pillugu naammagittaalliutit Kalaallit Nunaanni Eqqartuussivimmi eqqartuussisumut ingerlatinneqarsinnaasut Kalaallit Nunaanni Pinerluttulerinermi inatsimmi kapitali 28 naapertorlugu.

Taamaattorli oqartussaasoq eqqortoq suliassanik pinerluttulerinermi inatsimmi kapitali 28 naapertorlugu ingerlateqqinneqartunik, tassaavoq Kalaallit Nunaanni Eqqartuussivik, tak. pinerluttulerinermi inatsimmi § 292, imm. 3, taanna suliassanik allaffissornikkut ittunik suliaqartartuummat, tassa imaangitsoq Kalaallit Nunaanni Eqqartuussivimmi eqqartuussisumut.

Tamatuma saniatigut allanik oqaaseqaatissaqanngilanga.

Akissuteqaat:

Peqqissutsimut Naalackersuisoqarfiup tusaatissatut tiguaa siunnersuummi § 45 [all. maanna § 49-mit erserpoq] tunngavigalugu suliassanik ingerlatitseqqinnermi oqartussaasoq eqqortoq tassaasoq Kalaallit Nunaani Eqqartuussivik, tassa imaanngitsoq Kalaallit Nunaani Eqqartuussivimmi eqqartuussisoq.

Siunnersuummi aalajangersakkanut ataasiakkaanut oqaaseqaatit

Kapitali 1-mut
Inatsisip atuuffia

§ 1-imut

Imm. 1-imut

Aalajangersakkami aalajangersarneqarpoq napparsimavimmut pinngitsaaliissummik unitsitsineq, napparsimavimmi pinngitsaaliissummik uninngatitsineq aamma pinngitsaaliissummik al-lamik atuineq taamaallaat Dronning Ingridip Napparsimavissuani tarnikkut nappaatilinnut Im-mikkoortorta qarfianni ator neqarsinnaasoq.

Tamatumani pingaartinneqarpoq pinngitsaaliissummik unitsitsineq aamma pinngitsaaliissum-mik uninngatitsineq taamaallaat Dronning Ingridip Napparsimavissuani tarnikkut nappaatili-nnut Immikkoortorta qarfianni isumannaatsumik pisinnaasoq. Tassani neqeroorutigineqarsin-naapput initigut aamma nakorsartinnissamut killiliussat pitsaanerpaat. Taamaalilluni sillimaf-figineqareerpoq peqqinnissaqarfiup napparsimavii sinerissamiittut tarnimikkut peruluuteqar-lutik napparsimasunik nakorsaanissaminnut immikkut ilinniagaqarsimasunik aamma isumal-luutunik pisariaqartinneqartunik nalinginnaasumik sulisoqartannginnerat.

Imm. 2-mut

Aalajangersakkami ersersinneqarpoq napparsimasumik pinngitsaaliissut atorlugu unitsitsineq aallartinneqarsinnaasoq peqqinnissaqarfiup suliffiini allani. Aalajangersakkami napparsimasut piffissap unitsinneqarfiusup nalaani Nuup avataaniittut sillimaffigineqarput.

Peqqinnissaqarfiup suliffiitut allatut paasineqassapput Dronning Ingridip Napparsimavissuata saniatigut nunap immikkoortuini napparsimaviit aamma najukkani napparsima-viit/peqqissaaviit.

Napparsimaviit inuinnarnit (namminersortunit) pigineqartut aamma nakorsiartarfiit aammat-taaq soorlu assersuutigalugit sakkutooqarfinni peqqissutsimik sullissinissamut periarfissat i-lanngunneqanngillat, tassani nakorsanilluunniit sulisoqaraluarpata apequtaatinneqanngilaq.

Siunnersuummi ilanngunneqanngillat inuit napparsimaveqarfiup avataani angerlarsimaffinni uninngasut, naak taakkua qanoq innerat siunnersuummi ilaatinneqartutut isigineqarsinnaaga-luarpalluunniit. Taamaattumik aalajangersakkat inunnut angerlarsimaffinni utoqqarnik paaq-qinniffiusuni imaluunniit inunnut timimikkut imaluunniit tarnimikkut annertuumik innarluuti-linnut ineqarfiusunik ineqartinneqartunut atuutinngillat.

Napparsimavimmut pinngitsaaliissummik unitsitsinerni Dronning Ingridip Napparsimavissua-ni tarnikkut nappaatilinnut Immikkoortorta qarfiannut nuutsitsinnissaq nalunaaquttap akunne-risa 48-t ingerlanerini aallartinneqassaaq, tamanna nalinginnaasumik angallannermi pissutsinit akornuserneqanngippat. Tamatumani paasititsissutiginneqarpoq angallassineq nalinginnaasu-mik angallannermi aallarnissami siullermi ingerlanneqassasoq. Taamaalilluni angallassigas-uarneq ator neqassanngilaq imaanngippat napparsimasup peqqissutsimigut inissisimanerata aammattaaq pineqartup ulorianassusiata tamanna pisariaqartikkaa.

Aalajangersagaq siunnersuummi § 10, imm. 1, 1-imi naggammut siullermut immikkut attuumassuteqarpoq, tamanna naapertorlugu napparsimasut ulorianassuseqarnerisa ilisarnaataat (pappiaqqat aappalaartut) tunngavigalugu unitsinneqartut ingerlaannartumik peqqinnissaqarfimmi tiguneqassapput. Taamaalilluni imm. 1, 2-mi aalajangersakkami periarfissiisoqarpoq napparsimasoq peqqinnissaqarfiup napparsimaviisa ilaanni ingerlaannartumik tiguneqassasoq, aammattaaq tamatuma kingornatigut Dronning Ingridip Napparsimavissuanut nuussinissaq aallartinneqassasoq aamma pilersaarusiorneqarluni.

§ 1, imm. 2-mi, naggatit aappaanni ersersinneqarpoq, utaqqiisaagallartumik napparsimavimmut unitsitsinerit aamma uninngatitsinerit taamaattut Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneermit aalajangerneqartassasut nakorsaq unitsitsisoq isumasioqatigalugu. Tamanna ima paasineqassaaq nakorsaaneerup najukkami nakorsaq isumasioqatigalugu aalajangissavaa, napparsimasup pineqartup nalinginnaasumik angallannermi aallarnissamut utaqqitinneqarnissaa illersorneqarsinnaanersoq, aammattaaq nakorsarneqarneq suna aallartinneqarsinnaanersoq. Peqqinnissaqarfiup ingerlatsivii amerlanerit nalunaarasuartaatit aqqutigalugit attaveqaammik atuisinnaapput, taamaattumik Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneerup napparsimasoq takusinnaavaa aamma napparsimasoq oqaloqatigalugu, tamannalu tunngavigalugu napparsimasup qanoq inneranik paasisaqarsinnaalluni.

Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneerup aalajangiineq inaarutaasoq aalajangissavaa, ilumut napparsimavimmut pinngitsaaliissummik unitsinneqarnissamut piunmasaqaatit eqqortinneqarnersut, tak. siunnersuummi § 10, imm. 2. Taamaalilluni nakorsap aggersarneqartup napparsimavimmut unitsitsinissaq sioqqullugu akisussaaffigaa pinngitsaaliissummik napparsimavimmut unitsitsineri atortussat § 7-imiittut eqqortinneqarnerat, tak. siunnersuummi § 8, imm. 4. Pisup ingerlanerani piffissami tassani nakorsaaneerup akisussaaffeqarnera naliliinissaq sinnerlugu annertusineqarsinnaangi-laq, ilumut napparsimavimmut pinngitsaaliissummik unitsitsinissaq pisariaqavinnersoq, tassa paasissutissat pigineqartut tunngavigalugit tamanna eqqortuunersoq.

Taamaalilluni nakorsaaneerup akisussaaffingnilaa paasissutissat nakorsamit aggersarneqarsimasumit ingerlateqqinneqartut imaluunniit napparsimasumik naliliineq eqqortuunngitsut paasinarsippata, kiisalu tamakku tunngavigalugit nakorsaaneq aalajangiinermik kukkusumik aalajangiinermut peqataasimalluni, tassa napparsimasup napparsimavinnut pinngitsaaliissummik unitsinneqarnissamut piunmasaqaatinik naammassinninneranut tunngatillugu.

Napparsimasup tarnimigut qanoq issusia tassangaannartumik pisimasutut qaangiuttussatullu nalilerneqarpat, taava Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneerup aalajangersinnaavaa nuussinerup ingerlanneqannginnissaa. Tamatumani ingammik pineqarpoq napparsimasup qanoq innerata pilertortumik iluarsiar-tonera takuneqarsinnaalluni, kiisalu tamanna pissutigalugu nal. akunnerisa 48-t ingerlanerini angerlartinneqarnissaa ilimanarsinnaalluni. Taamaalillutik nuussinerit pisariaqanngitsut pin-

ngitsoorneqassapput taamatuttaaqq napparsimasumut pinngitsoortinneqassaaq malunnaatilimik artorsaateqarneq, tassa avatangiisinit sungiusimasanit qimagunnermi malunniuttartooq.

Pinngitsaaliissummik napparsimavimmut unitsitsinermik piviusumik ingerlatsineq sulii politii-niippoq, tak. § 9, imm. 1.

Imm. 3-mut

Aalajangersakkami aalajangersarneqarpoq, timikkut anniaatigisamik pinngitsaaliissummik nakorsarneqarneq pisariaqarpat timikkut nappaatilinnut immikkoortortaqarfimmi ingerlanneqarsinnaasoq, § 15-imi piumasqaataasut tamatumani isiginiarneqassapput. Napparsimasooq timimigut anniaatiminik tarnimikkut napparsimasut immikkoortortaqarfianni naammaginartumik nakorsarneqarsinnaappat, timimikkut anniaatillit immikkoortortaqarfiannut nuussisoqassanngilaq.

Imm. 4-mut

Napparsimasooq imm. 4 nutaaq tunngavigalugu Dronning Ingridip Napparsimavissuani tarnikkut nappaatilinnut Immikkoortortaqarfianni uninngasoq Kalaallit Nunaata avataani tarnimikkut napparsimasunut immikkoortortaqarfimmut nuutsinneqarsinnaavoq, imaappaat napparsimasooq avatangiisiminut ima ulorianartigaluni, napparsimasup Dronning Ingridip Napparsimavissuani tarnikkut nappaatilinnut Immikkoortortaqarfianni uninngatinneqaannarnissaa illersorneqarsinnaanngitsutut isigineqarsinnaalluni.

Ullumikkut peqqinnissaqarfiup napparsimaviini matoqqasunik immikkoortortaqarfeqanngilaq. Taamaattorli qaqutigooortumik imatut pisoqarsinnaavoq tarnimigut napparsimasooq avatangiisiminut ima ulorianartigaluni, pineqartoq Kalaallit Nunaata avataani tarnimikkut napparsimasut napparsimavianut nuutsinneqartariaqarluni.

Nuussineq pinngitsaaliissummik uninngatitsinermi maleruaqqusat naapertorlugit ingerlanneqassaaq, imaappat napparsimasup nuutsinneqarnissamat ilisimatinneqareerluni akuersissuteqarsimanani. Aalajangersakkap inatsit aamma tassani periuseq ingerlateqqippaa, tak. atuuttumi § 9, imm. 2.

§ 2-mut

Imm. 1-imut

Aalajangersakkami pinngitsaaliineq imatut nassuiaaserneqarpoq, ilisimatitsereraluarluni taamaattorli akuersisoqarsimanngitsoq iliuserineqartut ingerlanneqarneratut, napparsimasut inatsisitigut inassisimanerat pillugu Inatsisartut peqqussutaat nr. 6, 31. maj 2001-imeersoq kapitali 2 takuuk.

Inatsisitigut tunngaviulluinnarpoq nakorsarneqarneq sunaluunniit nammineq piumassutsimik aallaaveqassasoq. Tunngavigineqartumi pineqarpoq napparsimasup nammineq aalajangiisinnanannerminut pisinnaatitaaffia aamma inuup ataqqinassusia kiisalu inniminassusia. Nammineq aalajangiisinnanannermut pisinnaatitaaffik napparsimasunut tamanut pingaarnepaajulluni maleruaqqusaavoq, tassa imaappoq napparsimasunut timimikkut anniaateqartunut taamatullu napparsimasunut tarnimikkut anniaateqartunut. Taamaalillutik paasissutissinneqareernikkut akuersineq pillugu maleruaqqusat, napparsimasut inatsisitigut inissisimanerat pillugu Inatsisartut peqqussutaanniittut, aallaaviusutut tarnimikkut nappaatilinnut aammattaaq atuupput.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 6-imi, imm. 1 allassimavoq nakorsarneqarneq aallartinneqassanngitsoq imaluunniit nangingneqassanngitsoq napparsimasoq paasissutissinneqareernermigut isumaqataalluni akuersiteqqaartinnagu, tamanna inatsisini imaluunniit inatsisartut peqqussutaanni §§ 8-10-mi immikkut aalajangersaavigineqarsimanngippat. Paasissutissinneqareernikkut isumaqataalluni akuersineq peqqussummi imatut paasineqassaaq peqqinnissamik suliaqartup tungaaniit paasissutissinneqareerneq sukumiisoq tunngavigalugu akuersinertut.

Oqariaaseq "paasissutissinneqareernikkut akuersineq" nunani siuarsimasuni tamani peqqinnisaqarfinni atuutsinneqarpoq, ilaatigullu nunani tamalaani isumaqatigiissusiornermi atorneqartarluni.

Akuersissuteqarneq sukumiisumik paasissutissinneqarnermik tunngaveqanngitsoq naammanngilaq, tassami pineqarmat nappaammik nakorsarneqarneq taamak annertutigisoq. Napparsimasup nakorsarneqarneq taannarpiaq pillugu paasitinneqarnissani itigartitsissutigisimappagu. taava paasissutissinneqareernikkut akuersisoqarsimaneratut tamanna suli isigineqassaaq, naak paasissutissat amerlassusiat aamma annertussusiat napparsimasup nammineq kissaatigisaa naapertorlugu killeqarsinnaagaluartut.

Apeqquq matumunnga tunngasoq akuersissuteqartoqarsimanerata pigineqarneranik oqarsinnaaneq sioqqullugu paasissutissinneqareerluni atuuttumik akuersissuteqartoqarsimansoq, tamatumani ilaalluni isummanik qanoq erseqqitsigisumik saqqummiussisoqarsimansoq, tamanna napparsimasut inatsisitigut inissisimanerat pillugu Inatsisartut peqqussutaanni akuersissuteqartarnermut maleruaqqusat naapertorlugit nassuiarneqassaaq.

Una *erseqqissumik akuersissuteqarneq* pigineqarpoq napparsimasup nakorsartinnissaq pineqartoq akueralugu paatsuugassanngitsumik isumaqatigippagu. Akuersissuteqarneq oqaasiinartigut aamma allakkatigut pisinnaavoq.

Una *allakkatigut akuersissuteqarneq* erseqqissumik tunngavissiivoq. Pisulli amerlanersaanni nakorsartinnissamut allakkatigut akuersissuteqarnissaq pisariaqassanngilaq. Tamanna aammattaaq matumunnga atatillugu isigineqassaaq, peqqinnissamik suliaqartup allattuinnissamut

maleruaqqusat naapertorlugit pisussaaffigaa allattukkanut ilanngutissallugit paasissutissat suut napparsimasumut tunniunneqarsimanersut, kiisalu paasissutissat tunniunneqarsimasut tunngavigalugit napparsimasoq qanoq isummersimanersoq.

Una *oqaasiinnartigut akuersissuteqarneq* siullertut atuuttutut inatsisip atuuffiani naammassaaq, tak. matuma siuliani peqqinnissamik suliaqartup allattuinnissamut maleruaqqusat naapertorlugit pisussaaffiani taaneqartut.

Una *oqaaseqanngikkaluarluni akuersissuteqarneq* pigineqarpoq inuit ataasiakkaat ileqqulersorneratigut aamma iliუსiatigut imatut paasineqarsinnaappata, paasissutissat tunniunneqartut tunngavigalugit akuersissuteqartoq. Oqaaseqanngikkaluarluni akuersissuteqarnerup inatsimmi piumasqaataasut taamaallaat naammassissavai, qularnanngippat nakorsartinnissamut siunnersuutaasooq il.il. imaluunniit taakku ilaat napparsimasup ileqqulersornermigut paasitissimagaa. Annertunngitsumilluunniit qularutigineqarpat, napparsimasoq nakorsartinnissap ingerlannissaanut akuersisimasooq, taava allakkatigut imaluunniit oqaasiinnartigut akuersissuteqarneq pissarsiarineqartariaqarpoq.

Nammineq kajumissuseq suli pineqassaaq napparsimasooq eqqortumik ilitsersorneqarluni aamma paasissutissinneqarluni qularunnaarsinneqarpat imaluunniit peqataanissamut akuersisinneqarpat. Napparsimasup iliuseqarfigneqarnissaminut suniannginnera imatut paasineqassanngilaq, taanna naammattoq paasissutissinneqareernikkut akuersissuteqarnertut isiginninnissamut, taannalu tunngavigalugu iliuserisassaaq aallartinneqassanngilaq nammineq piumasusermik tunngaveqartut.

Napparsimasooq, inatsisartut peqqussutaat nr. 6, 31. maj 2001-imeersoq kapitali 2-mi maleruaqqusat naapertorlugit napparsimasut inatsisitigut inissisimanerat pillugu, ukiukippallaarnikkut imaluunniit eqqarsartaatsikkut kinguarsimaneq pissutigalugu, paasissutissinneqarnikkut nakorsartinnissamut assigisaannullu nammineq akuersisinnaanngitsooq, aammattaaq naak inatsimmik tunngaveqartumik sinniisussaqaraluartooq sapinngisamik annertunerpaamik aalajangiinnermi peqataatinneqassaaq. Inatsimmik tunngaveqarlutik sinniisussat soorlu assersuutigalugu tassaapput angajoqqaatut oqartussaassusermik pigisaqartut, angajoqqaatut akisussaataasut imaluunniit ilaquttat qanigisat paasissutissinneqarnikkut akuersinnermi napparsimasup soqutigisaanik isumaginnittussaataasut.

Imm. 2-4-mut

Napparsimasut 15-it ataallugit ukiullit imaluunniit uteqqissinnaanngitsumik paasissutissinneqareernikkut akuersissuteqarsinnaanermut pisinnaatitaanermut pisaqarunnaarsimasut pillugit, angajoqqaamit akisussaassuseqarnermik pigisartumit, angajoqqaatut akisussaassuseqartumit imaluunniit qaninnerpaamik qanigisanit akuersissuteqarnissamik pissarsiniartoqassanngilaq, imaappat tarnimikkut napparsimasut pillugit inatsit naapertorlugu ingerlaannartumik iliuseqarnissamik ingerlatsinissaaq pisariaqarpat, inuup imminut navianartorsiortissinnaanera ima-

luunniit allanik timikkut imaluunniit peqqissutsikkut navianartorsiortitsisinnanera pinngitsoortinniarlugu, imaluunniit napparsimasup annikigisassaannngitsumik annertussusilimmik aserortersinnaanera pinngitsoortinniarlugu.

Immikkut periarfissaq taanna tassanngaannartumik pisoqarnerani, aalajangersakkami kinguni-usinnaasutut taaneqartut pitsaaliornissaat siunertaralugu pinasuartumik akuliuttariaqarnermi taamaallaat atorpeqarsinnaavoq. Matumani naatsorsuutigineqassaaq iliuuseqarnissaq sioqqullugu angajoqqaamit akisussaassuseqarnermik pigisartumit, angajoqqaatut akisussaassuseqartunit imaluunniit qanigisanit akuersissuteqarnissamik pissarsisoqarsinnaannginnera. Tamatuma kingornatigut taakku qanoq iliuuseqarneq pillugu ilisimatinneqassapput.

Aalajangersagaq matuma siuliani pineqartoq napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 8 imm. 1-imi aalajangersakkamut tunngatinneqarpoq. Aalajangersagaq taanna naaportorlugu napparsimasoq 15-inik ukioqalereersimasoq paasissutissinneqareernikkut nakorsartinnissamut akuersisinnaavoq. Angajoqqaatut akisussaassuseqarnermik pigisartoq taamatuttaaq ilisimatinneqassaaq aamma ukiukitsup isummerneranut akuliutinneqarluni.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 8 imm. 2 naaportorlugu, peqqinnissamik sullissisup immikkut naliliinermini napparsimasoq 15-inik ukioqalereersimasoq isummernerup kingunissaanik paasinnissinnaasorinngippagu, angajoqqaatut akisussaassuseqarnermik pigisartoq paasissutissinneqarnermigut akuersisinnaavoq. Siunnersuummi § 2 imm. 3-mi, qulakkeerneqarpoq aalajangersakkap § 2 imm. 2-miittup napparsimasunut pineqartunut taakkununga aamma atuuttuunissaa. Tassa imaappoq napparsimasunut taakkununga tunngatillugu § 2 imm. 2-mi piumasaaqatit eqqut-sinneqarpata, iliuuseqarnissap pineqartup aallartinnissaa sioqqullugu angajoqqaatut akisussaassuseqarnermik pigisartumit akuersissummik pissarsiaqartoqassanngitsoq.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 4-mi, peqqinnissamik suliaqartup immikkut inatsit naaportorlugu ilinniagassuseq tunngavigalugu sulisinnaatitaasutut, aamma inuit taakku sinnerlugit sulisuusutut nassuiarneqarput. Tamatumani pineqarput nakorsat, aamma peqqissaasut imaluunniit inuit taakku akisussaaffigisaannik sulisinneqartut. Peqqinnissamik sullissisut aammattaaq tassaapput inuit immikkut maleruaqqusat naaportorlugit peqqinnissaqarfimmi namminneq suliassaminnik suliaqartut.

Inuit peqqinnissamik suliaqartut sorliit pinngitsaaliisummik iliuuseqarnerup sorliup atorpeqarnissaanut aalajangiinissaasut eqqaarsaatigalugu, siunnersuummi § 10, imm. 2, § 11, imm. 1, § 12, imm. 1, § 14, imm. 2, § 15, imm. 2, § 19, imm. 1, imm. 3 aamma imm. 6 aamma § 22, § 25, § 26, imm. 2, § 27, imm. 3, § 29, imm. 1, § 29, § 30, aamma § 32, imm. 1 aamma 3 innersuunneqarput.

Kapitali 2-mut
Aalajangersakkat nalinginnaasut

§ 3-mut

Imm. 1-imut

Nakorsap pineqartup § 3, imm. 1 aamma 2 naapertorlugu pisussaaffigaa napparsimasup akuersinissaa anguniassallugu, napparsimavimmut unitsinneqarneq, uninnganeq aamma nakorsarneqarneq aammattaaq qanoq issutsip pitsaanerulernissaa pillugit pissusissamisoortumik ilitsersuereernermit. Nakorsaq napparsimavimmut unitsitsisoq taamatutaaq immikkoortortaqarfimmi uninngavissami nakorsat taamatut pissussaaffeqarput.

Imm. 2-mut

Nakorsap unitsitsisup unitsitsinerup siunertaa pillugu napparsimasumik ilitsersuinissaq pingaarnertut pisussaaffigaa, kiisalu peqqinnissaqarfimi nakorsap napparsimavimmi uninnganeq aamma nakorsarneqarneq aallartinneqartussatut siunertaasoq pillugit pingaarnertullugit ilitsersuissaaq. Napparsimasup peqqissinerusinnaaneranut tunngasoq ilitsersuinermit sammineqartutut tunngavigineqassaaq. Napparsimavimmut pinngitsaaliissummik unitsitsinermit imaluunniit pinngitsaaliissummik nakorsaatitortitsinermit tunngatillugu ilisimatitsinissamut pissusaaffik siunnersuummi § 4, imm.1-mi takuneqarsinnaavoq.

Imm. 3-mut - 5-imut

Aalajangersakkatut siunnersuut § 3 imm. 3-miittoq naapertorlugu Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaanerup, immikkoortortaqarfimmut unitsinneqartut imaluunniit peqqinnissaqarfiup immikkoortortaqarfiinut allanut unitsikkallarneqartut tamarmik nakorsarneqarnissaannut pilersaarusiunneqartarnissaat akisussaaffiga. Nakorsartinnissamut pilersaarummi nakorsarneqarnerup qanoq ittuunera aamma sunik ilaqarnera allanneqassapput. Napparsimasup namminerminik nakorsarneqarnerminut peqataatinneqarnissaa sapinngisamik annertunerpaamik qulakkeerniarlugu aalajangersarneqarpoq, napparsimasoq peqataatinneqassasoq aamma pilersaarutip imarisaa pillugu tusaaniarneqassasoq pilersaarutip imarisaa pillugu ilitsersorneqaannarnani. Napparsimasup pilersaarutip ingerlanneqarnissaanut akuersissuteqarnissaa anguniarneqartuassaaq.

Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaaneq akisussaaffimmik pisussaaffilerneqarneranut aallaaviuvoq, taassuma tarnikkut nappaatit pillugit immikkut pisariaqartumik ilisimasaqarnissaa naatsorsuutigineqarmat, tamannalu piunasaqaataavoq nakorsarneqarnissanut pilersaarutininik illersorneqarsinnaasunik suliaqarnissamut. Taamaalilluni nakorsaaneq pisussaaffeqarpoq nakorsartinnissamut pilersaarummik suliaqartoqarnissaa isumagissallugu, kisianni imaanngitsoq pisuni ataasiakkaani nakorsartinnissamut nammineerluni pilersaarutininik suliaqassalluni.

Pissusiviusut tunngavigalugit nakorsartinnissamut pilersaarusiornermi piumasaqaatit napparsimavimmut unitsinneqarnerup kinguninnguatigut utaqqiisaagallartumik naleqqussakkamik pilersaarusiortoqarsinnaaneratul paasineqassapput. Napparsimasup aallaqqaataani malittarine-rata kingornatigut, nakorsartinnissamut pilersaarusiornissamut piumasaqaatit annertusissap-put. Nakorsartinnissamut pilersaarut ingerlaavartumik naleqqussarneqartassaaq aamma qaqu-gukkulluunniit ersersinneqassapput nakorsartinnerit suut ingerlanneqarnerisut, kiisalu piffissaq qaninnerusooq eqqarsaatigalugu angorusutat suut piviusunngortinneqarusunnersut nakorsartin-nerit taakkorpiat atorlugit, tak. siunnersuummi § 3, imm. 4.

Nakorsartinnissamut pilersaarutip assinga napparsimasumut tunniunneqassaaq, imaanngippat pineqartup taanna piumanagu, tak. § 3, imm. 5.

§ 4-mut

Imm. 1-imut - 2-mut

Aalajangersakkami aalajangersarneqarpoq napparsimasooq nammineersinnaajunnaarsitsineq aallartinneqartinnagu aamma pinngitsaaliissummik allamik atuisoqalersinnagu ilisimatinne-qassasoq aamma allanik paasissutissinneqassasoq. Tamanna atuuppoq napparsimasup paasis-sutissanik tamakkuninnga piumasaqarsimanngikkaluarpalluunniit.

Taamaattorli taamatut sioqqutsisumik ilisimatitsineq immikkut pilertortumik pinngitsaaliis-summik sukaterussinerup aamma nukit atorlugit pissaanermik atuinermi pinngitsoorneqarsin-naavoq, tak. § 4, imm. 2. Tassanngaannartumik immikkut pisut imatut paasineqassapput pisut, ulorianartunik allanik pisoqarsinnaanera pinngitsoortinniarlugu pinngitsaaliissutip atortariaqa-lenera. Taamatut pisunik pisoqartillugu ilimagineqarsinnaanngilaq aamma pissutsit malillugit illersorneqarsinnaanngilaq iliuuseqarnissaq sioqqullugu imm. 1-imi paasititsinissamut piuma-saqaat atorneqassagaluarpat. Taamatut pisoqartillugu iliuuseqarnermut tunngavilersuut tama-tuma kingornatigut paasititsissutigineqassaaq.

Pinngitsaaliissummik atuinissamik aalajangerneq pisortat ingerlatsineranni suliassat suliarine-qartarnerat pillugu inatsimmi aalajangiisarnerit pillugit paasinninnermut attuumassuteqarsori-narmat, ilaatigut tamatuma kingunerisaanik pisortat ingerlatsineranni suliassat suliarineqartar-nerat pillugu inatsimmi maleruaqqusaniittoq piumasaqaateqarneq tunngavigalugu tamatuma kingornatigut allaganngorlugu tunngavilersuisoqarnissaanik tamatumani atuutissaaq.

§ 5-imut

Imm. 1-imut

Napparsimasup nammineq akuersinissaa anguniarlugu periarfissaasinnaasunik tamanik misi-leeqqaarnani pinngitsaaliissummik atuisoqannginnissaa qulakkeerniarlugu, § 5 imm. 1-imi aa-

lajangersagaq naapertorlugu napparsimasoq akuersitinniarneqassaaq, kiisalu tassanngaannartumik pisoqartinnagu napparsimasoq tamatumunnga isummernissaminut piffissamik naammaginartumik eqqarsarfissaqartinneqassaaq. Tamatumani ilaatigut pineqarsinnaapput napparsimasup nammineq piumassutsiminik napparsimavimmut unitsinneqarnissaminut, nammineq piumassutsiminik nakorsartinnissamut peqataanissaa imaluunniit nammineq piumassutsiminik ileqqulersornerit ilaannik pinngitsoortitsinissaanut kajumissaarniarlugu.

Napparsimavimmut unitsitsinermit tassani nakorsartittariaqarnermut ersiutit takuneqarsinnaalutik tassani pissutsit qanoq ittuunerat apeqqutaatillugit, napparsimasoq nammineq piumassutsini naapertorlugu napparsimavimmut uninnissaanut piffissaq sivisuneq atorlugu kajumissaarneqarsinnaavoq. Taamaattorli napparsimasup imminut ulorianartorsiortinnissaa imaluunniit allanik ulorianartorsiortitsinissaappat, napparsimavimmut unitsitsinissaq kinguarsarpallaasallugu nalinginnaasumik illersorneqarsinnaassanngilaq.

Imm. 2-mut

Napparsimasup kajumissaarneqarluni nammineq piumassutsiminik akuersissuteqarnissaa iluatsinngippat, kiisalu pinngitsaaliissummik iliuuseqarnissap pisariaqartinneqarnera isumaliuutigineqartariaqarluni, pinngitsaaliissut anguniakkamut naapertuuttunngorlugu atorneqassaaq, tak. § 5, imm. 2. Ajornartorsiummik pisumik aaqqiiniarnermi periarfissat arlaqarpata iliuuseqarneq annikinnerpamik iliuuseqarnerusoq atorneqassaaq.

Imm. 2 tassaavoq "annikinnerpaaffissaqartitsinermit" tunngaviusup, tunngaviusutut nalinginnaasutut pinngitsaaliissummik atuinermit sumilluunniit atuilersinnaani tunngaviusup, inatsikkut aalajangersaaffigineqarnera. Tunngavissamut assigiimmik tunngaveqartumik sumik pisoqartillugu tamatigut iliuuseqarnermi annikinnerpaamik iliuuseqartoqartarnissaanut ilisarnaataavoq, kiisalu iliuuseqarnermi piffissaq atorneqartoq taamaallaat pisariaqavissumut killeqartinneqarnissaa anguniarlugu. Tunngaviusoq inatsisip ilaani erseqqinnerusumik saqqummiunneqarpoq soorlu assersuutigalugu pinngitsaaliissummik nakorsaatitortitsinermit § 14, imm. 4-mi, kisianni pinngitsaaliissummik atuinermit suugaluartumi piumasaqaatini aamma qanoq iliornermi tamani suunera paasineqassalluni.

Taamaattorli nassuerutigineqartariaqarpoq tunngaviusup taassuma qanoq atorneqarnissaa ilaatigut pisuni ataasiakkaanik nalornissutaasinnaasarmat. Periutsip suup annikinnerpaamik iliuusiunerata nalornissutaasarnissaa ilimanarluinnarpoq. Inatsisip aaqqissuussaana naapertorlugu soorlu assersuutigalugu eqqissisaammik kapisineq, § 25, naapertorlugu, qiterut atorlugu sukaterussinermit annikinnerusumik iliuuseqarnertut isigineqarpoq. Imaassinnaavoq napparsimasut ilaat allatut eqqarsartut, qiterut atorlugu sukaterussineq atorusunnerullugu eqqissisaammik kapitinnermut taarsiullugu. Napparsimasoq taamatut paasinarsaappat, napparsimasup piumasaa avaqqullugu eqqissisaammik kapisinissamut, nakorsatut suliatigut pingaarutilinnik tunngavissaqartitsinissaa piumasaqaataassaaq. Tamanna nakorsartinnissamut paasissutissinneqaerarluni akuersissuteqarnissap aallaavigineqarnerata pissusissamisoortumik malitsigaa.

Aalajangersakkap § 5, imm. 2-mi qitiutinneqartoq ilaa tassaavooq pinngitsaaliissummik atuinerup annertussusia inatsimmi § 13-imi aamma § 34-mi piviusunngortinneqarpoq. Aalajangersakkanut taakkununga tunngasunut oqaaseqaatit innersuunneqarput.

Imm. 3-mut

Pinngitsaaliissutip aamma nukiit atorlugit pissaanerup napparsimasunik pillaanertut atorneqartannginnissaat pillugit inatsisitigut maleruaqqusaliortoqarnissaa pisariaqanngitsutut isigineqartarsimavoq, taamatuttaaq nikassaarpasittumik aamma kanngunarsaarpasittumik iliuuseqarnerit inerteqqutaapput. Pinngitsaaliissummik atuinerup sapinngisamik qajassuarnepaamik atorneqarnissaanut aamma narrunarsaanerup imaluunniit akornusersuinerup pisariaqanngitsup tujormissutaasut atorneqannginnissaannut, tassani pineqarpoq pillaanermik iliuutsit aamma nikassaarpasittumik pissusilersornerit aatsaat taamatulli taakkua inerteqqutaapput, tak. § 5, imm. 3.

§ 6-imut

Imm. 1-imut - 2-mut

Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisaanni nr. 24, 3. december 2012-imeersumi atuuttuusumi Dronning Ingridip Napparsimavissuani tarnimikkut nappaatilinnut Immikkoortorta qarfianni nakorsaaneq arlalinnik pisussaaitaaffeqarpoq aamma pisussaaffeqarpoq.

§ 3, imm. 3 naapertorlugu soorlu assersuutigalugu nakorsaanerup akisussaaffigivaa, immikkoortorta qarfirmut unitsinneqartunut tamanut nakorsartinnissamut pilersaarummik suliaqarnissaaq, aamma napparsimasup pilersaarutip imarisaa pillugu ilitsersorneqarnissaa taamatuttaaq tamatuma ingerlanneqarnissaanut ingerlaavartumik napparsimasup akuersissuteqarnissaa anguniassallugu. Taamatuttaaq § 34, imm. 1 naapertorlugu nakorsaanerup nakkutigissavaa inatsit tunngavigalugu pinngitsaaliissummik atuinerit pisariaqanngitsumik annertunerusumik atorneqannginnissaat. Tassaasinnaavooq nammineersinnaajunnaarsitsineq, pinngitsaaliissummik nakorsartinneq, napparsimavimmit angerlartinneqarnerup kingornatigut pinngitsaaliissummik malinnaaffiginninneq, pinngitsaaliissummik qiterut atorlugu sukaterussineq, nukiit atorlugit pissaanermik atuineq, sernissuiniarluni qiterut atorlugu sukaterussineq, immikkut nakkutigininneq, immikkoortorta qarfirmi matunik paarnaarsisarneq, pinngitsaaliissummik inunnik eqqiluisaartitsineq, allagarsianik/nassiussarsianik, napparsimasut inaannik aamma pigisanik misissuineq, inuit timaatigut satsaalluni misissuineq, aammattaaq nakorsaatini il.il. arsaarinnissuteqarneqarneq.

Oqaaseq "nakorsaaneq" pineqartuni taakkunani imatut paasineqarsinnaavooq, tassa nakorsaanerup akisussaaffigivaa aalajangersakkat pineqartut tarnimikkut napparsimasunut immikkoortorta qarfirmi malinneqarnissaannut eqqortitsinissaaq. Soorlu assersuutigalugu § 3, imm. 3 i-

matut paasineqarsinnaavoq nakorsaaneq pisussaaffeqartoq isumagissallugu napparsimasunut tamanut nakorsartinnissamut pilersaarummik suliaqartoqarnissaa, kisianni imanngitsoq pinngitsoornani nammineerluni pisuni tamani nakorsartinnissamut pilersaarummik suliaqassasoq.

Malugiuk oqaatsit artorneqartut ilaat inatsimmit atuuttumit pisuummata taamaattumik allaanerulaarput terminologimit matuminnga nutserisumit atorneqartunit.

Inatsimmi atuuttumi aalajangersakkani allani oqaaseq "nakorsaaneq" atorneqarpoq aalajangiinnermut atatillugu, tassa pinngitsaaliissummik atuinnermi piumasaqaatit eqqortinneqarnerannut. Pineqarput § 1, imm. 2 aamma § 10, imm. 2, pinngitsaaliissummik unitsitsinissamik aalajangiinnermut tunngatillugu, § 11 imm. 1, pinngitsaaliissummik tigummigallagassanngortitsisoqarnissaanut tunngatillugu, § 12, imm. 1, pinngitsaaliissummik utertitsinissamut tunngatillugu, § 14, imm. 2, katsorsaaniarnermut atatillugu pinngitsaaliissummik iliuuseqarnerup aallartinneqarnissaanut aamma katsorsaanerup naammassinissaanut nukersornermik atuinissamut tunngatillugu, § 15, imm. 2, pinngitsaaliissummik iliuuseqarnerup aallartinneqarnissaa timikkut nappaatinik nakorsaasoqarnissaanut atatillugu § 19, imm. 1 aamma 3, angerlartitaanerup kingorna pinngitsaaliissummik malinnaaffiginninneq aamma takkutinnitsoorpat politiit ikiortigalugit aaneqarnissaa, § 22, imm. 2, qiterut atorlugu aalaakkiinerup saniatigut paffinnut aamma imaluunniit singernernut aalaakkiissutit aqqatillu atorneqarnissaanut tunngatillugu, § 22, Imm. 3, sinerissami peqqinnissaqarfiup immikkoortuisa arlaanni pinngitsaaliissummik aalaakkiinerup sivitsorneqarnissaanut tunngatillugu, § 30 timikkut eqqiarnissamut tunngatillugu pinngitsaaliissummik atuinissamik aalajangernissamut tunngatillugu, § 32, imm. 1, allagarsi-anik/nassiussarsianik, inip uninngaviusup aamma pigisat, timip satsillugu misissorneqarnissaanut aammattaaq atortunik arsaarinnissuteqarnissamut aamma suujunnaarsitsinissamut aalajangiinnermut tunngatillugu. Taamatuttaaq nakorsaanerup § 34, imm. 2, naapertorlugu nakkutigissavaa nammineersinnaajunnaarsitsinermi piumasaqaataasut inatsimmi killiliussat allasimasut tunngavigalugu eqqortinneqarnerisut. Tamatumunnga atatillugu apeqqutinngorsinnaavoq qanoq oqaatsip "nakorsaanerup" pinngitsoortissinnaagaa piginnaatitaanerup tamatuma nakorsanut allanut tunniunneqarsinnaanera, tassami pisuni taakkunani "nakorsaanerup" pinngitsaaliissummik atuinnermut atatillugu, inatsisitigut innarlerneqannginnissamut immikkut qularnaveeqqutaasutut paasineqarsinnaammat.

Naalackersuisut paasinninnerat naapertorlugu aalajangersakkani taakkunani piumasaqaat ilanngunneqartariaqarpoq, tassa aalajangiineq nakorsaanermit namminermit imaluunniit nakorsamit, nakorsaanerup peqannginnerani nakorsaanertut inissisimasumit (taartaaneq), taamaalilluni aalajangiinissamut pisinnaatitaaneq nakorsanit sulisunit appasinnerusumik inissisimasunik ingerlanneqarsinnaanani. Tamatumunnga pissutaavoq oqaaseq "nakorsaaneq" taakkununnga atatillugu aalajangiinissamut attuumassuteqarmat, ilumut inatsimmi piumasaqaatit pinngitsaaliissummik atuinissamut eqqortinneqarsimanerannut, kiisalu pisinnaatitaanermik nakorsaaner-mut inuttut tunniussineq taamaalilluni immikkut inatsisitigut qulakkeerinninnertut paasineqasalluni. Paasinninneq taanna danskit Justitsministeriaqarfiata paasinninneranut naleqquppoq. Aalajangersakkap siunnersuutigineqartup tarnimikkut napparsimasut pillugit inatsimmi matu-

mani § 7-imi kinguneraa aalajangiinerit aalajangersakkami taaneqartut, soorlu assersuutigalugit pinngitsaaliissummik napparsimavimmut unitsitsineq aamma pinngitsaaliissummik napparsimavimmi uninngatitsineq taakku nakorsaanermit namminermit aalajangerneqassapput, imaluunniit nakorsaanerup peqanngikkallarnerani nakorsamit nakorsaanerup peqannginnerani Dronning Ingridip Napparsimavissuani tarnikkut nappaatilinnut Immikkoortortaqaarfianni nakorsarneqarnermut akisussaassuseqartumit (nakorsarneqarnermut akisussaalluni nakorsaaneq) aalajangerneqassapput. Nakorsaanerup pisinnaatitaanera taamatut pisoqarnerani tunngaviusumik nakorsanut sulisunut appasinnerusumi inissisimasunut tunniunneqarsinnaanngilaq.

Taamaattorli aalajangersakkap aammattaq kinguneraa nakorsaanerup pisinnaatitaaffianik allamut tunniussinerup kingunerissanngikkaa aalajangiinerup nakorsaanerup peqannginnerani nakorsanit allanit aalajangerneqarsinnaasoq. Nakorsaanerup peqannginnerani nakorsaq aalajangiippat taava nakorsaaneq *piaarnerpaamik* aamma kingusinnerpaamik nalunaaquttap akunerisa 24-t qaangiunneranni nakorsap pinngitsaaliissummik atuineq pillugu aalajangiineranut isummissaaq, tassa imaappoq piffissami siullerpaami. Nakorsaanerup isummerneru pinngitsaaliissummik iliuseqarnerit pillugit allattaavissuarmut allanneqassaaq.

Aalajangersakkami tarnimikkut napparsimasut tarnikkut napparsimanermi pisariaqartumik nakorsarneqarnissaat qulakkeerneqarpoq aammattaq nakorsaanerup peqannginnerata nalaani, taassumalu pinngitsaaliissummik iliuseqarnermut tamatumunnga attuumassuteqartumik akuersissuteqarnera pissarsiarineqarsinnaanani.

Siunnersuummi § 11, imm. 2 aamma § 34, imm. 2, imm. 4 aamma imm. 5 isummerfiginninnissamut piffissarititaasut allartorneqarsimasut tassa napparsimavimmi pinngitsaaliissummik uninngatitsisoqarnissaanut aalajangerneq aammattaq pinngitsaaliissummik atuinissaq pillugu aalajangerneq nakorsap pinngitsaaliissummik atuinissamik aalajangernerannit allartissasut, taamaattumillu nakorsaanerup tamatuma kingornatigut nakorsap aalajangiisimaneranit akuersissuteqarneranit sunniuteqarfigineqassanngillat.

Nakorsaaneq soorlu assersuutigalugu nakorsap napparsimasup napparsimavimmut pinngitsaaliissummik unitsitsineqarnissaanut imaluunniit napparsimavimmi pinngitsaaliissummik uninngatinnerneqarnissaanut aalajangiineranik atorunnaarsitsippat, nammineersinnaajunnaarsitsisimaneq ingerlaannartumik atorunnaarsinneqassaaq tassami tamatumunnga piumasaqaatit eqquutsinneqarunnaarmata. Pisoq tunngavimmigut pisunit allaanerunngilaq naammagittaalliorfiusumit nammineersinnaajunnaarsitsineq inatsisinik unioqqutitsinertut nalunaarutigineqarpat, tassa pinngitsaaliissummik napparsimavimmut unitsitsinermut imaluunniit pinngitsaaliissummik napparsimavimmi uninngatitsinermut piumasaqaatit naammassineqarsimasutut isigineqannginneri pissutigalugit. Taamatuttaaq tamanna atuuppoq pinngitsaaliissutinik allanik atuiluni iliuseqarnernut tunngatillugu.

Malugineqassaaq inatsimmi napparsimasut pisinnaatitaaffii qulakkeerniarlugit aalajangersak-
kat nalinginnaasut soorunalimi aammattaaq atuummata, tassa nakorsaanerup peqannginnerani
nakorsap pinngitsaaliissummik atuinissamik aalajangiineranut tunngatillugu. Ilaatigut taman-
na imatut paasineqassaaq pinngitsaaliissut sunaluunniit atorneqartillugu napparsimasooq sulii i-
litsersorneqassamat iliuuserineqartumut naammagittaalliuteqarnissamat periarfissaqarnera
pillugu, aammattaaq pinngitsaaliissummik katsorsaanerumut aalajangiineq aallaavigalugu ki-
nguartsinissamat sunniuteqanngimmat, tak. siunnersuutip § 41. Tamatuma taamatuttaaq ki-
ngunerissava napparsimasup siunnersortia pinngitsaaliissut atorneqartoq pillugu paasitinne-
qassamat aammattaaq paasissutissamat allamat suugaluartumut tunngatillugu, tassa pineqar-
tup toqqarneqarsimanermini suliiassani isumannaatsumik suliarisinnaaniassammagit, tak. siun-
nersuummi § 38, imm. 1.

Napparsimasup iluuseqarnek naammagittaalliutigippagu siunnersuummi kapitali 11-mi naam-
magittaalliuteqarnissamat periarfissaqarnerumut aamma eqqartuussivik aqutugalugu ingerlat-
sisinnaanermi ingerlatseriaatsit malinneqassapput.

Tamakku saniatigut immikkoortoq 2.3.2-mut nalinginnaasumik oqaaseqaatit innersuunneqar-
put.

Kapitali 3
Nammineersinnaajunnaarsitsineq

§ 7-imut

Aalajangersakkamut siunnersuutigineqartumut ilaapput napparsimavimmut pinngitsaaliissummik unitsitsinermi aamma napparsimavimmi pinngitsaaliissummik uninngatitsinermi ataatsimoortumik atugassat, naleqq. § 8 imm. 4, aamma § 11 imm. 1.

Tunngaviusumik piunasaqaat tassaavoq inuup silanngajaartuunissaa imaluunniit silanngajaarnermut sanilliunneqarsinnaalluartumik pissuseqarnissaa. Silanngajaarnermut oqariaatsimut tunngatillugu aamma oqaaseqatigiinnut "imatut pissuseqarpat, tamanna tamatumunnga sanilliunneqarsinnaalluarluni" tunngatillugu immikkoortoq 2.4.1-imi nalinginnaasumik oqaaseqaatit innersuunneqarput.

Silanngajaarnerup piunerata saniatigut imaluunniit pissuseq tamatumunnga sanilliunneqarsinnaalluartoq pigineqarpat, napparsimavimmut pinngitsaaliissummik imaluunniit napparsimavimmi pinngitsaaliissummik uninngatitsinissamut piunasaqaataapput nakorsarneqartariaqarnerup killinganiinnerup imaluunniit ulorianartorsiortitsisinnaanerup killinganiinnerup naammassineqarnissaat.

Ulorianartorsiortitsisinnaanerup ersiutaa tassaasinnaavoq inuk imminut navianartorsiortittoq, ilisarnaat tassaagajuttarpoq imminut toqunnissaminut imaluunniit imminut ajoquserujussuarnissaminut, imaluunniit allanik navianartorsiortitsinissaminut nalorninartorsiortitsinera. Ulorianartorsiortitsisinnaanerup annertullunilu ilimanaateqarluinnarnissaa piunasaqaataavoq.

Napparsimavimmut pinngitsaaliissummik unitsitsinnissaq aamma napparsimavimmi pinngitsaaliissummik uninngatitsinissaq nakorsarneqartariaqarnerup ersuitaa tunngavigalugu taamaallaat pisinnaavoq, napparsimajunnaarnissamut imaluunniit malunnaateqarluartumik aamma pingaarutilimmik pitsanngoriarsinnaanermut neriuuteqarsinnaaneq taamak iliortoqangipat malunnaateqarluartumik ajornerulissammata.

Silanngajaarluni nappaatigisap immini ajorunnaavinnissaa piunasaqaatigineqarsinnaanngilaq. Taamaattorli erseqqissumik tunngavissaqarluassaaq nakorsarneqarnerup malunnaateqarluartumik iluaqutaanissaa imaluunniit qanoq issutsip tassanngaannartumik ajornerulersinnaanera pitsaaliorneqarsinnaalluni. Pitsanngorneq malunnaateqarluartoq aammattaaq naammassaaq nakorsarneqartariaqarnerup ersuitaa tunngavigalugu nakorsaasoqarnissaanut piunasaqaatit naammassineqarnerannut. Piviusumik neriuortoqassaaq napparsimasup napparsimavimmi nakorsarneqarnermi kingunerisaanik qanoq innerata annertuumik iluaallannissaa, tassa nakorsarneqarnerup kingunerissallugu napparsimavimmit angerlartinneqarneq.

Taamatuttaa q nakorsartinnissaq siunertaralugu napparsimasumik nammineersinnaajunnaarsitsinnginneq akisussaassuseqanngitsuliornertut isigisariaqarnera piunasaqaataavoq. Taamatut piunasaqaateqarnikkut aalajangersagaq taanna naapertorlugu nammineersinnaajunnaarsitsineq nakorsartinnissamik siunertaqartoq erseqqissarneqarpoq. Napparsimasoq imminut navianartorsiortippat imaluunniit allanik navianartorsiortitsippat piunasaqaatip taaneqartup eqqortinneqarnera naammaginatutut isigisariaqarpoq, tassa nakorsarneqarnikkut ulorianassutsip iluaquserneqarnissaa naatsorsuutigineqarsinnaappat, naak tamatumunnga ilutigitillugu tarnikkut napparsimanagerup taamaaqataataluunniit ajorunnaarsinneqarnissaa imaluunniit iluaallannissaa ilimanaateqanngikkaluartoq.

Aalajangersakkat siunnersuutigineqartut pinngitsaaliissummik napparsimavimmut unitsitsinermut aamma pinngitsaaliissummik napparsimavimmi uninngatitsinermut tunngasut inunnet inersimasuunngitsunut aammattaaq atuupput – kiffaangissusiiagaasimasunut aamma ukiukitsunut. Taakku saniatigut § 2, imm. 2-mut oqaaseqaatit immikkut ittut innersuunneqarput.

Napparsimavimmut pinngitsaaliissummik unitsitsineq

§ 8-mut

Imm. 1-imut – 2-mut

Siunnersuummi §§ 8-10-mi aalajangersakkat pinngitsaaliissummik napparsimavimmut unitsitsinermi iliuusissanik maleruaqqusaliippat. Dronning Ingridip Napparsimavissuani tarnikkut nappaatilinnut immikkoortortaqaarfimmi uninnganeq eqqaassanngikkaanni, pinngitsaaliissummik napparsimavimmut unitsitsinissami napparsimasup sumiiffia apeqqutaanngilaq. Taamaallilluni pinngitsaaliissummik napparsimavimmut unitsitsisoqarsinnaavoq napparsimasup sumiiffianiit najugaanersoq, najukkami napparsimaviunersoq imaluunniit peqqissaaviunersoq apeqqutaatinnagit.

Napparsimasoq Dronning Ingridip Napparsimavissuani tarnikkut nappaatilinnut Immikkoortortaqaarfianni uninngappat pinngitsaaliissummik unitsitsineq isummerfigineqassanngilaq kisianni pinngitsaaliissummik uninngatitsilersinnaanissaq isummerfigineqassalluni.

Qanigisat tassa imaappoq nalinginnaasumik tasaanerusut katissimallugu aapparisaq, inooqatigisaq, angajoqqaat, qitornat inersimasut aamma inuit inoqutigiinnut ilaasut allat, pisussaaffeqarput napparsimaveqarfimmut attaveqassallutik inuk silanngajaarnasorisaaq nammineq piunmassutsini naapertorlugu nakorsamit pisariartumik ikiorneqarnissani pillugu saaffiginninngippat, tak. § 8, imm. 1. Qanigisaasut piunasaqaammik tamatumunnga eqqortitsinngippata imaluunniit napparsimasoq qanigisaqanngippat politiit peqqinnissaqarfimmut saaffiginninnissaq pisussaaffigaat, tak. § 8, imm. 2. Peqqinnissaqarfimmut tunngatillugu nunap immikkoortuani qitiusumik napparsimavik qaninneq, najukkami peqqissaavik imaluunniit nunaqarfimmi na-

korsiantitsivik matumani pineqarput. Pineqartumi kingullermi nakorsiantitsivimmit suliassari-neqarpoq napparsimasup misissorneqarnissaa siunertaralugu, nakorsamut qaninnerpaamiittu-mut attaveqarnissaq.

Imm. 3-4-mut

Nakorsap aggersarneqartup napparsimasooq misissoreerlugu napparsimavimmut unitsinneqar-tariaqartoq paasiguniuk, siunnersuummi § 5, imm. 1 naapertorlugu napparsimasup napparsi-mavimmut unitsinneqarnissaanut akuersitinniassavaa. Napparsimasooq napparsimavimmut u-nikkumanngippat nalinginnaasumik napparsimasup akerliunera ataqqillugu unitsinneqassan-gilaq. Kisianni napparsimavimmut pinngitsaaliissummik unitsinneqarnissamut piumasaqaa-tit, tak. siunnersuummi § 7 naapertorlugu eqquuppata, napparsimavimmut pinngitsaaliissum-mik unitsitsisoqassaaq. Taamaattoqarpat nakorsaq uppersaammik suliaqassaaq tassani na-lunaarlugit ilaatigut nakorsap napparsimasup nappaatigisaatut ilimagisani, silaqassutsimigut qanoq innera aamma paasissutissat ulorianassutsimut imaluunniit nakorsarneqartariaqarner-mut ilisarnaatip naammassineqarnerannit nakorsamut tapersiutaasut nalunaarsorlugit, tak. § 8, imm. 4.

§ 9-mut

Imm. 1-imut

Napparsimavimmut pinngitsaaliissummik unitsitsinerup piviusumik naammassineqarnissaa siunnersuut naapertorlugu politiinut suliassannngortinneqarpoq, tak. § 9, imm. 1. Napparsima-vimmut pinngitsaaliissummik unitsitsinerumut pappiaqqat politiinit sularinnittutut atsiorneqas-sapput. Tamatumunnga atatillugu politiit nakkutigissavaat periaatsip eqqortup atorneqarsima-nera, kiisalu nakorsamit uppersaamma paasissutissat napparsimavimmut pinngitsaaliissum-mik unitsitsinerumut tunngavilersuutaasut pisariaqartut ilanngunneqarsimanersut.

Imm. 2-mut

Napparsimavimmut pinngitsaaliissummik unitsitsineq taamaallaat ingerlanneqarsinnaavoq nakorsap uppersaasiineranik tunngaveqarluni, tamatumani tunngavigineqassaaq napparsimavimmut pinngitsaaliissummik unitsitsinissaq siunertaralugu nakorsap aggersarneqarsimasup misissuisimanera.

Eqqortumik iliuseqarnissamut piunasaqaatit naammassineqarsimassanngillat nakorsaq nammineq siusinnerusukkut allamik pissuteqarluni napparsimasumik misissuisimanini tunngavigalugu uppersaammik suliaqarpat. Tamatumani piunasaqaataavoq napparsimavimmut unitsitsinissaq siunertaralugu piffissami tassani misissuisoqarnissaa, tak. § 9, imm. 2, naggat silleq.

Nakorsanit assigiinngitsunit marlunnit naliliivigineqarnissaq qulakkeerniarlugu, nakorsaq uppersaammik suliaqartoq (nakorsaq napparsimavimmut unitsitsisoq), Dronning Ingridip Napparsimavissuani tarnikkut nappaatilinnut Immikkoortorta qarfianni atorfeqartuussanngilaq, napparsimavimmut pinngitsaaliissummik unitsitsisarneq tassunga atammat, tak. § 9, imm. 2 naggatip aappaa.

Nakorsaq uppersaammik suliaqartoq napparsimavimmut pinngitsaaliissummik unitsinneqartussamut inummut attuumassuteqarpallaartutut akuliussinnaanngitsutut inissisimassanngilaq. Taamaamat nakorsap soorlu assersuutigalugu nammineq aapparissaminik imaluunniit qitornaminik napparsimavimmut pinngitsaaliissummik unitsitsinissamik suliaqarsinnaanngilaq. Inummut attuumassuteqarpallaartutut akuliussinnaannginnermut tunngatillugu, pisortat ingerlatsineranni suliaqartarnerat pillugu inatsimmi § 3 immikkut innersuunneqarpoq.

Imm. 3-mut

Nakorsap misissuineranik nutaajunngitsumik tunngaveqartumik napparsimavimmut pinngitsaaliissummik unitsitsisoqarnissaa pinngitsoorniarlugu, siunnersuummi § 9 imm. 3-mi aalajangersaasoqarnissaa siunnersuutigineqarpoq. Aalajangersagaq naapertorlugu ulorianarsinnaanermut ersiutaasoq tunngavigalugu napparsimavimmut pinngitsaaliissummik unitsitsinermi pilertortumik ingerlanneqartariaqartumi sivilunerpaaq nal. akunnerisa 24-t misissuinerup kingornatigut unitsitsisoqassaaq. Nakorsarneqartariaqarnermut ersiutaasoq tunngavigalugu napparsimavimmut pinngitsaaliissummik unitsitsisoqassappat ullut arfineq marluk killiliunneqarnissaat siunnersuutigineqarpoq. Killiussat allassimasut taakku eqqortinneqanngippata nakorsamit misissuineq nutaaq ingerlanneqassaaq aamma napparsimavimmut pinngitsaaliissummik unitsitsinissamut pappiaqqat nutaat suliarineqassallutik.

§ 10-mut**Imm. 1-imut**

Napparsimavimmut pinngitsaaliissummik unitsitsineq ulorianarsinnaanermut ersiutaasumik tunngaveqarpat, napparsimasoq pinasuartumik peqqinnissaqarfimmut unitsinneqassaaq, tak. § 10, imm.1, naggatsiulleq. Dronning Ingridip Napparsimavissuani tarnikkut nappaatilinnut Immikkoortorta qarfiannut taamaallaat pinngitsaaliissummik unitsitsisoqarsinnaavoq, tak. § 1, imm. 1. Kisianni napparsimasut sinerissami peqqinnissaqarfiup immikkoortuisa arlaanniittut, Dronning Ingridip Napparsimavissuani tarnikkut nappaatilinnut Immikkoortorta qarfiannut nuunneqarnissap tungaanut, sumiiffimmi peqqinnissaqarfiup immikkoortuanut pinasuartumik unitsinneqassapput, tak. § 1, imm. 2.

Nakorsarneqartariaqarnerup ersiuteqarnera tunngavigalugu napparsimavimmut pinngitsaaliissummik unitsitsinissami napparsimasoq piaarnerpaamik, ullullu arfineq marluk qaangiutsinagit, unitsinneqassaaq, tak. § 10, imm. 1, naggatipaappaat.

Imm. 2-mut

Aalajangersakkatut siunnersuutigisaq, siunnersuummi § 10, imm. 2, naapertorlugu Dronning Ingridip Napparsimavissuani tarnikkut nappaatillit Immikkoortorta qarfianni nakorsaaneq, tassaavoq inaarutaasumik ingerlatsinikkut aalajangiisusaaq ilumut napparsimasoq napparsimavimmut pinngitsaaliissummik unitsinneqartutut isigineqassanersoq. Nakorsaaneq tassani pituttorsimaneqanngilaq nakorsap aggersarneqarsimasup naliliineranik ingerlanneqarsimasumik.

Imm. 3-mut

Siunnersuummi § 10, imm. 3-mi Naalakkersuisut ingerlatsinikkut napparsimavimmut pinngitsaaliissummik unitsitsinermi periusissat pillugit sukumiinerusunik maleruaqqusanik aalajangersaasinnaanerat tunngavissinneqarpoq. Taamaalilluni sukumiinerusunik maleruaqqusalior-toqassaaq qanigisat, Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup, nakorsap misissuisup, politiit aammattaaq napparsimaviup qanoq iliorlutik suleqatigiinnissaannut tunngatillugu, tassa inuup tarnimigut napparsimasup napparsimavimmut unitsinneqarneranut atatillugu pinngitsaaliissummik unitsitsinermi piumasaqaatit eqqortinneqarnissaannut atatillugu. Suli piumasaqaataavoq sumiiffinni oqartussaasut qanimut suleqatigineqarnissaat taakkununga ilanngullugit politiit, naak politiit peqataanissaanni Danmarkimi Justitsministeriaqarfik aqputigeqqaarneqartussaagaluartoq.

Tamakku saniatigut pinngitsaaliissummik napparsimavimmut unitsitsinermut atatillugu imm. 2.4.1-imi aamma 2.4.2-mi nassuiaatit nalinginnaasut innersuussutigineqarput.

Napparsimavimmi pinngitsaaliissummik uninngatitsineq

§ 11-mut

Imm. 1-imut

Aalajangersakkap siunnersuutigineqartup napparsimavimmi pinngitsaaliissummik uninngatitsisinnaaneq malittarisassaliuuppaa. Tassa immappoq napparsimasumik Dronning Ingridip Napparsimavissuani tarnikkut nappaatilinnut Immikkoortorta qarfianni uninngasumik tarnimigut napparsimanerminik nakorsarneqartumik angerlartitsinissamik itigartitsisinnaaneq.

Napparsimavimmi pinngitsaaliissummik uninngatitsineq taamaallaat pisinnaavoq § 7-imi atorineqartussatut piomasaaqatit eqqortinneqarpata. Tassa napparsimasoq silanngajaartuussaaq imaluunniit imatut pissuseqassaaq tamanna tamatumunnga sanilliunneqarsinnaalluarluni. Tamatuma saniatigut ulorianartuusinnaaneranut ilisarnaateqarneranut imaluunniit nakorsarneqartariaqartuunermut ilisarnaateqarneranut piomasaaqatit eqquutsinneqassapput. Napparsimavimmi pinngitsaaliissummik uninngatitsisoqarnissaanut piomasaaqatit eqquutsinneqarpata, nakorsaq napparsimasumik angerlartitsinissamut naaggaarnissaminut pisussaataavoq, tak. § 11, imm.1.

Pinngitsaaliissummik Dronning Ingridip Napparsimavissuani tarnikkut nappaatilinnut Immikkoortorta qarfianni unitsitaasimasuinnaanngitsut aammali nammineq piomassusertik naapertorlugu unitsitaasimasut, piomasaaqatit eqquutsinneqarpata pinngitsaaliissummik uninngatinneqarsinnaapput. Taamaattorli napparsimasoq tarnimigut nakorsartinniarluni peqqinnisaqarfiup immikkoortorta qarfianut allamut nammineq piomassutsini naapertorlugu unitsitaasimasoq Dronning Ingridip Napparsimavissuani tarnikkut nappaatilinnut Immikkoortorta qarfianni pinngitsaaliissummik unitsinneqartariaqalerpat angerlartinnissaa itigartitsissutigineqarsinnaavoq, tamatumunnga pissutaavoq pinngitsaaliissummik unitsitsineq taamaallaat tamaani pisinnaammat.

Imm. 2-mut

Maleruaqqusaaq § 11, imm. 2, siullermiittoq napparsimasup siullermeerluni napparsimavimmit angerlarumalluni qinnuteqaateqarneranut atuutiinnarnani, kisianni aammattaaq pisimasuni siusinnerusukkut napparsimasup napparsimavimmit angerlartinneqarnissaminut qinnuteqaateqarnerminut itigartinneqarsimappat tamannalu pillugu nutaamik qinnuteqaateqarpat atuuppoq.

Napparsimavimmut pinngitsaaliissummik uninngatitsisoqartillugu napparsimasumut siunnersuisunngortitsisoqassaaq imaanngippat siusinnerusukkut napparsimasumut taamaattumik toqqaasoqareersimalluni, soorlu assersuutigalugu napparsimavimmut pinngitsaaliissummik unitsinneqarnissaaq sioqqullugu imaluunniit siusinnerusukkut napparsimavimmi pinngitsaaliissummik uninngatinneqarnerminut atatillugu.

§ 11, imm. 2, naggatit aappaat immikkut maleruaqqusamik ilaqarpoq tassani taamaallaat, napparsimasoq napparsimavimmut pinngitsaaliissummik unitsinneqarsimasoq, pinngitsaaliissummik unitsinneqarnerup kingornatigut ulloq unnuarlu siulleq napparsimavimmit angerlartinneqarnissaminut qinnuteqaateqartoq pineqarpoq. Taamatut pisoqartillugu Dronning Ingridip

Napparsimavissuani tarnikkut nappaatilinnut Immikkoortorta qarfianni nakorsaanerup piffissamik nakkutiginninnissamik tunineqarnissaa pisariaqassaaq nalunaaquttap akunnerinik 24-nit sivilunerusumik, tassani isummerfigissamagu napparsimavimmut pinngitsaaliissummik unitsinneqarsimasoq pinngitsaaliissummik uninngatinneqalissanersoq. Siunnersuutigineqarpoq napparsimavimmut pinngitsaaliissummik uninngatitsinerup aallartinneranit nalunaaquttap akunnerinik 48-nik taassuma sivilussuseqarnissaa.

Napparsimavimmit angerlartinneqarnissamut qinnuteqaat napparsimasup siunnersortianit saqqummiunneqarsimappat taava taanna tamatutaaq aalajangiineq pillugu ilisimatinneqassaaq.

Tamakku saniatigut imm. 2.4-imi nammineersinnaajunnaarsitsineq pillugu oqaaseqaatit naliginnaasut innersuussutigineqarput.

Oqqussineq

§ 12-imut

Imm. 1-imut – 2-mut

Napparsimasunit nalunaaruteqarnatik anisimasunit aamma takkutinngitsoortunik oqqussarinnissamut aalajangersakkamik ilanngussisoqarnissaa siunnersuutigineqarpoq. Taamaattorli oqqussineq takkutinngitsoornerup paasineqarnerata kingornatigut sapaatit akunnerata ataatsip ingerlanerani taamaallaat pisinnaavoq. Takkutinngitsoornerup paasineqarnerata kingornatigut sapaatit akunna ataaseq qaangiutereersimappat, napparsimavimmut unitsitsinermut pappiaqqat nutaat atorlugit aatsaat unitsitsisoqarsinnaavoq. Pineqartoq akuerineqarluni anisimanermi kingornatigut takkutinngitsoorpat taamatutaaq oqqussinissamut piumasaqaataavoq unnuisinaanerit 3-t anisimanissamut akuersissutigineqarsimanissaat.

Napparsimavimmut pinngitsaaliissummik unitsitaasimasut imaluunniit napparsimavimmi pinngitsaaliissummik uninngatinneqartut piffissap sivikitsuinnaap ingerlanerani oqqunneqarsinnaanerannut periarfissaq, napparsimasup qanoq issusiata allanngorsinnaaneranut attuumassuteqarpoq, tassa pineqartoq napparsimaveqarfiup avataaniinnermini piffissami sivilunerusumi nammineersinnaasimappat. Taamatut pisoqartillugu ataatsimut isiginnilluni siumoortumik ilimasuutigineqarsinnaanngilaq nammineersinnaajunnaarsitsinissamut piumaqataatit suli naammassineqarsimanissaat. Taamatutaaq napparsimasut ilaat piffissami sivilunerusumi napparsimavimmit qimagussimasut kiisalu piaaralutik toqqorsimasimanngitsut, taakkua ilimasuutigersinnaavaat napparsimavimmut oqqunneqannginnissartik.

Aalajangersakkap atuutinneqarneranut pingaartuuvoq napparsimasup pineqartup nammineersinnaajunnaarsinneqarsimasutut inissisimanissaa, tassa pineqartup immikkoortorta qarfimmit qimagunnermi nalaani. Tamanna imatut paasineqassaaq pineqartoq piffissami tassani napparsimavimmut pinngitsaaliissummik unitsinneqarsimassaaq imaluunniit napparsimavimmi pin-

ngitsaaliissummik uninngatinneqarluni. Taamaattumik aalajangersakkami ilanngunneqanngilat inuit piffissami immikkoortortaqaarfimmit qimagunnermik nalaani namminneq piumassusertik tunngavigalugu napparsimavimmi uninngasut. Tamanna atuuppoq taakkua piffissami pineqartumi napparsimavimmi pinngitsaaliissummik uninngatinneqarsinnaagaluarpataluunniit, naak napparsimavimmit angerlartinneqarnissamut qinnuteqaat saqqummiunneqarsimagaluartoq. Taamaattumik inuit taamatut ittut pinngitsaaliissut atorlugu taamaallaat oqqunneqarsinnaapput napparsimavimmut pinngitsaaliissummik unitsitsinermi periuseq atorneqartartoq qimerloorlugu.

Napparsimasup takkutinnitsoornera sanilliunneqartariaqarpoq ilumut napparsimavimmit angerlartinneqarnissamik kissaateqarnermut. Tamatuma kingunerissavaa Dronning Ingridip Napparsimavissuani tarnikkut nappaatilinnut Immikkoortortaqaarfianni nakorsaanerup napparsimasup tikiunnerani isummerfigisariaqarlugu manna, ilumut napparsimavimmi pinngitsaaliissummik uninngatitsinermit piumasaqaataasut (suli) atuutsinneqarsinnaanersut, tak. siunnersuummi § 11.

Nakorsaanerup napparsimasoq napparsimavimmi pinngitsaaliissummik uninngatinneqarnissaa nalilerpagu taava napparsimasup aalajangiineq Tarnimikkut Nappaatillit Maalaarutaannik Aalajangiisartunut suliassanngortissinnaavaa. Taanna napparsimasup pinngitsaaliissummik oqqunneqarnissaanut aalajangiinermuttaaq atuuppoq tak. siunnersuummi § 47, imm. 1, nr. 2 aamma nr. 3. Pisut apeqqutaatillugit Tarnimikkut Nappaatillit Maalaarutaannik Aalajangiisartut aalajangigaat, Kalaallit Nunaanni pinerluttulerinermi inatsimmi kapitali 28, tak. siunnersuutip § 49, imm. 1, naapertorlugu eqqartuussivikkut suliassanngortinneqarsinnaapput.

§ 12, imm. 2-mi piginnaatitsissummik ilanngussisoqarnissaa siunnersuutigineqarpoq tamanna naapertorlugu oqqussinermit atatillugu periutsinut ingerlatsinermi maleruaqqusat aalajangersarneqassammata.

Aalajangersakkami siunertaavoq sammisamut tamatumunnga tunngatillugu maleruaqqusanik ilassutaasunik aalajangersaasoqarnissaa, tassa piviusumik tamatuma pisariaqartinneqarnera takuneqarsinnaappat. Suli piumasaqaataavoq sumiiffinni oqartussaasut qanimut suleqatigineqarnissaat taakkununnga ilanngullugit politiit, naak politiit peqataanissaanni Danmarkimi Justitsministeriaqarfik aqqutigeqqaarneqartussaagaluartoq.

Nammineersinnaajunnaarsitaanerup atorunnaarsinneqarnera

§ 13-imut

Siunnersuummi § 13, imm.1 naapertorlugu nammineersinnaajunnaarsitsineq erniinnartumik atorunnaarsinneqassaaq, nammineersinnaajunnaarsitsinissamut piumasaqaatit § 7 naapertorlugu eqqortinneqarnerat atorunnaarpat. Taamatut pisoqassaaq napparsimasup aalajangiineq pi-

sussanngortissimappagu § 11, imm. 2, naapertorlugu angerlartinneqarnissaminut qinnuteqaammik saqqummiussinermigut, imaluunniit qinnuteqaat taamaattoq saqqummiunneqarsimanngikkaluarpat, tak. § 34, imm. 1, tamakku kingunerisaanik nakorsaanerup nammineq aalarnikkaminik ingerlaavartumik apeqqut nalilersussavaa.

Erseqqissaatigineqarpoq nakorsaaneq tassaasoq pisinnaatinneqartoq nammineersinnaajunnaarsitsinermik atorunnaarsitsinissamut aalajangiinissamut. Taamaattorli tarnimikkut napparsimasut immikkoortotaqarfiani nakorsaq kinaluunniit nakorsaanerup peqannginnerani tamatuminnga aalajangiinissaminut pisinnaatitaavoq, tak. § 6, imm. 1. Tamatumani qulakkeerneqarpoq napparsimasup pisariaqanngitsumik nammineersinnaajunnaarsinneqarsimanissaa. Taamatut pisoqartillugu nakorsaaneq isummerpat napparsimasoq napparsimavimmit angerlartinneqartussaasimanngitsoq, taava napparsimavimmut pinngitsaaliissummik unitsitsinissamut periuseq aallaqqaataaniit allartinneqartariaqarpoq, imaappat nakorsaaneq isumaqarluni § 7-imi nammineersinnaajunnaarsitsinissamut piumasaqaatit eqqortinneqartut, kiisalu napparsimavimmut pinngitsaaliissummik unitsitsinissaq pisariaqarluni.

Nammineersinnaajunnaarsitsinermik atorunnaarsitsinerup kingunerisariaqanngilaa angerlartitsineq, tassami napparsimasup toqqarsinnaammagu nammineq piumassutsini tunngavigalugu napparsimavimmi uninngatinneqaannarnissani.

Kapitali 4-mut

Pinngitsaaliissummik nakorsaasoqartarnera

§ 14-imut

Imm. 1-imut

Nakorsatut suliatigut tarnimikkut napparsimasut nakorsarneqarneqarneranni nakorsaq napparsimasup nakorsarneqarneranik isumaginnittoq aammattaaq pisussaaffeqarpoq napparsimasup akuersissuteqarnissaanik pissarsinissaminut, tak. siunnersuummi § 3, imm. 1 aamma tassunga oqaaseqaatit. Tamanna iluatsinngippat nakorsaasoqarnissaanut pilersaaruteqarneq nalinginnaasumik unitsinneqartariaqarpoq, imaanngippat pineqartoq napparsimavimmut unitsinneqarsimasoq kiisalu napparsimavimmi pinngitsaaliissummik uninngatinneqarnissamut piumasaqaatit eqqortinneqarlutik. Taamaattoqartillugu siunnersuummi § 14, imm. 1 naapertorlugu, taava tarnimigut napparsimasoq nakorsarneqarnera pinngitsaaliissummik ingerlanneqarnissaa periarfissaqassaaq.

Imm. 2-3-mut

Siunnersuummi § 14-imi imm. 2-mi allassimavoq pinngitsaaliissummik nakorsarneqarnissaq pillugu aalajangiineq Dronning Ingridip Napparsimavissuani tarnikkut nappaatilinnut Immikkoortotaqarfianni nakorsaanermit aalajangiiffigineqassasoq.

Siunnersuummi § 14, imm. 3-mi, takuneqarsinnaavoq pinngitsaaliissummik nakorsarneqarneq taamaallaat Dronning Ingridip Napparsimavissuani ingerlanneqarsinnaasoq. Pinngitsaaliissummik nakorsarneqarneq tassaavoq pinngitsaaliissummik nakorsaatitortitsineqarneq, innaallagialaq atorlugu sianiutiniq sunniineq aamma pinngitsaaliissummik nerisinneqarneq. Piumasaqaat tassa aammattaaq pinngitsaaliissummik nakorsaatitortitsineq taamaallaat Dronning Ingridip Napparsimavissuani ingerlanneqarsinnaaneranut tunngasoq, tassunga tunngavigineqartut isigineqassaaq napparsimasunik tarnimikkut napparsimasunik nakorsaatitortitsineq, tamatumunnga ilanngullugu pinngitsaaliissummik atuisinnaaneq tamanna tassaamat napparsimasup pitsanngoriarnissaanut aamma iluaallannissaanut isumalluarnissamut iliuuserineqartoq pingaaruteqarluinnartoq. Taamaalluni nakorsarneqarnissap pilersaaruserneqarnera aamma ingerlanneqarnera tarnimikkut napparsimasunut immikkut immikkoortortaqaqfimmi ingerlanneqassapput.

Napparsimavimmut pinngitsaaliissummik unitsitsinissaq najukkami napparsimavimmi imaluunniit qitiusumik napparsimavimmi aallartinneqarsimatillugu, napparsimasoq eqqissisaammik nakorsaatitortissallugu pisariaqalersimappat, tamanna pissaaq § 25-mi piumasaqaataasut isiginiarlugit.

Imm. 4-mut

Siunnersuummi § 14 imm. 4-mi allassimavoq pinngitsaaliissummik nakorsaatitortitsinermi nakorsaatit misilittarneqareersut atorneqassasut nalinginnaasumik annertussusilerlugit aamma allanik saniatigut peruluutaasunik annikinnerpaamik sunniuteqarsinnaasut. Maleruaqqusap qulakkiissavaa napparsimasup sapinngisamik annikinnerpaamik nakorsaatit atorneqartumit ajoquserneqarnissaa.

Siunnersuummi erseqqissaatigineqarpoq saniatigut sunniutit allat amerlassusiat pingaartinneqanngitsoq, kisianni pinartunik saniatigut allanik sunniutaasa amerlassusii pineqarlutik. Pinartunik saniatigut allanik sunniutai pillugit ilanngussinermi napparsimasup katsorsartinermi nalaani pisariaqanngitsunik pinartunut ajoqutaasinnaasunut illersorneqarnissaa ujartorneqarpoq. § 14-imut ilanngussap taamaalluni nakorsaatit napparsimasunut peruluutaasumik sapinngisamik annikinnerpaamik ajoqusiisinnasut atorneqarnissaat qulakkiissavaa. Nakorsaatinut misilittarneqarsimasunut tunngatillugu nakorsaatissat ilisimaneqarluareersut pineqarput, uani ilanngunneqareersut Sundhedsstyrelsens Specialitetsregister-imi, tak. Lægeforeningens Medicinfortegnelse og Lægemiddelkataloget. Nalinginnaasumik annertussusiliinermi pineqarpoq nakorsaatitortitsinermi malittarisassat lægemiddelfortegnelsen-imi (nakorsaatit allattorsimaffianni) allassimasut kiisalu pitsaasumik nakorsatut sulinertut ittoq malinneqassapput. Immikkut annertunerusumik annertussusilinnik nakorsaatitortitsineq taamaalluni pissusissamisunngilaq. Napparsimasunik pinngitsaaliissummik nakorsaatitortitsinermi nakorsaatit sivisuumik sunniuteqartartut aallarniutigalugit nakorsaatit atorneqartariaqanngillat nappaatip suussusia tamakkiisumik paasineqanngippat, aamma napparsimasut katsorsartinnertik qanoq qisuariarfiggissaneraat ilisimaneqanngippat. Kisianni nakorsaatit sivisuumik sunniuteqartartut nappaataa-

sa suussusiannik paasisaqarluarsimanikkut katsorsaaneermut akuerineqarsinnaapput napparsimasut kingumut napparsimaqqilersimanerat pissutigalugu pinngitsaaliissummik unitsinneqarsimappata.

Pinngitsaaliissummik nakorsaaitortitsinermi nakorsaq tamatigut najuutissaaq. Nakorsaaitortitsineq napparsimasumut isertuullugu ingerlanneqassanngilaq soorlu nerisaanut imaluunniit imigaanut nakorsaatini akulerussinikkut, imaluunniit nakorsaatinut allanut napparsimasup sungiussimasaanut ilanngussinikkut.

Imm. 5-imut

Pinngitsaaliissummik nakorsaaitortitsinerup saniatigut pinngitsaaliissummik nakorsartinnerit allat ingerlanneqarnissaannut pisariaqartitsineq qaqutikkut pisarpoq, kisianni naleqquttuulluni soorlu assersuutigalugu innaallagiaq atorlugu sianiutini sunniinikkut aamma pinngitsaaliissummik nerisitsinikkut. Pinngitsaaliissummik nakorsartinnissaaq Dronning Ingridip Napparsimavissuani tarnikkut nappaatilinnut Immikkoortortaqaarfianni ingerlanneqarsinnaavoq imaluunniit napparsimavissuarmi immikkoortoaqarfimmi allami immikkut ilisimasaqarfiusumi tuluartumilu, tassa nakorsartinnermik pitsaanerpaamik ingerlatsiviusinnaasumi.

Siunnersuummi § 14, imm. 5 tunngavigalugu innaallagiaq atorlugu sianiutini sunniinermi allamik pinngitsaaliissummik katsorsartinnermut atatillugu immikkut piumasaqaatit arlaqartut ilanngunneqarput. Tamatumani siunertarineqanngilaq innaallagiaq atorlugu sianiutini sunniineq pinngitsaaliissummik nakorsaasoqarnerani allamik taamatut nakorsaasoqarnera annertunerusutut paasinarsisissallugu. Akerlianik innaallagiaq atorlugu sianiutini sunniineq pissutsini aalajangersimasuni tassaasinnaavoq qajassuussilluni nakorsaasoqarnerani atorneqarsinnaasoq. Taamaattorli innaallagiaq atorlugu sianiutini sunniineq piviusumik atorneqartarpoq inuunermik navianartorsiortoqarnerani. Aalajangersakkami oqaasiliernerit taamaallit siunertaraat inatsisitigut atuuttuusunik erseqqissaateqarnissaaq. Inatsisitigut isumannaatsuunissamut tunngasutigut mianereqquneqarput inatsimmi piumasaqaataasut allassimasuunissaat.

Innaallagiaq atorlugu sianiutini sunniinerup atorneqarsinnaaneranut pisumut assersuutigineqarsinnaavoq qanoq issutsimi tassanngaannartumik paatsiveerunnertut taaneqarsinnaasoq. Taamatut paatsiveerunneq ilaatigut tarnikkut nappaatip allatut pissuseqalerneratigut pilersinnaavoq. Taamatut tassanngaannartumik paatsiveerunneq takorruinernik, siniuinnermik aamma eqqissiviilluni aalasalernermik malunnaateqartitsisinnaasarpoq. Piffissap sivikitsup ingerlanerani kissarneqarujussuortoqalersinnaavoq, imerpalasumik timi amigaateqalerluni aamma sanngiillinermik, napparsimasoq pilertortorujussuarmik toqusinnaalluni nakorsarneqarnera aallartinneqanngippat. Tassanngaannartumik paatsiveerunneq inuunermik ulorianartorsititsilernerumut aallarpat pinngitsaaliissummik innaallagiaq atorlugu sianiutini sunniinermik atuisoqarnissaa pisariaqartutut paasinarsisinnaavoq.

Annertuumik isummakkut nanertisimanerit ataasiakkaat inuunermik ulorianartorsititsilersinnaasarput. Napparsimasoq sakkortooujussuarmik imaluunniit tassanngaannartumik immi-

nut toqunnissamut ulorianartorsiorsinnaavoq imaluunniit ilaguutiinnaleqqalluni, inuunermut pingaaruteqartut nalorninartorsiortinneqarlutik, soorlu assersuutigalugu nerisaqannginneq aamma imertannginneq pissutigalugit. Taamatut pisoqartillugu innaallagialu atorlugu sianiutini sunniineq pinngitsaaliissummik ingerlanneqarnissaa eqqarsaatigineqarsinnaavoq.

Napparsimasut inatsisitigut inassisimanerat pillugu Inatsisartut peqqussutaat nr. 6, 31. maj 2001-imeersaq tunngavigalugu napparsimasoq neriumajunnaarsinnaavoq, aalersorneqarnissani itigartitsissutigalugu, inuunerup sivitsorneqarsinnaaneranut nakorsartinnissaq itigartitsissutigalugu il.il. piumasaqaatit aalajangersimasut tunngavigalugit, tak. Inatsisartut Peqqussutaat §§ 14 – 17. Aalajangersakkat taakku siunnersuummi § 7-imi napparsimasunut ilaatinneqanngitsunut suli atorneqaannassapput.

Napparsimasup soorlu assersuutigalugu neriumajunnaarnissani kissaatigippagu tamatumunngalu ilutigitillugu silanngajaartuulluni imaluunniit pissusia tamatumunnga assersuunneqarsinnaalluarluni, taava § 14, imm.1-imi aalajangersagaq naapertorlugu pinngitsaaliissummik iliuuseqarfigineqarsinnaavoq soorlu assersuutigalugu pinngitsaaliissummik nerisinneratigut. Tamatumunnga pissutaavoq pineqartoq silanngajaarnini pissutigalugu eqqarsaatigilluakkaminik iliuseqarnerata immaqa tunngaveqannginnera, kisianni akerlianik taamatut iliornera silanngajaarneranit tunngaveqarnerusinnaalluni.

Imm. 6-imut

Siunnersuummi § 14 imm. 6 naapertorlugu napparsimasoq pinngitsaaliissummik nakorsarneqannginnerani naleqquttumik eqqarsarfissinneqassaaq. Eqqarsarfissinneqarnerup sivilissusia nakorsamit erseqqissumik nalilerneqassaaq pinngitsaaliissummik nakorsartinnissap qanoq tassanngaannartigisumik pisariaqartigineramik naliliinermik tunngaveqartumik.

Imm. 7-imut

Siunnersuummi § 14-imi imm. 7-imi aalajangersagaq manna naapertorlugu pinngitsaaliissummik nakorsarneqarnissaq pillugu Naalakkersuisut maleruaqqusaliornissaannut pisinnaatinneqarput. Taamaalilluni pinngitsaaliissummik nakorsaatitortitsinissamut, pinngitsaaliilluni nerisitsinissamut aamma innaallagialu atorlugu sianiutini sunniinissamut sukumiinerusunik maleruaqqusaliortoqarsinnaavoq.

§ 15-imut

Imm. 1-imut - 2-mut

Siunnersuummi § 14-imi tarnimikkut napparsimasut tarnimikkut nappaatigisaannik pinngitsaaliissummik nakorsaasoqarnissaa maleruaqqusaliorneqarpoq, § 15-imi pisut aalajangersimasut tunngavigalugit tarnimikkut napparsimasut timimikkut anniaatigisinnaasaannik pinngitsaaliissummik nakorsaasinnaaneq periarfissinneqarpoq.

Taama timikkut anniaatigisanik pinngitsaaliissummik nakorsartinneq taamaallaat pisinnaavoq, siullertut napparsimavimmi pinngitsaaliissummik uninngatitsinissamut piumasaqaatit eqquutsinneqarsimappata. Taamaattumik napparsimasoq silanngajaassaaq imaluunniit imatut pissuseqassaaq tamanna silanngajaarnermut sanilliunneqarsinnaalluarluni, tamatutaaq eqquutsinneqassapput ulorianartuusinnaanerup ilisarnaatai imaluunniit nakorsartariaqarnerup ilisarnaatai.

Aappaattut timikkut anniaatigisaaq ima peruluutaatigissaaq tamanna napparsimasup inuuneranut navianaateqarluni imaluunniit peqqissusianut annertuumik ajoqusiisinnaalluni.

Kiisalu timikkut nakorsartittunut immikkoortortaqarfimmi nakorsaanerup aamma Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaanerup, akunnerminni timikkut anniaatip pinngitsaaliissummik nakorsarneqarnissaanut piumasaqaataasut eqquutsinneqarneri isumaqatigiissutigissavaat, tak. siunnersuummi § 15 imm. 2.

Pisariaqarpat nakorsartinnissaaq siunertaralugu napparsimasoq timimikkut nakorsartinnermut immikkoortortaqarfimmut nuunneqarsinnaavoq.

Napparsimasut timimikkut aanniaatilinnut immikkoortortaqarfianni uninngasut, Dronning Ingridip Napparsimavissuani tarnikkut nappaatilinnut Immikkoortortaqarfiannit, tassunga nuutsinneqarsimanatik § 15 imm. 2-mi, naggatit aappaanni aalajangersagaq naapertorlugu tunngaviusumik aalajangersakkamut ilaatinneqanngillat, naak napparsimavimmi pinngitsaaliissummik uninngatinneqarnissamut aalajangersakkat eqquutsinneqaraluartut. Taamaalliluni aalajangersagaq taanna naapertorlugu, pinngitsaaliissummik nakorsaasinnaanermi §§ 8-10 naapertorlugit tamanna sioqqullugu napparsimavimmut pinngitsaaliissummik unitsitaasimannissaaq piumasaqaataavoq.

Dronning Ingridip Napparsimavissuani tarnikkut nappaatilinnut Immikkoortortaqarfianni nammineq piumassusertik tunngavigalugu uninngasut pineqartillugit § 7-imi piumasaqaatit eqquutsinneqarpata, taakkuninnga napparsimavimmut pinngitsaaliissummik unitsitseqqaarnani pinngitsaaliissummik nakorsaasoqarsinnaavoq aamma Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaanerup aalajangerpagu, napparsimavimmut pinngitsaaliissummik unitsitsinissamut piumasaqaatit eqquutsinneqartut, tak. § 10, imm. 2. Tarnimigut napparsimasoq sinerissami napparsimavimmi imaluunniit peqqissaviit arlaanni nammineq piumassutsini tunngavigalugu uninngappat, pinngitsaaliissummik kat-

sorsaanissami Dronning Ingridip Napparsimavissuani tarnikkut nappaatilinnut Immikkoortortaarfiani pinngitsaaliissummik unitsitseqqaarnissaq piumasaqaataavoq, tak. § 15, imm. 1, naggatit aappaat.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq naapertorlugu piumasaqaatit aalajangersimasut tunngavigalugit, napparsimasoq neriumajunnaarsinnaavoq, aalorsorneqarnissaminut itigartitsisinnaavoq, inuuneq sivitsorsarniarlugu nakorsarneqarnissaminut itigartitsisinnaavoq il.il. tak. Inatsisartut Peqqussutaanni §§ 14-17. Aalajangersakkat taakku suli atuutiinnassapput napparsimasunut siunnersuummi § 7-imut ilaatinneqanngitsunut.

Siunnersuummi § 15, imm. 3-mi Naalackersuisut piginnaatinneqarput aalajangersagaq taman-na naapertorlugu pinngitsaaliissummik nakorsaanissamut sukumiinerusunik maleruaqqusalornissaminut. Taamaaliornikkut ingerlatsivimmit Dronning Ingridip Napparsimavissuani tarnikkut nappaatilinnut Immikkoortortaarfik aamma timikkut nappaateqarnermut immikkoortortaarfimmi nakorsaq pineqartoq suleqatigalugit maleruaqqusat sukumiinerusut aalajangersarneqarsinnaapput, tamatumunnga ilanngullugit pinngitsaaliissummik nakorsartinnerup ingerlanneqarnissanut sukumiinerusut.

Tamatuma saniatigut immikkoortoq 2.5-imi oqaaseqaatit nalinginnaasut pinngitsaaliissummik nakorsaasoqartarneranut tunngasut innersuussutigineqarput.

Kapitali 5-imut

Napparsimavimmit angerlartitsinerup kingornatigut malinnaaffiginninneq

§§ 16 aamma 17-imut

Napparsimavimmit angerlartitsinneqareernermi isumaqatigiissusiuunneqartuni aamma ataqatigiissaanissamut pilersaarutini angorusutat tassaapput napparsimasut peruluutaasumik tarnikkut napparsimasut, tassa malunnaateqarluartumik peqqikkunnaarnermik sunniuteqarfigineqartussat, nakorsarneqarnermikkut imaluunniit inunnik isumaginninnikkut tapersorsorneqanngikkunik. Napparsimasut pineqartut soorlu assersuutigalugit tassaasinnaapput tarnikkut nappaammik skitzofreniimik nappaateqarnerup saniatigut atornerluisuusut imaluunniit inuuniarnermikkut annertuumik ajornartorsiuteqartut.

Pitsaasumik ingerlatsinissamut ileqqup malittaani napparsimavimmit angerlartinneqarnermi isumaqatigiissummi imaluunniit ataqatigiissaanermut pilersaarummi ilaatinneqartariaqarput napparsimasup maannakkorpiaq aamma siunissami katsorsartinnissamut aamma inunnik isumaginninnikkut neqeroorutaasussatut pisariaqartitai. Taamatuttaaq tassani ilanngunneqartaria-

qarput katsorsaaniissamut neqeroorutissat tulluartut aamma qaammatisiutit ulluat aamma nalunaaqutaq oqartussaasumik pineqartumik il.il. siullerpaamik ataatsimeeqateqarnissamut tunngatillugu. Ilanngunneqartariaqarportaaq kiap malittarinnittussatut akisussaasuunera aamma kina isumaqatigiissut eqquutsinneqanngippat iliuseqassanersoq. Naggataatigut isumaqatigiissut qaqugu atorunnaassanersoq kiisalu qaqugu naliliivigineqarnissaa ilanngunneqartariaqarput.

Siunnersuummi § 16, imm. 2 aamma § 17, imm. 2-mi Naalakkersuisut piginnaatinneqarput napparsimavimmit angerlartitsinneqareernermi isumaqatigiissutigineqartut aamma ataqatigiissaanissamut pilersaarutit Nunatta Nakorsaaneqarfiani nalunaarsorneqarnissaannut maleruaqqusanik aalajangersaanissamut. Tamatumunnga atatillugu Naalakkersuisut maleruaqqusanit aalajangersaasinnaapput ataqatigiissaanissamut pilersaarutini aamma isumaqatigiissutigineqartuni napparsimasup kinaassusianik ilaqartinneqassanersut.

Tamatuma saniatigut immikkoortoq 2.6-imi oqaaseqaatit nalinginnaasut napparsimavimmit angerlartinneqareernermi malittarineqarneq tunngasut innersuussutigineqarput.

§ 18-imut

Napparsimavimmit angerlartinneqarnermut atatillugu isumaqatigiissusiortoqarsimappat imaluunniit ataqatigiissaaneremut pilersaarusiortoqarsimappat, § 18-imi siunnersuutigineqarpoq tarnimikkut napparsimasunut immikkoortorta qarfiup pisorta qarfiit allat, peqqinnissamik sullissit assigisaasalu akunnerminni paasissutissanik, napparsimasup inuttut nammineq inuuneranut tunngasunik, paarlaasseqatigiittarsinnaanerit.

Napparsimasoq sapinngisaq tamaat ikiorsinnaassagaanni tapersorsinnaassagaannilu, paasissutissanik inummut nammineremut tunngasunik paarlaasseqatigiittarnissaq pisariaqarpoq. Inummut nammineremut tunngalluinnartut ilaatigut tassaapput nappaammut tunngatillugu paasissutissat, peqqissuseq, inuup peqqinnissaqarfimmu attaveqarnera, ilaqutariinneremut tunngasut, isertitaqarneremut tunngasut il.il.

§ 19-imut

Imm. 1-imut

Napparsimavimmiit angerlartinneqareernermi pinngitsaaliissummik inuit malinnaaffigineqartussat tassaapput napparsimasut sanngiinnerpaat. Dronning Ingridip Napparsimavissuani tarnikkut nappaatilinnut Immikkoortorta qarfianni naammaginakannersumik nakorsarneqarsimallutik angerlartitaasut, tamatigut nakorsaatornerminnik unitsitsisartut tamatumalu nassatariisaanik nappaqqillutik aamma pisariaqarpat napparsimavimmut pinngitsaaliissummik unitsin-

neqaqqittariallit. Napparsimasut sanngiinnerpaat ikittuinnaat matumani pineqarput § 19-ip ilanngunneqarnera sioqqullugu anguneqarsinnaasimangitsut.

Taamaaliornikkut inatsisitigut illersugaanikkut kingunerluutilimmut saqisitsinnginnissaq qulakkeerniarlugu periarfissallu pisariaqanngitsumik atorneqaqqunagit, angerlartitaareernermi innunnik pinngitsaaliissummik malinnaaffigisarialinnik immikkoortitsisussanik, maleruaqqusanik piunasaqaatitalinnik 4-nik ilanngussisoqarnissaa siunnersuutigineqarpoq. Piunasaqaatit tamarmik eqquutsinneqarpata aatsaat napparsimavimmiit angerlartitaareernermi pinngitsaaliissummik malinnaaffiginnittoqarsinnaavoq.

Tamatumani siullermik *tungaveqartumik annilaangassutigineqassaaq aamma ilimanarluinnassaaq* napparsimasup napparsimavimmit angerlartinneqareernermi kingornatigut nakorsarneqarnini, namminerminut napparsimasutut peqqissutsiminut pisariaqartuusup taamaatitsinissaa.

Taama piunasaqaateqarnek napparsimavimmi uninnganermut pineqartumut tungassuteqassaaq. Tassa imaappoq napparsimavimmi uninnganerup nalaani pissutsit suut tungavigalugit, napparsimasup napparsimavimmit angerlareernermi kingornatigut pisarialimmik nakorsartinnerminik taamaatitsinissaata ilimanaateqarlunnarnera nalunaarneqassaaq. Napparsimasut pineqartut napparsimavimmit angerlareernermik kingornatigut, nappaat utersaaqqunagu nakorsaanerup pisariaqartutut naliligaanik, nakorsartinnermik malittarinninniarnatik, namminneq oqaatiginnittuusinnaapput. Imaluunniit allamik tungaveqarluni soorlu assersuutigalugu napparsimasup uninnganermi nalaani nakorsartinnini pillugu suleqatiginninnissamut piunassusia tungavigalugu, nakorsartinneq pillugu atasinnaasumik suleqatigiinnissamut isumaqatigiissuteqanngippat, taamaammallu napparsimasup angerlareernermi kingorna nakorsartinnerminik taamaatitsinissaata annilaanganaateqarnera ilimanarluinnarneraluunniit, nakorsaanermit nalilivigineqarsinnaavoq.

Taamaalillutik nappaateqarnermik paasinninneq annikitsoq aamma nakorsartinnissamut kajumissuseqarnek annikitsoq, napparsimasup napparsimavimmit angerlareernermi kingornatigut nakorsartinnerup taamaatinneqarsinnaaneranut annilaangassutissaqarnermut qulakkeerinneqataasinnaapput.

Tamatuma saniatigut napparsimasut sanngiinnerpaat napparsimavimmit angerlareernermik kingornatigut pinngitsaaliissummik malinnaaffigineqarnissamut, maleruaqqusat malillugit pineqarnissaat qulakkeerniarlugu, pineqartut immikkoortissinnaanissaannut aalajangiinnermi tungaviusussat piviusut eqqortinneqassapput.

Napparsimasup ukiut kingulliit pingasut ingerlanerini ikinnerpaamik ataasiarluni napparsimavimmut pinngitsaaliissummik unitsitaasimanissaa imaluunniit napparsimavimmi pinngitsaaliissummik uninngatinneqarsimanissaa siullermik piunasaqaataapput, tak. § 19 imm. 1, nr. 1.

Tamatuma saniatigut ukiut pingasut kingulliit taakku ingerlanerini ikinnerpaamik ataasiarluni napparsimavimmit angerlartinneqarnermut atatillugu isumaqatigiissummik imaluunniit ataqatigiissummik pilersaarummik nakorsartinnissamik malittarinnissimannginneq piumasaqaataavoq, tak. § 19, imm. 1 nr. 2. Taamaalilluni napparsimavimmit angerlartitaanermut atatillugu isumaqatigiissusiorsinnaaneq imaluunniit ataqatigiissummik pilersarusiorsinnaaneq misilinnegarsimassaaq.

Napparsimavimmit angerlartinneqarnermi isumaqatigiissutit imaluunniit ataqatigiissakkamik pilersarusiat ilaat nakorsarneqarnissamut tunngasut taakkua taamaallaat napparsimasup malinnissaat pinngitsoorsimasinnaavaa.

Taamaattumik napparsimasup angerlartinneqarnermi isumaqatigiissutip imaluunniit ataqatigiissakkamik pilersarusiap inunnet isumaginninnermut tunngasortaanik malinnissimanagera tamatumunnga atatillugu sunniuteqanngilaq.

Inuit pineqartut kisiisa immikkoortissinnaajumallugit, napparsimasup napparsimavimmi uningannermi matumani pinngitsaaliissummik unitsitaasimanissaa imaluunniit pinngitsaaliissummik uninngatinneqarsimanagera pinngitsoornani piumasaqaataavoq, tak. § 19 imm. 1, nr. 3. Immikkoortitsineq tamanna qulakkeerinneqataavoq pinngitsaaliissummik malinnaaffiginninnerup taamaallaat napparsimasunut, napparsimavimmut uninnermi tassani pineqartumut atatillugu silangajaarsimasunut imaluunniit tamatumunnga sanilliunneqarsinnaalluurtumik pissuseqarsimasunut tunngavoq, tassanilu pineqartumit nakorsaasoqarnissaa siunertaralugu nammineersinnaajunnaarsitsinnginneq imminut illersorneqarsinnaanani.

Imm. 2-mut

Siunnersuummi § 19, imm. 2-mi takuneqarsinnaavoq napparsimavimmit angerlartinneqareernermi pinngitsaaliissummik malinnaaffiginnissamut nakorsaanerup aalajangiinera taamaallaat napparsimaveqarfiup immikkoortuisa arlaannut nakorsaatitortartarnissamik imaqarsinnaasoq. Napparsimasut napparsimavimmit angerlartinneqareernerminni pinngitsaaliissummik malinnaaffigineqartussat, namminneq ineqaraluarpata isumaginnittoqarfiulluunniit ataani inisinneqarsimagaluarpata, angerlarsimaffigisaminni nakorsartissinnaanngillat. Nakorsaatitortitaanerup peqqinnissaqarfiup immikkoortuani pinissaanut piumasaqaateqarneq, napparsimasut sineriak tamakkerlugu peqqinnissaqarfiup immikkoortuini nakorsagassanngorlugit angerlartitaasernerinik tunngaveqarpoq.

Napparsimasummik nakorsaatitortitsineq matumani kisimi pineqarpoq. Taamaalillutik nakorsaariaatsit soorlu pinngitsaaliissummik nerisinneqarneq aamma innaallagialu atorlugu sianiutitnik sunniisarnerit napparsimavimmit angerlartinneqareernermi pinngitsaaliissummik malinnaaffiginnermut atatillugu ingerlanneqarsinnaanngillat. Soorunami naatsorsuutigineqarpoq napparsimasumut, napparsimasutulli allatut nakorsaatitortinneqarluni nakorsarneqarnermi sa-

niatigut, katsorsaaniissamut allanik neqeroorfigineqarnissaat tamanna naleqquppat, tamatumunnga ilanngullugit oqaloqatigiittarluni katsorsaaneq aamma allatigut katsorsaanerit.

Imm. 3-mut

Napparsimasoq takkutinngippat, tak. § 19, imm. 2, nakorsaaneq maleruaqqusaq naapertorlugu, napparsimasup pinngitsaaliissummik najukkami peqqinnissaqarfiup immikkoortuani nakorsaatiortinneqarnissaa siunertaralugu politiinit aaneqarnissaa pillugu aalajangiippat pinngitsaaliissummik nakorsaatiortitsisoqarsinnaavoq. Taamaalilluni nakorsaatiortitsinissamut pissaanermik atuinissaq piviusunngorsinnaavoq. Tamanna taamaallaat peqqinnissaqarfimmi pisinnaavoq, taamaaliornikkut tarnikkut nappaatit pillugit immikkut ilisimasalinnik sulisulimmi aammattaaq pinngitsaaliissummik nakorsaatiortitsineri periarfissagissaarfiunerusumi tamatuma ingerlanneqarnissaa qulakkeerneqassaaq.

Napparsimasoq politiinit ikiorteqarluni aaneqassappat sapinngisamik qajassuarnerpaamik aamma malunnaarsaartumik ingerlanneqassaaq, taamaaliornikkut pisariaqanngitsumik narrunarsaaneq imaluunniit akornusersuineq tujormissutaasoq atorneqassanngimmata.

Taamatut pisoqarnera pinngitsaaliissummik napparsimavimmut unitsitsinertut ingerlanneqassaaq. Napparsimasumik napparsimavimmi pinngitsaaliissummik uninngatitsineq tamanna sivikitsuinnaassaaq (ulloq ataaseq). Naatsorsuutigineqarpoq pinngitsaaliissummik nakorsaatiortitsiartorneq tamanna taamaallaat atorneqassasoq napparsimasup tarnimikkut napparsimasunut immikkoortortaqqarfimmit angerlartinneqarnermi kingornatigut suli nakorsaatiortinneqarnissaminut pisariaqartitsineratigut, aamma tarnimikkut napparsimasunut immikkoortortaqqarfimmut unitsitsinngikkaluarluni nakorsaatiortitsinissamut periarfissat allat tamarmik pisinnaajunnaarsimappata.

Napparsimasoq § 19, imm. 2 naapertorlugu nammineq piumassutsini tunngavigalugu takkunnermini imaluunniit aalajangersagaq naapertorlugu politiit ikiortigalugit takkunnermini ima napparsimatigippat, napparsimavimmut uninnissaq imaluunniit pinngitsaaliissummik unitsinneqarnissaa pisariaqarluni, tamanna pinngitsaaliissummik unitsitsineri maleruaqqusat naapertorlugit ingerlanneqassaaq. Taamaalillutik napparsimavimmit angerlartitaareernermi pinngitsaaliissummik malittarinninnermut maleruaqqusat, napparsimavimmut pinngitsaaliissummik unitsitsineri mut maleruaqqusanit taarserneqanngillat.

Imm. 4-mut

Aalajangersagaq taanna naapertorlugu napparsimavimmit angerlartinneqareernermi pinngitsaaliissummik malinnaaffigineqarnermut atatillugu nakorsaatiortitaanerme, nakorsaati napparsimasumut sunniutaat nakorsaanermit ilisimaneqartut ilaatigut piffissami sivisuumi sunniusimasartut atorneqassasut erserpoq. § 5, imm. 2 naapertorlugu annikinnerpaaffimmiitsinissaq eqqarsaatigalugu taamatut aalajangersaasoqarpoq. Taamaattumik napparsimasumut annikinnerusumik akuliunnertut tunngaviusumik aallaavigineqartariarpoq ullut tamaasa nakorsaa-

titortitaanermiit soorlu assersuutigalugu ullut 14-it allortarlugit sivisuumik sunniusimasartumik nakorsaateqarneq. Sivisuumik sunniusimasartunik nakorsaateqarsinnaanerup, napparsimavimmit angerlarnermiit pinngitsaaliissummik malinnaaffigineqarnissami, pissutsinik immikkut ittunik tunngaveqarnera oqaatigineqassaaq.

Imm. 5-imut

Siunnersuutigineqarpoq pinngitsaaliissummik malinnaaffigineqarnerup ikinnerpaamik qaammatit pingasut allortarlugit nakorsaanermit nalilivigineqartarnissaa.

Imm. 6-imut

Tamatuma kingornatigut siunnersuutigineqarpoq qaammatit pingasut qaangiunneranni nakorsaanerup nalilissagaa, annilaangassuteqarnissamut tunngavissaqarnerisooq aamma nalorninartoqarsinnaanersooq pisariaqartumik katsorsaanermik napparsimasup unitsitsinissaanut. Taamaattoqassappat pinngitsaaliissummik malinnaaffiginninnerup qaammatit pingasukkaarlugit sivit-sorneqartarnissaa, nakorsaanerup aalajangiivigisinnaavaa.

Tarnimikkut napparsimasut pineqartut nammineersinnaassusaannik ataavartumik arsaarinninnissaq kissaatigineqanngilaq. Napparsimavimmi uninngareernermi malinnaaffiginninnerummat napparsimasup sivisunerpaamik qaammatini aqqaneq marlunni malinnaaffigineqarnissaa siunnersuutigineqarpoq. Napparsimasumik pinngitsaaliissummik malinnaaffiginninnissamut qaangerneqarsinnaanngitsumik killiliinikkut, napparsimasup sivisoorsuarmik pinngitsaaliissummik nakorsartissinnaanera pinngitsoortinneqassaaq. Taamaalilluni siunnersuut naapertorlugu piunasaqaatit eqquutsinneqarpata, aatsaat napparsimavimmit angerlareernerup kingorna pinngitsaaliissummik malinnaaffiginnittoqarsinnaavoq.

Napparsimavimmit angerlartinneqareernerup kingornatigut pinngitsaaliissummik malinnaaffiginninnermut atatillugu immikkoortoq 2.6-imi oqaaseqaatit nalinginnaasut taamatuttaaq innersuussutigineqarput.

§ 20-mut

Siunnersuutip § 20-ani Naalakkersuisut pisinnaatinneqarput ingerlatsinikkut angerlartinneqareernerup kingornatigut pinngitsaaliissummik malittarinninnermut atatillugu § 19-imi aalajangersakkanut sukumiinerusumik maleruaqqusanik suliaqarnissaminnut, tamatumunnga ilanngullugu politiinit ikiorteqarluni aallertarnermut tungasunut. Malugeqquneqarpoq Naalakkersuisut politiinik ikiorneqarnissamut tunngatillugu aalajangersakkanik suliaqarnissaminnut pisinnaatinneqannginnerat Justitsministeriamit akuersissuteqartoqartinnagu, tak. pinerluttulerinermi inatsimmi § 61, imm. 2.

Kapitali 6-imut
Pinngitsaaliissummik sukaterussineq

§ 21-mut

Imm. 1-imut

Siunnersuummi § 21-mi pineqarpoq pinngitsaaliissummik sukaterussineq sernissuiniarluni sukaterussinerup akerlia, tamatuma atorneqarnera § 26-mi malittarisassaliuunneqarpoq. Pinngitsaaliissummik sukaterussinerup aamma sernissuiniarluni sukaterussinerup akornanni immikkoortitsinermut tunngatillugu immikkoortoq 2.7-imi oqaaseqaatit nalinginnaasut innersuunneqarput.

Imm. 1-imi ilaapput pinngitsaaliissummik sukaterussinermi suut atorneqarsinnaasut sukumii-sumik allattorsimanerat, taakku imm. 2-mi piunasaqaatini allassimappata. Qiterut, paffinnut singernernullu ungerutit aammattaaq aaqatit kisimik taamaallaat pinngitsaaliissummik sukaterussinermi atorneqarsinnaapput. Pinngitsaaliissummik sukaterussinermi atortut ataqatigiisillugit imaluunniit immikkoortillugit artorneqarsinnaapput, tamatumani § 5, imm. 2-imi annikinnerpaaffeqartitsinissamat tunngaviusoq isiginiarneqassaaq.

Imm. 2-mut

Aalajangersakkami pinngitsaaliissummik sukaterussinerup qanoq atorneqarnissaanut piunasaqaatit aalajangersarneqarput.

§ 21, imm. 2-mi nr. 1-imi pisut ajornerpaat takuneqarsinnaapput, tassani pineqarmat timikkut imaluunniit peqqissutsikkut ulorianartorsiorsinnaanerit qaninnerpaat. Matumani inuit sernisorniakkat amerlanerupput. Pinngitsaaliissummik sukaterussinerup maleruqaqqusami inuk pineqartoq kisimi pineqarnani, kisianni aammattaaq napparsimavimmi uninngaqaatit, sulisut, pu-laartut imaluunniit allat napparsimavimmiittartut pineqarput.

Ulorianartorsioertitsinnaanermut ilisarnaat pineqarpoq. Ulorianartorsioertitsinnaaneq ilima-naateqarlunnartutut nalilernerqarsinnaavoq tamanna piviusuuppat, maannakkut pisinnaalluni aamma navianartorsioertit takuneqarsinnaalluni. Iliuuseqannginnermili ulorianartorsioertitsinnaaneq ajoqusiinermik kinguneqartitsereersimasariaqanngilaq.

§ 21 imm. 2, nr. 2-mi pineqarput iliuuseqarnerit sakkortuallaanngitsut aammattaaq inunnut sammisut. Taamaattorli inuit illersorniakkat tassaaginnarlutik napparsimavimmi uninngaqaatit. Peqqarniisaarnerli immikkut sakkortuppat taava tamanna pissutsit naapertorlugit ulorianartorsiornermik kinguneqassaaq, tamannalu normu 1-imut ilaatinneqarpoq tamatumalu kingunerisaanik pinngitsaaliissutit atorneqarnissaat, aalajangersagaq taanna naapertorlugu pissutissaqassapput.

Malersuinerit imaluunniit peqqarniisaarnerit ilaatigut kinguaassiutitut sammisutut qaninniaanerussaasarpur, nipituumik suaartarneq, sakkortuumik qinngasaarinerit imaluunniit allat piinik innimiilliernerit tigooqqaanerit. Taamaattorli ilaannikkut taamatut pisoqartillugu eqqarsaatigineqarsinnaavoq napparsimasumik, napparsimaqatiminut annertuumik akornusersuisumik utaqqiisaagallartumik nuutsitsinerup, ajornartorsiummik aaqqiisinnaanermik kinguneqarsinnaanersoq, tak. § 5 (annikinnerpaaffimmiititsinissamik tunngaveqarneq).

Naggataatigut nr. 3-mi pinngitsaaliissummik sukaterussinissamut periarfissiisoqarpoq tamatumani pisariaqarpat napparsimasup annikigisassaangitsumik aserorterinissaa pinngitsoortinniarlugu. Annikigisassaangitsumik aserorterinerimik naliliinerimigisat qanoq naleqarneri kisiisa isiginiarnagit, kisianni aammattaaq aserorterinerup annertussusia aamma qanoq siviutiginera isiginiarneqassapput. Pinngitsaaliissummik sukaterussinermik annikinnerusumik iliuuseqarnikkut aserorterineq unitsinneqarsinnaappat annikinneq toqqarneqassaaq tak. § 5, imm. 24.

Tamatuma saniatigut immikkoortoq 2.7-imi oqaaseqaatit nalinginnaasut innersuussutigineqarput.

§ 22-mut

Imm. 1-imut

Aalajangersakkami siunnersuutigineqartumi ilaavoq kina pinngitsaaliissummik sukaterussinerup atorineqarnissaanut aalajangiinissamut pisussaaitaaffeqarnerisoo.

Imm. 1-ip kingunerisaanik pinngitsaaliissummik sukaterussineq nakorsap napparsimasumik takusaareernerimigut tamanna aalajangissagaa.

Imm. 2-imut

§ 22, imm. 2, naapertorlugu qiterusiinerup saniatigut paffinnut imaluunniit singernernut ungerutit aqqatillu atorineqarnissaanut, taamaattorli Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneq aalajangiisuussaaq.

Imm. 3-mut

Aalajangersakkami takuneqarsinnaavoq pinngitsaaliissummik sukaterussineq aallartinneqarsimasooq peqqinnisaqarfiup immikkoortuisa arlaanni nalunaaquttap akunneri aqqaneq marluk sinnerlugit siviussusilik imaluunniit siviussuseqassanganneqartoq, pinngitsaaliissummik sukaterussinerup ingerlatiinneqarnissaanut aalajangiineq Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneermik aalajangiivigineqassaaq. Dronning Ingridip Napparsimavissuata avataani pinngitsaaliissummik sukaterussinerni nalunaaquttap akunnerinik aqqaneq marlunnik maleruaqqusaqarnikkut qulakkeerneqassaaq, nakorsap nakorsarneqarnerimik isumaginnittup nuna tamakkerlugu napparsimavimmut i-

sumasiuinissaa sivilunerusumik pinngitsaaliissummik sukaterussisoqartillugu. Tamatuma saniatigut aammattaaq sivikitsumik pinngitsaaliissummik sukaterussinermi, pisariaqarpat nakorsap immikkut ilisimasalimmik naliliisitsinissaa naatsorsuutigineqarpoq.

Nalunaaquttap akunnerinik aqqaneq marlunnik maleruaqqusaqarnerup pinngitsaaliissummik sukaterussinerne nalunaaquttap akunneri aqqaneq marluk sinnerlugit sivilussuseqarnissaa nalunaarunnaarpat, ataasiarluni siunnersortinnissaa piunasaqaataavoq. Tamatuma kingornatigut napparsimasup peqqissusianik aamma pinngitsaaliissummik sukaterussinerup sivitsorneqarnissaanik naliliisarnerni, Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup immikkut ilisimasalittut naliliisinnissaanut pisariaqartisineq, nalinginnaasumik nakorsap nammineq naliliinera naapertorlugu aalajangiivigineqassaaq.

Imm. 4-mut

Aalajangersagaq naapertorlugu qanoq iliuuseqarnissamut tamanna sioqqullugu nakorsap peqqusineragut pisinnaanera immikkut pinasuartumik iliuuseqarfigisarialinni avaqunneqarsinnaavoq. Tamatumani piunasaqaataavoq pisoq tassaasoq timikkut imaluunniit peqqissutsikkut ajoqusersinnaanerup ilimanaateqarluinnarnerani, pinngitsaaliissummik qitequsiilluni sukaterussinerup nakorsap takkunnissaata tungaanut kinguartinneqarnerata, isumannaallisaanikkut illersorneqarsinnaannginnera. Immikkoortorta qarfimmi imaluunniit peqqissaavimmit pisoqarfiusumi pigaartoqarnikkut pissutsit, ullup qanoq ilinera nakorsallu aggersarneqarnerani ilisimatitsissutigineqartut eqqarsaatigalugit, nakorsap takkunnissaata tungaanut piffissap sivilussusissaa naliliivigineqassaaq. Qitequsiinermi annikinnerusumik iliuuseqarsinnaaneq, pingaartumik nakorsap takkunnissaata tungaanut inummik allamik ilaqartinneqarnerup, pisariaqarpalu uninngatinneqarnerup naammassinnaanera, naliliiviginninnermi ilaatinneqassaaq.

Taamatut pinasuartumik iliuuseqarfigisarialinni qitequsiilluni sukaterussinissamut aalajangiinissamut piginnaatitaaneq peqqinnissamik sullissisuniippoq, tassa imaappoq peqqissaasoq pigaartuusoq imaluunniit taassuma taartaa, imaluunniit qaqutigunnaq peqqinnissamik suliaqartoq najuuttoq.

Pinngitsaaliissummik sukaterussinerit taamatut ittut piaartumik isummerfigineqassapput, tassa pinngitsaaliissummik atuinerup unitsinneqarnissaanut tunngatillugu. Taamaattorli qaquguk-kulluunniit peqqinnissamik sullissisut pinngitsaaliissummik sukaterussinerup unitsinneqarnissaa pisussaaffigaat, taamatut iliorneq pisariaqarunnaarpat.

§ 23-mut

Siunnersuummi § 23-mi napparsimasoq qitequserlugu pinngitsaaliisummik sukaterunneqarsimasoq aalajangersimasumik nakkutilliisoqarnissaa piumasaqaataavoq.

Maleruaqqusami pingaarnertut siunertaavoq pinngitsaaliisummik qiterummik sukaterussinerup annertuumik sunniuteqarluni kingunerlunnissaata sunniuteqarnerata annikillisinneqarnissaa, tassa sukaterussinermut aamma kisimiinnermut atatillugu. Tamatuma saniatigut aalajangersimasumik nakkutilliisoqarnerup pinngitsaaliisummik qiterummik sukaterussinerup atornerqarnera killilerneqarsinnaammat, ingammik piffissap sivissususiata taamaalilluni sivikillineratigut.

Aalajangersimasumik nakkutilliisuutitaq tassaavoq paaqqinnittoq, peqqissaasoq, imaluunniit sulisoq alla piginnaasaqartoq, tamatumunnga ilutigitillugu suliaassanik allanik suliaqartussaangitsoq taamaallaat napparsimasunik pinngitsaaliisummik qiteqummik sukaterunneqarsimasunik isumaginnittussaq, tassa pineqartup aalajangersimasumik nakkutigisarissaminik. Napparsimasup piumasai, inuttut naleqassusaa imminullu qanoq isiginera ataqqillugit pissutsillu aallaavigalugit, inuttut nammineq inuunissamut pisinnaatitaaffeqarnissaa eqqarsaatigalugu, nakkutillineq ingerlanneqassaaq.

Nukiit atorlugit pissaanermik atuineq

§ 24-mut

Nukiit atorlugit pissaanermik atuinermit piumasaqaat tassaavoq napparsimasumik najummi-saqarnek aamma isersimaffimmut allamut ingerlatsinerusinnaavoq, taakku pinngitsaaliisummik sukaterussinermit § 21, imm. 2, naapertorlugu piumasaqaatitut ipput. Pinngitsaaliisummik katsorsaanermut atatillugu nukiit atorlugit pissaanermik atuineq pisariaqarpat tamatumunnga periarfissiissutit § 14, imm. 2-mi takuneqarsinnaapput.

Nukiit atorlugit pissaanermik atuinermit suup atornerqarneranut apeqqut, tassa pisuni ataasiakkaani atornerqartussamut tunngatillugu annikinnerpaaffiutitsinissamut tunngaviusoq tak. § 5, imm.2 isiginiarneqassaaq. § 21, imm. 2-mi aamma § 24-mi aalajangiinnermut tunngaviusut paasineqarneranni qanoq annertusiartortitsisoqarnera isiginiarneqartariaqarpoq, taamaaliornikut piumasaqaatit annertusiartussammata, iliuserisami akuliunnerup annertussusia apeqqu-taatillugu.

Aalajangersakkami § 24, imm. 2 naggatit aappaanni ilaapput nukiit atorlugit pissaanermik atuinissamut periarfissat napparsimasut nammineersinnaajunnaarsarneqarsimasut immikkoortortaarfimmit anitsaaliornissaat qulakkeerniarlugu. Maleruaqqusap ilaatigut Dronning Ingridip Napparsimavissuani tarnikkut nappaatilinnut Immikkoortortaarfianni nakorsaanermik pisinnaatitsivoq immikkoortortaarfiup matuisa silarliit paarnaarsimaannarnissaannik aalaja-

ngiinissamut. Tamanna atuuppoq naak § 21, imm. 2 siullermi piumasaqaatit eqqortinneqanngikkaluartut.

§ 25-mut

Maleruaqqusaq napparsimasumik annertuumik eqqissiviitsumik eqqissisisimanerulersitsiniarluni kapuummik eqqissisaatitalimmik atuinissamut pisinnaatitsivoq. Tamanna peqqinnissamut tunngaveqartumik pisariaqarsinnaavoq tassami napparsimasup qanoq innera pitsaanerulissappat ilaatigut pisariaqarsinnaavoq pineqartup sinilernissaa. Taamatuttaaq pissutsit qanoq ittuunerat naapertorlugu eqqissisaammik atuneq annikinnerusumik iliuuseqarnerusinnaavoq, napparsimasup piffissami sivikinngitsuusinnaasumi najumminissaanut imaluunniit qiterut atorlugu pinngitsaaliisummik sukaterussinnermut sanilliussilluni. Qanoq pisoqarnera tunngavigerpiarlugu naliliinermi suup atornerqarnerata annikinnerpaatitsisoqarnissaanut tunngaviunersoq toqqarneqassaaq. Tamatumunnga ilutigitillugu nakorsaait ilaat eqqissisaatit sianiutigissaatitut atornerqarsinnaapput. Aalajangersagaq tamatut oqaasertaqqarnermigut tamatumunnga killilersuutaanngilaq.

Pinngitsaaliisummik nakorsaaitortitsinermi, nakorsarneqarnissamut pilersaarummi kapisarnerit ilaatinneqarpata, tamanna taamaallaat pisinnaavoq § 14, imm. 4 naapertorlugu, tamatumani Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneq akuersissuteqassaaq. Taamaattorli nakorsap pigaartuusup § 25, imm. 2, tunngavigalugu qaqutigut pinasuartariaqarnermi kapuummik eqqissisaatitalimmik atuinissaminut pisinnaatitaavoq, tamatumani annikinnerpaaffimmiititsinissaq siunertarineqassaaq. Eqqissisaammik kapisinermi nakorsaq najuutissaaq.

Tamatuma saniatigut immikkoortoq 2.7-imi oqaaseqaatit nalinginnaasut innersuussutigineqarput.

Sernissuiniarluni sukaterussineq

§ 26-mut

Imm. 1-imut

Sernissuiniarluni sukaterussinerup aamma pinngitsaaliisummik sukaterussinerup akornanni immikkoortitsinissamut tunngatillugu immikkoortoq 2.7-imi nalinginnaasumik oqaaseqaatit innersuussutigineqarput.

Napparsimasumik sukaterussineq pineqartup piumasusia akerlilerlugu sernissuinissamik siunertaqarluni taamaallaat pisinnaavoq, tamanna pisariaqarpat pineqartoq taamatut siunertaqanngikkaluarluni annertuumik imminut navianartorsiortippat. Iliuserineqartoq pinngitsaaliissummik pisutut isigineqassaaq napparsimasoq toqqaannartumik akerliulluni oqaaseqarpat. Taamatuttaaq pinngitsaaliissutitut isigineqassaaq pineqartoq imatut ileqqulersorpat sernissuiarluni atorineqartumit inuk pineqartoq peerniarsarippat. Napparsimasoq nammineerluni peersinnaappat tamatumunngalu akornusersorniarneqarnani, taava tassani tamanna sernissuiarluni sukaterussinertut isigineqassanngilaq, kisianni iluaqutissatut ikiorsiissutitut.

Sernissuiarluni sukaterussinermit assersuutit pingaarnertit piviusut tassaapput nerriviup saavanut napparsimasoq issiavimmut ingitsillugu, taamaalilluni napparsimasoq nammineerluni nikuissinnaajunnaarsillugu nerriviup sukaterussinermit immikkut suliaasup atorneratigut. Napparsimasoq siniffimmini innangatillugu qipiata qaavatigut tungimik imaluunniit ungerutissiamik annoraaminermik qajannaarlugu, uffarnermi, perusersartarfimmi imaluunniit issiavimmi qiterut atorineqarsinnaavoq taamaaliornikkut napparsimasup nikuinnginnissaa uppillunilu anninnginnissaa qulakkeerniarlugu.

Imm. 2-mut

Sernissuiarluni sukaterussinerup nakorsap peqqusinera naapertorlugu, qanoq annertutigisumik qanorlu pisoqartillugu atortup sorliup atorineqarnissaanik innersuussisumik tunngaveqarnissaa piomasqaataavoq. Tamatumunngalu ilutigitillugu qanoq ilinerani inassuteqaatip naliivigineqaqqinnissaa pillugu aalajangersaasoqassaaq, sisamariarlunili peqqussuteqareernerup kingornatigut tamanna sapaatit akunnerisa sisamat qaangiunnerini pisassaaq, tak. § 34, imm. 2.

Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaanerup sernissuiarluni sukaterussinerup sapinngisamik pisariaqartitsineq naapertorlugu annertunerusumik atorineqannginnissaa akisussaaffigaa aamma nakkutigisussaallugu, tamatumani napparsimasup isumannaatsuunissaa mianerineqassaaq, tak. § 34, imm. 1.

Qanimut nakkutilliineq

§ 27-mut

Imm. 1-imut

Inatsissatut siunnersuummi § 27, imm. 1-imi qanimut nakkutilliineq, sulisup ataatsip imaluunniit arlallit napparsimasup eqqaaniiginnavinnerattut nassuiarneqarpoq. Eqqaaniiginnarneq imatut paasineqassaaq napparsimasup ataavartumik nakkutigineqarneratut, tamatumunnga ilanngullugit perusersarnerani aamma uffarnerani taamaaliornikkullu sulisut ingerlaannartumik iliuuseqarsinnaassallutik.

Napparsimasup nakkutigineqarnissani akuerippagu, napparsimasut inatsisitigut inissisimane-rat pillugu Inatsisartut peqqussutaat nr. 6, 31. maj 2001-imeersoq kapitali 2-mipaasissutissin-neqareernikkut akuersinermut maleruaqqusat naapertorlugit taama pisoqarsinnaavoq. Nappar-simasooq akuersinngippat, qanimut nakkutiginninneq tassa napparsimasooq ataavartumik nak-kutigineqarluni, tamanna inuit ataasiakkaat innarligassaannngissusianut ima annertutigisumik akulerunnerussaaq, taamaalilluni inatsisitigut tamanna inatsisitigut maleruagassiortariaqarluni.

Imm. 2-mut

Siunnersuummi § 27, imm. 2 naapertorlugu qanimut nakkutiginninneq pisariaqartumik pinngitsoortitsiniarnermut atorneqarsinnaavoq, napparsimasup imminut toqunnissaa imaluunniit allatut nammineq allalluunniit peqqissusiannik annertuumik innarliisinnaappat, imaluunniit uninggaqatiminik malersuippat imaluunniit allatut ajoqusersuippat.

Pineqartut tassaasinnaapput napparsimasut ingerlaaruusaartut eqqissiveerusimaannarlutik, allanullu ileqqulersornerat akulerunnertut aamma akornusersuinertut isigineqarsinnaalluni, soorlu assersuutigalugit napparsimasut ingasannermik pissuseqartut, allat piinik tigussukartut, kinguaassiutinut sammisutut qaninniartut il.il. Aammattaaq pineqarsinnaapput tarnimikkut napparsimasut neriumajunnaarnermik nappaateqartut.

Annikinnerusumik nakkutilliinerit/nakkutiginninnerit aalajangersakkami matumani pineqanngillat.

Imm. 3-mut

§ 27, imm. 3-mi allassimavoq napparsimasup akuersissutiginnngisaanik qanimut nakkutilliineq nakorsamit takuniaareersimasumit aalajangiivigineqassasoq.

Qanimut nakkutigineqarneq nalunaaquttap akunneri 24-t sinnerlugit sivisussuseqarpat, aalajangiineq pinngitsaaliissummik iliuseqarnermi nalunaarsuivimmu ilanngunneqassaaq, tak. § 33, imm.1. Taamaattoqartillugu napparsimasup § 47, imm.1, nr. 10naapertorlugu Tarnimikkut Nappaatillit Maalaarutaannik Aalajangiisartunut aalajangiineq maalaarutigisinnaavaa. Taama-tuttaaq napparsimasooq § 35, imm. 2, nr. 7naapertorlugu siunnersortissalerneqassaaq.

§ 28-mut

Siunnersuummi § 28-p malitsigisaanik napparsimaveqarfimmi oqartussaasut immikkoortortaqarfiit aqqissuuneqarnerat pillugu ilisimatitsinissaaq pisussaaffigaat. Tamatumunnga atatillugu immikkoortortami immikkut nakkutilliiveqarpat, tamatuma angissusaa aqqissugaaneralu ilisimatitsissutigineqassapput. Ilisimatitsineq sapinngisaaq tamaat napparsimasup immikkoor-

tortaqarfimmut uninneranut atatillugu pissaaq. Napparsimasup qanoq innera pissutigalugu taama pisoqarsinnaangippat, piaarnerpaamik immikkoortortap aaqqissuussaana pillugu ilisimatineqassaaq.

Dronning Ingridip Napparsimavissuani tarnikkut nappaatilinnut Immikkoortorta qarfianni immikkoortumik ataatsimoortumik pilersitsisoqarnissaa pisariaqarsimavoq. Tamanna imatut paasineqassaaq immikkoortoq ammasutut taamatullu matoqqasutut atorineqarsinnaasut, tassa immikkoortorta qarfiup ilaa immikkoortuulluni (qanimut nakkutiginniffik), tassunga matu pisariaqartitsineq naapertorlugu paarnaarneqarsinnaalluni.

§ 29-mut

Imm. 1-imut

Aalajangersagaq naapertorlugu aalajangersaasoqarsinnaavoq immikkoortorta qarfiimmi matut paarnaarneqarnissaannut, tassa napparsimasunut namminneersinnaajunnaarsinneqarsimasunut tunngatillugu, tak. siunnersuummi kapitali 3. Pineqartut tassaapput napparsimasut pinngitsaaliissummik unitsinneqarsimasut, pinngitsaaliissummik uninngatinneqartut imaluunniit pinngitsaaliissummik utertinneqarsimasut.

Siunnersuummi § 29, imm. 1 nr. 2 naapertorlugu taamatuttaaq aalajangersaasoqarsinnaavoq matunik paarnaarsisoqarnissaanut, napparsimasunut imminnut annertuumik navianartorsior-tinnissaminnut aarlerinaateqartunut tunngatillugu. Napparsimasut tassani pineqartut tassaapput sernissuiniarluni sukaterussanut ilaasut, tak. § 26, imm. 1. Napparsimasunut taakkununga ilaasunut aalaavigineqarpoq inuit puiguttormik nappaateqartut, kisianni aammattaaq inuit silaqassutsimikkut ajornartorsiutillit imaluunniit paatsiveerusimaartut, imaluunniit ularusisimasutut ittut aalajangersakkamut ilanngunneqarsinnaasut. Paarnaarsinermut siunertaavoq illersuiniarluni iliuuseqarneq taamaalilluni siunertamit uaniittumit allaaneruvoq, § 29, imm. 1-imi tunngaveqartumit paarnaarsinermut tassani pineqartut tassaapput napparsimasut namminneersinnaajunnaarsinneqarsimasut.

Imm. 2-mut

§ 29, imm. 2 naapertorlugu taamatuttaaq matunik paarnaarsisoqarsinnaavoq napparsimasunut imm. 1-imi ilaatinneqanngitsunut tunngatillugu, imaappat tamanna napparsimasumit noqqaasutigineqarluni. Napparsimasup apeqquteqaateqarneratigut paarnaarsimatitsineq atorunnaarsinneqassaaq.

Imm. 3-mut

§ 29, imm. 3 naapertorlugu napparsimasut tamarmik immikkoortorta qarfiimmiittut ingerlaanartumik ilisimatineqassapput, imm. 1 aamma imm. 2 naapertorlugit paarnaarsinissap aalajangerneqarnerata kingornatigut.

§ 30-mut

Pinngitsaaliissummik napparsimasup timimigut eqqiluisaarneqarnissaa pillugu aalajangiineq Dronning Ingridip Napparsimavissuani tarnikkut nappaatilinnut

Immikkoortortaqarfianni nakorsaannermit aalajangiiffigineqassaaq, tamatumani tunngavigineqassaaq piviusumik misissuineq aamma napparsimasup eqqiluisaarnermut tunngatillugu qanoq inissisimanerata nalilerneqarnera. Nakorsaanerup aalajangiinera tunngavilersuutigineqartullu napparsimasoq pillugu allattugaatinut nalunaarneqassapput, tak. § 13 nakorsat pillugit inatsimmi, (Nakorsatut suliaqarneq pillugu Inatsit, Lovbekendtgørelse nr. 426 af 19. august 1976, Peqqussut nr. 860, 18. december 1991-imeersoq Kalaallit Nunaannut atortuulersinneqarsimasutut, kiisalu Peqqinnissakkut sullissinermik ussassaarisarneq pillugu Inatsisartut peqqussutaat nr. 8, 31. Maj 2001-imeersoq aqqutigalugu allanngortinneqarsimasutut).

Aalajangersagaq naapertorlugu napparsimasup timimigut eqqiluisaannginnera tarnimigut nappaataanik patsiseqartinneqarsinnaassaaq. Timip eqqiluutsuutinnissaanut assersuutaasinnaasut tassaapput uffarneq, qulinneq, kigutigissarneq aamma atisanik taarsiineq. Taamatuttaaq soorlu assersuutigalugit puiguttortuni nangit nalequttallu taarserneqartariaqarsinnaapput.

Pinngitsaaliissummik timikkut eqqiluisaartitsisoqarsinnaavoq napparsimasup peqqissusaa eqqiluisaannginnermik patsiseqartumik soorlu assersuutigalugit aseruuttoorsinnaaneq assigisaallu peqqutigalugit navianartorsiorpat. Kisianni aammattaarli napparsimasup eqqiluisaannginnera uninngaqaataanut sulisunullu ajoqutaappat, pineqartup pinngitsaaliissummik uffartinneqarnissaa ipiitsunillu atisitinneqarnissaa allatulluunniit eqqiluisaartinneqarnissaa nakorsaanerup aalajangersinnaavaa.

Annikinnerpaaffissaaniititsinissamut tunngaviusoq, tak. § 5, imm. 2, pinngitsaaliissummik timikkut eqqiluisaarnissaaq pillugu aalajangiissagaanni eqqarsaatigineqassaaq. Napparsimasup nammineq piumassutsini naapertorlugu peqataanissaa sapinngisaaq tamaat anguniaqqaarlugu aatsaat taamaaliortoqarsinnaavoq, pissutsillu ajornartitsinngippata napparsimasoq periarfissaqarpat naammaginarumik eqqarsarfissaqartinneqassaaq. Pinngitsaaliissutaasoq aammattaaq anguniakkamut naapertuuttuussaaq, annikinnerusumillu akuliunnikkut iliuuseqarnerit naammaginarpata, tamakku qinerneqassapput.

Pinngitsaaliissummik timikkut eqqiluisaartitsineq sapinngisamik mianersortumik ingerlanneqassaaq napparsimasorlu sapinngisamik mianersuulluarlugu, taamatut pisariaqanngitsumik misigissutsimigut innarlerneqarsinnaanera ajoqusersinnaaneralu pinngitsoortinniarlugit, tak. siunnersuummi § 5 imm. 3.

Pinngitsaaliissummik eqqiluisaartinneqarneq pillugu maalaarutaasinnaasut napparsimavimmi pisortanut ingerlatinneqassapput.

§ 31-mut

Siunnersuummi § 31-mi Naalakkersuisut pisussaatinneqarput pinngitsaaliissummik sukaterus-sineq, nukiit atorlugit pissaanermik atuineq, napparsimasut imminnut ajoqusinnginnissaannut sukaterussineq, qanimut nakkutigineqarneq aamma immikkoortortaarfimmi matunik par-naarsuineq pillugit maleruaqqusanik aalajangersaasinnaanissaminnut.

Pinngitsaaliissummik iliuseqarnerit assigiinngitsut pillugit ersarinnerusunik maleruagassior-toqarnissaa, taamatullu sulisut paasinarsakkanik maleruagassiuunneqarnissaat pisariaqartinne-qalersinnaavoq.

Kapitali 7-imut

*Allagarsianik/nassiussarsianik, pigisanik timilu satsillugu misissuisarneq
aammattaaq pigisanik arsaarinnissuteqartarneq aamma suujunnaarsitsisarneq*

§ 32-mut

Imm. 1-imut

Aalajangersakkamut ilapput napparsimasup allagarsiaanit misissuinissamut, napparsimasup i-naanik aamma pigisaanik misissuinissamut aammattaaq napparsimasumik timaatigut satsillu-gu piginnaatitsineq. Pigisanik arsaarinnissuteqarsinnaanerup aamma suujunnaarsitsisinnaane-rup assigisaasalu inatsimmi sulii maleruagassaqartinnissaat siunnersuutaavortaaq.

Napparsimasup nakorsaatinik, aanngajaarniutitik sakkunilluunniit navianaatilinnik imminut uninngaqatinullu ajoqutaasinnaasunik pigisaqarsinnaanerata pissarsisinnaanerataluunniit pit-saaliorsinnaanissaa, aalajangersakkami eqqarsaataavoq. Nakorsaaitit, aanngajaarniutit, sakkul-luunniit navianaatillit napparsimasumut apuunneqarsimanerannut apuunniarneqarnerannul-luunniit *pasitsaassineq tunngavissaqarpat*, iliuseqarnissaq Dronning Ingridip Napparsima-vissuani tarnikkut nappaatilinnut Immikkoortortaarfiani nakorsaanerup aalajangiivigisin-naavaa. Pissutsit suut pasitsaassinermi tunngaviusut, napparsimasooq pillugu allattuiffimmut i-lanngunneqassapput.

Taamatuttaaq pisuni ataasiakkaani napparsimasup pasilliutigisanik il.il. pigisaqarsinnaanera immikkut naliliivigineqartassaaq. Taamaamat immikkoortortaarfimmi napparsimasunut a-taasiakkaanut ataatsimoortunulluunniit aalajangersimasunik periuseqartoqarsinnaanngilaq.

Aalajangersagaq naapertorlugu napparsimasup nakorsaatinik, *aanngajaarniutitik sakkunil-luunniit ulorianartunik* pigisaqarnera misissorneqarsinnaavoq. Pineqartut immikkoortortaqar-

fimmiippata napparsimasumut namminermt, soorlu imminorsinnaasumut allanulluunniit navianaateqarsinnaapput. Pineqartut saviusinnaapput imaluunniit sakkut kisianni aammattaaq a-tortuusinnaapput nalinginnaasumik uloriananngitsutut isigineqartartut, soorlu assersuutigalugit sannatit, meqqutit imaluunniit puiaasat gassimik imallit il.il. Anngajaarniutinut pineqartut soorlu assersuutigalugu taaneqarsinnaapput imigassaq aamma ikiaroorntoq. Nakorsaait nakorsamit allagartaligaasinnaapput pisiassaasinnaallutilluunniit.

§ 32, imm. 1, nr. 1-ip malitsigisaanik piginnaatitsissuteqartoqarpoq napparsimasup allagarsiai ammarneqarsinnaanerannut aamma aalajangersakkami taaneqartunik ilaqarnersut misissornissaannut. Allagarsiat taamatuttaarlu poortukkat misissorneqarsinnaapput. Allagarsiat taamaallaat aalajangersakkami taaneqartunik atortunik, nakorsaatinik aamma angajaarniutinik missisuiffigineqassapput. Allagarsiali oqaasertaannik atuarnissamut piginnaatitsisoqanngilaq. Napparsimasumut nassiussat taamaallaat pineqarput, akerlianik napparsimasup nammineq allagai aamma nassiussai tamatumunnga ilaatinneqanngillat.

§ 32, imm. 1, nr. 2 naapertorlugu napparsimavimmi inigisap pigisallu misissuivigineqarnissaat pillugu aalajangiisoqarsinnaavoq. Soorlu assersuutigalugu inigisami sikaaviit amusartullu misissuivigineqarsinnaapput, kisianni aammattaaq napparsimasup nammineq pigisai pooqattat pigisaalu allat misissuivigineqarsinnaapput.

§ 32 imm. 1, nr. 3 naapertorlugu napparsimasup timaa satsillugu misissuivigineqarsinnaavoq. Aalajangersakkap immikkoortuisa aappaat naapertorlugu, qaneq ilanngullugu timip ammarngisa misissuivigineqarnissaat inerteqqutaavoq. Annikinnerpaaffissaaniititsinermik tunngavissap § 5, imm. 2-miittup kingunerisaanik iliuseqarneq sapinngisamik mianersornerpaamik aamma sapinngisamik annertunerpaamik napparsimasoq mianeralugu ingerlanneqassaaq, taamaaliornikkut pisariaqanngitsumik narrunarsaneq aamma persaqusersuineq pinngitsoornarlugit.

Imm. 2-mut

§ 32, imm. 2 naapertorlugu ajornanngippat napparsimasoq isigitillugu allagarsiai ini uninngavigisaa pigisaalu misissuiffigineqassapput. Naatsorsuutigineqarpoq misissuinerit taamaattut napparsimasoq peqataatinnagu taamaallaat ingerlanneqarsinnaasut, napparsimasup qanoq issusia imaappat pineqartup misissuineri peqataasinnaanani. Pissutsit allat soorlu assersuutigalugu napparsimasoq misissuinerup nalaani immikkoortortaqaqarfimmiinngippat, misissuinsaq napparsimasup immikkoortortaqaqarfimmut uternissaanut utaqqisinniartariaqarput.

Imm. 3-mut

Dronning Ingridip Napparsimavissuani tarnikkut nappaatilinnut Immikkoortortaqaqfianni nakorsaanerup aalajangiivigisinnaavaa nakorsaait, aannngajaarniutit aamma atortut ulorianartut misissuineri taaneqartuni nassaarineqartut arsaarinnissutaallutik paarineqartussanngussapput.

Naatsorsuutigineqarpoq pigisat tamakku immikkoortorta qarfimmi toqqortarineqarnissaat, tamakku illersorneqarsinnaasumik napparsimasumut tunniunneqarsinnaalernerisa tungaanut, soorlu assersuutigalugu napparsimavimmit angerlartinneqarnermut atatillugu. Pigisat tassaap-pata inatsisinik nalinginnaasunik unioqqutitsinermut attuumassuteqartut taakkua nakorsaane-rup politiinut tunniussinnaavai.

Nakorsaanerup aalajangigaa pineqartoq pillugu allattugaatinut nalunaarneqassaaq.

Allagarsianik/nassiussarsianik, napparsimavimmi inigisamik, pigisanik timilu satsillugu mi-sissuinerit kiisalu pigisanik suujunnaarsitsineq, arsaarinnissuteqarneq aamma suujunnaarsitsi-neq il.il. pillugit naammagittaalliutaasinnaasut, napparsimavimmi pisortanut ingerlartinneqar-sinnaapput.

Imm. 4-mut

§ 32, imm. 4-mi Naalakkersuisut allagarsianik/poortugarsianik, pigisanik, timi satsillugu mi-sissuineri kiisalu pigisanik arsaarinnissuteqarnermi suujunnaarsitsinermilu maleruaqqusali-ornissamut piginnaatinneqarput. Iliuuseqarneq pillugu erseqqinnerusumik maleruaqqusalior-toqarnissaa taamatullu sulisut paasinarsakkanik maleruaqqusaliuunneqarnissaat pisariaqartin-neqalersinnaavoq.

Kapitali 8-mut

Pinnngitsaaliissuteqarnermik nalunaarsuineq aamma pinnngitsuugassaannngitsumik nalilersueqqinneq

§ 33-mut

Imm. 1

Siunnersuummi § 33, imm. 1 naapertorlugu pinnngitsaaliissummik iliuuseqarnerit pillugit aala-jangersakkat naapertorlugit, pinnngitsaaliissummik iliuuseqarnerit suulluunniit pillugit paasis-sutissat nalunaarsorneqassapput. Napparsimasut ataasiakkaat inatsisitigut illersugaanerit, soorlu assersuutigalugu naammagittaalliutinik suliaqartarneq eqqarsaatigalugu, nalunaarsui-nissaq pisariaqarpoq. Taamatuttaaq pinnngitsaaliissummik atuisarnerit pillugu inuiaqatigiinni kisitsisitigut paasissutissanik pigisaqarnissamut nalunaarsuineq iluaqutaavoq. Pinnngitsaaliis-summik iliuutsit qitiusumik nalunaarsorneqarnerit napparsimasut inatsisitigut illersugaane-rannut toqqammavissat pingaarnerit ilagaat, kinguneqarluartumillu nakkutilliinissamut pisari-aqarluni.

Imm. 2-mut

§ 33, imm. 2-mi Naalakkersuisut pisinnaatinneqarput ingerlatsinikkut pinnngitsaaliissummik a-tuinerit allattuiffiit, tamatumunnga ilanngullugit pinnngitsaaliissummik atuinermut immersu-

gassat qanoq isikkoqarnissaanut maleruaqqusat, taakkua qanoq immersorneqarnissaanut aammattaaq Nunatsinni Nakorsaannermut nalunaaruteqartarnermut sukumiinerusumik maleruaqqusaliornissaminnut.

§ 34-mut

Imm. 1-imut

Aalajangersakkami siunnersuutigineqartumi siunertaavoq nammineersinnaajunnaarsitaaneq allatullu pinngitsaaliissummik iliuuseqarnerup annikinnerpaaffimmitinnissaa tunngavigalugu, tak. § 5, imm. 2, ingasaassinnginnissap qulakkeerneqarnissaa. Tamatuma eqquutsitsineqarnissaa Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaannerup pisussaaffigaa.

Aalajangersakkap pinngitsaaliissummik atuinerit suulluunniit tamarmik immikkoortorta qarfiup pinngitsaaliissummik atuinerminut allattaavissuanut ilanngunneqartarnissaanut tunngasup, tamatumunnga ilutigitillugu nalunaarsuinissamut maleruaqqusat atuuttut eqqortinneqarnissaat pinngitsoortinngilaa, taamaattumik immikkoortorta qarfiup pinngitsaaliissummik atuinerminut allattaavissuanut ilanngunneqartut taamatutaaq napparsimasoq pillugu nalunaarsuinerup allattaavimmut ilanngunneqassapput.

Imm. 2-mut

Siunnersuummi § 34, imm. 2 maleruaqqusamik immikkut ilaqarpoq tassa pinngitsuugassaangitsumik nalilersueqqinnissamut tunngasumik, tassa nammineersinnaajunnaarsitaanissamut piunasaqaatit suli atuutsinneqarsinnaanerannut tunngatillugu nalilersueqqinnissaq. Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaannerup § 34, imm. 1, naapertorlugu namminneerluni aamma ataavartumik nakkutigissava kikkuluunniit piffissami pisariaqartinneqartumit sivisunerunngitsumik nammineersinnaajunnaarsinnganninnissaat. § 34, imm. 2-mi maleruaqqusamik kissaateqarnerup tunngaviusoq tassaavoq ingerlaavartumik nalilersueqqinnissap aaqqissuussaannerusumik ingerlanneqartarnerata ilaneqarnissaa.

Maleruaqqusaq naapertorlugu nakorsaannerup inummut nammineersinnaajunnaarsinneqarsimasumut tunngatillugu nammineerluni iliuuseqarnermigut nammineersinnaajunnaarsitsinerup suli ingerlatiinnarneqarnissaanut apeqquut nalilersoqqissavaa aalajangersakkami akuttussusissatut allanneqarsimasut tunngavigalugit. Taamaalillutik napparsimasut pinngitsaaliissummik unitsinneqarsimasut, pinngitsaaliissummik uninngatinneqartut imaluunniit pinngitsaaliissummik utertinneqarsimasut matumani pineqarput. Pinngitsuugassaangitsumik nalilersueqqinnerup tamatuma inernera pinngitsaaliissummik atuinermik allattaavissuarmut ilanngunneqassaaq aalajangiinerup tunngavilersuutit sukumiisut ilanngullugit.

Nakorsaanerup piunasaqaataasut atuukkunnaarsimasut paasiguniuk taava nammineersinnaajunnaarsitsineq ingerlaannartumik atorunnaarsinneqassaaq, tak. § 13, imm. 1.

Imm. 3-mut

Nakorsaanerup nammineersinnaajunnaarsitsinissamut piunasaqaataasut atuukkunnaarsimasut paasiguniuk, nammineersinnaajunnaarsitsineq ingerlaannartumik atorunnaarsissavaa, tak. § 13. Imatut pisoqarpat nakorsaanerup nammineersinnaajunnaarsitsineq suli pisariaqartuusoq taava § 34, imm. 3-p malitsigisaanik, napparsimasumut siunnersortaasoq aamma taamatuttaaq napparsimasoq, aalajangiineq pillugu ilisimatinneqassapput.

Napparsimasup nammineq sukkulluunniit angerlartinneqarnissamik qinnuteqarsinnaanera, suleriaatsimi pineqartumi akornuserneqanngilaq, tak. § 11 imm. 2.

Imm. 4-mut

Siunnersuummi § 34, imm. 4-mi ilaavoq immikkut aalajangersagaq sernissuiniarluni sukaterussinerup akuerineqarneranut nalilersueqqinnermut tunngasoq. Sernissuiniarluni sukaterussinerup pisariaqartitsinnermut naleqqiussilluni sivisunerusumik atorneqannginnissaa qulakkeer-niarlugu siunnersuutigineqarpoq, nalilersueqqinnermik nutarterisoqartarnissaa ullut pingasut, qulit, 20-t aamma 30-t siullermik akuersissuteqarnerup kingornatigut, tamatumalu kingornati-gut sapaatit akunneri sisamakkaarlugit. Piffissani taakkunani nakorsamit akuersissuteqartoqar-nera nutarterneqanngippat aalajangersaaneq atorunnaassaaq, taamaalilluni sernissuiniarluni sukaterussinerumik atuinissamut tunngavissaarutissaaq.

Imm. 5-imut

Aalajangersakkami ilaapput pinngitsaaliissummik sukaterussineq pillugu immikkut maleruaq-qusat. Pinngitsaaliissummik sukaterussineq ingerlatiinnarneqassappat taava nakorsamit nali-lersoqqinneqassaaq pinngitsaaliissummik sukaterussinerumit ingerlatiinnarneqarnissaanut a-peqqut, taamaattorli ikinnerpaamik ullup unnuallu ingerlanerani ataasiarluni. Taamaaliornik-kut pinngitsaaliissummik sukaterussisarnerup qanoq annertutigisumik atugaanera, nakorsamit nakkutigineqarnissaa sukannernerulersinneqarpoq.

Tamakku saniatigut immikkoortoq 2.9-mi oqaaseqaatit nalinginnaasut innersuussutigineqar-put.

Kapitali 9-mut

Napparsimasunik siunnersuisartut

§ 35-mut

Imm. 1-imut - 2-mut

Maannakkut akissarsiaqarlutik napparsimasunik siunnersuisartoqarnermik aqqissuussinerup ingerlatiinnarneqarnissaa siunnersuutigineqarpoq.

Siunnersuummi § 35 imm. 1 aamma 2 naapertorlugu automatiskiusumik aamma pinngitsoorneqarsinnaanngitsumik napparsimasunik siunnersuisartut ilanngutsinneqassapput nammineersinnaajunnaarsitsinermik atuinerup aallartinneqarnerani aamma aalajangersakkami pinngitsaaliissutinik allanik atuineri. Erseqqissaatigineqassaaq timi atorlugu pissaanermik atuneq aammattaaq ilaatinneqarmata pissaaneq atorlugu eqqissisaatitortitsineq. Tamatuma kingunerisaa-nik napparsimasunik siunnersuisartoq ilanngutsinneqassaaq pissaaneq atorlugu eqqissisaatitortitsinermi.

Pinngitsaaliissummik atuneq soorlu sukaterussineq il.il. napparsimavimmut pinngitsaaliissummik unitsitsinermut imaluunniit napparsimavimmi pinngitsaaliissummik uninngatitsinermut atatillugu arlalitsigut pisassaaq, tassani napparsimasumik siunnersuisoq ilanngutsinneqareersimassalluni. Napparsimasumik siunnersuisoq taanna soorunami pinngitsaaliissummik atuineranut allanut atatillugu atorneqarsinnaassaaq.

Imm. 3-mut

Siunnersuummi § 35, imm 3-mi napparsimasumik siunnersuisup suliassai ilaapput, taakkua nalinginnaasumik sapaatit akunneranni ataatsimi nalunaaquttap akunnerini sisamat arfinillilu akornanni sivilissuseqartussatut naatsorsorneqartut.

§ 35, imm. 3, nr, 3 naapertorlugu napparsimasumik siunnersuisoq maalaarutip Tarnimikkut Nappaatillit Maalaarutaannik Aalajangiisartunit suliarineqarnerani sapinngisamik najuuttassaaq. Aalajangersakkap oqaasertalernerisa Tarnimikkut Nappaatillit Maalaarutaannik Aalajangiisartut oqarasuaatikkut ataatsimiissinnaanerat akornutissaqartinneqanngilaq.

Tamakku saniatigut immikkoortoq 2.10-mi oqaaseqaatit nalinginnaasut innersuussutigineqarput.

§ 36-mut

Imm. 1-imut

Napparsimasunut siunnersortit qinnuteqaatit tunngavigalugit Nunatta Eqqartuussivianit atorfinitsinneqassapput. Napparsimasunut siunnersortit eqqartuussisumit nalunaarsorneqartut Dronning Ingridip Napparsimavissuani tarnikkut nappaatilinnut Immikkoortorta qarfiannut nassiunneqassapput.

Napparsimasunut siunnersortit pingaartumik peqqinnissaqarfimmi inunnillu isumaginnittoqarfinni sulisut akornanni sulisussarsiarineqarnissaat naatsorsuutigineqarpoq. Soqutiginnittulli al-lat soorlu assersuutigalugu palasit, ilinniartitsisut, tarnip pissusaanik ilisimasallit (psykolog) immikkut tulluartutut isigineqartariaqarput. Qinnuteqartut pisariaqartitanit amerlaneruppata, qinnuteqartunit piginnaasaqarnerusorisat eqqartuussisumit atorfinitsinneqassapput. Qinnuteqartup atorfimminut atatillugu napparsimasunut siunnersortaanissamut naapertuuttutut isigisarialimmik, immikkut paasisimasaqarnera misilittagaqarneraluunniit, naliliinermi ilaatinneqartariaqarput.

Napparsimasunut siunnersortinngortut suliamik ingerlatsinissaq pillugu pikkorissarneqassapput. Tarnimikkut napparsimasut pillugit inatsisip matuma imaanik paasisuttissinissaq inatsisillu piumasaqaatitai tunngavigalugit sullissinissaq, napparsimasunut siunnersortinik pikkorissaanermi pingaarnertut anguniagaassaaq. Pinngitsaaliisummik iliuuseqarnerit sivilisunerusumik ingerlanneqartut taamaallaat Nuummi pisinnaammata, napparsimasunut siunnersortinik arfineq pingasut qulillu akornanni amerlassusilinnik atorfinitsitsisoqarnissaa naatsorsuutigineqarpoq. Napparsimasunut siunnersortit Nuummi najugaqartuussapput Dronning Ingridip Napparsimavissuani tarnikkut nappaatilinnut Immikkoortortaqaqarfianni atorfeqartuussanatik.

Imm. 2-mut

§ 36, imm. 2 naapertorlugu siunnersuisussanngortitsineri, napparsimasunut siunnersortit nalunaarsuiffianni tullinnguuttoq, peqqissaasumit pigaartuusumit toqqarneqassaaq. Siunnersuisussanngortitsineq nalinginnaasumik oqarasuaatikkut nalunaarutigineqassaaq, kisianni tamatum kingornatigut peqqissaasumit pigaartuusumit nalunaarlugu uppersaaserneqassalluni. Nalunaarsuiffik naapertorlugu kikkut siunnersuisussanngortinneqarnerisa nalunaarsuiffimmilu killiffiup malinnaaviginissaat, peqqissaasup pigaartuusup pisussaaffigaa.

Pinngitsaaliisummik napparsimavimmut unitsitsineri pinngitsaaliisummik iliuuseqalernerimi siunnersuisussanngortitsisoqassaaq. Nammineq piumassutsiminnik napparsimavimmut unittunik pinngitsaaliisummik uninngatitsilernerimi Dronning Ingridip Napparsimavissuani tarnikkut nappaatilinnut Immikkoortortaqaqarfianni nakorsaanerup angerlarnissamik itigartitsinera tunngavigalugu siunnersuisussanngortitsisoqassaaq. Nammineq piumassusertik naapertorlugu napparsimavimmut unittunik pinngitsaaliisummik katsorsaanerimi imaluunniit napparsimavimmit angerlartinneqareernerup kingornatigut pinngitsaaliisummik malinnaavinnilernerimut atatillugu, tak. § 19, imm. 1 pinngitsaaliisummik katsorsaalerimut imaluunniit pinngitsaaliisummik nakorsaatitortitsilernerimut atatillugu siunnersuisussanngortitsisoqassaaq.

Imm. 3-mut

Nalunaarsuiffimmi nalunaarsukkat arlaannik allamik siunnersuisoqartinneqarnissamut napparsimasup qinnuteqaataa, sapinngisag naapertorlugu akuersissutigineqassaaq tak. § 36, imm.

3. Siunnersuisussanngorsaareersup nalunaarsuiffimmiittumik allamik taarserneqarnissaa kissaataappat, tunngavilersuutaasut naammaginarpata aatsaat akuerineqarsinnaasariaqarpoq.

Imm. 4-mut

§ 36, imm. 4-p malitsigisaanik nalunaarsuiffimmi nalunaarsimanngitsumik siunnersuisoqarnissaq napparsimasumit kissaataappat, tamanna ilaatigut akuerineqarsinnaassaaq. Taama siunnersuisussanngortitsineq, Nunatta Eqqartuussiviani eqqartuussisup aalajangiivigisassaraa. Taamatulli pisoqarnerani utaqqiisaagallartumik tullinnguuttumik siunnersuisussanngortitsineq, peqqissaasumit pigaartuusumit isumagineqartussaassaaq, tak. § 36, imm. 2.

Taamatut piumasaqaateqarnerup akuersissutaanissaanik naliliinermi piumasaqaatip naammaginartumik tunngavilersorneqarsimanera siunnersuisussanngortinniakkallu piukkunnassusaa pingaartinneqartariaqarput. Qanigisat ikinngutillu napparsimasup tatigisatuarisinnaavai. Taakununngalu napparsimasunut siunnersortaasartut ilisimasassaattut naatsorsuutigineqartut immikkut paasisimasaqarfiginissaat piumasaqaataasinnaangilaq. Taamaattorli taama suliaqarnerup piumasaqaatitaanik paasisimanninnissaq piumasaqaataasinnaassaaq. Eqqartuussisup siunnersuisussanngortitsineq pillugu aalajangigaa pisorta qarfirmut allamut ingerlateqqitassanngortinneqarsinnaangilaq.

Tamakku saniatigut immikkoortoq 2.10-mi oqaaseqaatit nalinginnaasut innersuussutigineqarput.

§ 37-mut

Imm. 1-imut

Napparsimasup siunnersuisuatalu attaveqatigiinnerannut tunngasoq aalajangersakkami male-ruagassiuunneqarpoq. Napparsimasoq peqqinnissaqarfiup immikkoortuani Nuup avataaniittumiippat, ataqatigiinneq telefonikkut imaluunniit nalunaarasuartaatit atorlugit attaveqatigiinnikkut ingerlanneqassaaq. Sapaatit akunnerata qaangiunnerani napparsimasoq sumiiffimmi Nuup avataaniittumiiginnarpat, aalajangersagaq naapertorlugu pulaarnissaq qarasaasiaq atorlugu attaveqatigiinnermik taarserneqassaaq.

Napparsimasut napparsimavimmit angerlarnermik kingorna pinngitsaaliissummik malittarineqarnerminnut atatillugu siunnersuisoqartinneqartut, siunnersuisuminnut attaveqarniarneranni qarasaasiaq atornerqarnerussaaq. Napparsimasut napparsimavimmit angerlartitaanerminni Nuup avataani najukkaminnut utertut, peqqinnissaqarfiullu immikkoortuani pinngitsaaliissummik nakorsaatitortinneqartut, matumani pineqarput. Peqqinnissaqarfimmi immikkoortoq pinngitsaaliissummik nakorsaatitortitsiviusoq, oqarasuaammik atukkiinnikkut imaluunniit qarasaasiakkut attaveqaat Skype aqqutigalugu attaveqartitsisinnaanermut ikiutissaaq.

Imm. 2-mut

Aalajangersagaq naapertorlugu napparsimasumut siunnersortaasoq akeqanngitsumik akornu-serneqarnanilu nammineq takkunnermigut, allakkatigut, oqarasuaatikkullu napparsimasumut attaveqarnissamut pisinnaatitaaffeqarpoq. Taamaasilluni napparsimasoq Dronning Ingridip Napparsimavissuaniippat, napparsimasunut siunnersortip, soorunami katsorsartinnerup ilaati-gut killiliisinnaanera apeqqutaatillugu, sukkulluunniit napparsimasoq pulaarsinnaavaa. Oqara-suaatikkut napparsimasumut attaveqartarnissaq napparsimasunut siunnersortip pisinnaatitaaf-figaattaq, taamaammallu allakkatigut taamaallaat attaveqartarnissaa innersuussutaasinnaan-ngilaq.

Aalajangersakkap oqaasertaliornera naapertorlugu napparsimasunut siunnersorti napparsima-sumik attaveqarnissamut pisinnaatitaaffeqarpoq. Pissutsit piviusut maleruaqqusallu patsisaal-lutik killiliisoqarsinnaanera, soorlu assersuutigalugu napparsimasup piffissap qanoq ilinerani siunnersortiminut oqarasuaatikkut attaveqarsinnaanera ajornaquteqartinneqanngilaq. Nappar-simasup immikkoortorta qarfimmi oqarasuaammik imaluunniit akiliilluni oqarasuaammik atui-nikkut siunnersortiminut attaveqarsinnaaneranut naammaginantumik periarfissinnissaa, im-mikkoortorta qarfimmi sulisut isumagissavaat.

§ 38-mut

Napparsimasumik siunnersortaasup suliassani isumagisinnaassagunigit napparsimasoq pillugu paasissutissanik naapertuuttunik, napparsimasumit namminermi pissarsiaannaanngitsunik pi-sariaqartitsivoq. Napparsimasulli nammineq kissaataasa nakorsanullu nipangiussisussaataita-nerit ilanngullugit eqqarsaatigineqarnissaat pingaaruteqarpoq.

Napparsimasunut siunnersorti soorlu assersuutigalugu pinngitsaaliissummik iliuseqarnernik nalunaarsuiffimmi paasissutissanik, napparsimasoq akerliugaluarpalluunniit, atuarsinnaas-saaq. Taamatut pisoqassappat allamik siunnersortitaartitsinikkut napparsimasup allamik isu-mataartinneqarsinnaanera pillugu, Dronning Ingridip Napparsimavissuani tarnikkut nappaati-linnut Immikkoortorta qarfianni nakorsaaneq paasiniaasariaqartassaaq, taamaassappallu tama-tuminnga suliassanngortitsisinnaassalluni.

Paasissutissanut isertuussanut pissarsiarisartakkanut pissusissamisoortumik napparsimasunut siunnersortit Pisortat ingerlatsineranni suliassat sularineqartarnerat pillugu Inatsisartut inatsi-saat nr. 8, 13. juni 1994-imeersumi § 27-imi aamma Kalaallit Nunaanni pinerluttulerinermi i-natsimmi nr. 306, 30. april 2008-meersumi § 50-imi maleruaqqusat naapertorlugit nipangius-sisussaataitaapput.

Naak napparsimasoq nalinginnaasumik nammineq pillugu nalunaarsuiffimmi allattukkanik paasitinneqarnissaminut pisinnaatitaaffeqarluartoq, taava napparsimasumik siunnersortaasup

nalunaarsuiffimmi allattukkanik paasitinneqarnissaanut napparsimasup akuersissuteqarnissaa piumasqaataavoq.

§ 39-mut

Siunnersuummi § 39 naapertorlugu pinngitsaaliissummik iliuuseqarfigineqarneq siunnersuisoqartitsisoq taamaatinneqarpat, napparsimasumut siunnersuisutut atuunneq unitsinneqassaaq. Napparsimasulli pinngitsaaliissummik iliuuseqarfigineqarsimanini naammagittaalliutiginiarneraa siunnersortip paasiniassavaa, taamaassappallu tamatuminnga ikiorlugu. Napparsimasumut siunnersortaasup naammagittaalliutit suliarineqarlutik aallartereersut naammassineqarnissaannut ikiuutissaaq.

§ 40-mut

Aalajangersakkami siunnersuutigineqartumi Naalakkersuisut pisinnaatitaapput ingerlatsinikut napparsimasunut siunnersortinik atorfinitsitsinermi aamma siunnersuisussanngortitsinermi, taakku suliassat aamma pisinnaatitaaffii sukumiinerusut aammattaaq akissarsiai pillugit sukumiinerusumik maleruaqqusaliornissaminnut

Kapitali 10-mut

Naammagittaalliuteqarnissamut ilitsersuineq

§ 41-mut

Imm. 1-imut

Pisortat ingerlatsineranni suliassat suliarineqartarnerat pillugu inatsimmi § 25-mi naammagittaalliornissamut ilitsersuineq pillugu aalajangersagaq, taamaallaat aalajangiinernut allaganngorlugit nalunaarutigineqartunut atuuppoq. Taamaattorli pisortat ingerlatsineranni suliassat suliarineqartarnerat pillugu inatsimmi § 7 ilitsersuinissamut pisussaaffik nalinginnaasoq, pisariaqarpat aalajangiineq oqaasiinnakkut nalunaarutigineqaraluartoq, aamma maalaaruteqarnermi ilitsersuinissamik nassataqarpoq. Pisortat ingerlatsineranni suliassat suliarineqartarnerat pillugu inatsimmi § 7a naapertorlugu, aalajangiinerup kalaallisut imaluunniit danskisut pissarsiarinissaa napparsimasup pisinnaatitaaffigaa.

§ 41-mi aalajangersagaq erseqqissoq siunnersuutigineqarpoq, taanna naapertorlugu pinngitsaaliissummik sumilluunniit atuisoqartillugu, taava napparsimasooq aalajangiineq pillugu allakkatigut naammagittaalliuteqarnissamut periarfissaqarneq pillugu ilitsersorneqassaaq. Taamaalluni napparsimasooq aalajangiinerup Tarnimikkut Nappaatillit Maalaarutaannik Aalajangiisartunut allaganngorlugu naammagittaalliutigisinnaaneranut ilitsersorneqassaaq, tak. siun-

nersuummi § 47. Tamatuma saniatigut napparsimasoq ilitserorneqassaaq naammagittaalliutip kinguartitsisoqarnissaanut sunniuteqarsinnaanera pillugu.

Aalajangersakkami aalajangerneqanngilaq naammagittaalliuteqarsinnaanermut qaqugu ilitser-suisoqassanersoq. Taamaattorli naammagittaalliuteqarsinnaanermut tamatigut ilitseruisoqar-tassaaq pinngitsaaliissummik iliuseqarnissamut aalajangernerup piviusunngortinnissaa sioq-qullugu, tassa tamatumani kinguartitsisoqarnissaanut sunniuteqarnissaaq periarfissaappat, tak. § 41, imm. 3. Tamannalu atuuppoq napparsimavimmit angerlartinneqareernerup kingornatigut pinngitsaaliissummik malinnaaffiginninneq pillugu naammagittaalliutit, § 19 naapertorlugu.

Imm. 2-3-mut

Naammagittaalliuteqarnissamut periarfissamik atuineq kinguartitsisoqarsinnaaneranut nali-nginnaasumik sunniuteqanngilaq, tak. siunnersuummi § 41, imm. 2. Taamaattorli pinngitsaa-liissummik katsorsaasoqartillugu immikkut maleruqaqusaq atuuppoq, tak. inatsisissatut siun-nersuummi § 41, imm. 3. Tassani naammagittaalliorneq kinguartitsinissamut nalinginnaasu-mik sunniuteqarpoq, imaanngippat katsorsaanerup ingerlanneqarnissaata ingerlaannartumik aallartinneqarnissaa pisariaqarluni napparsimasup inuunerata imaluunniit peqqissusiata anner-tuumik navianartorsiortinnissaa pinngitsoorniarlugu, imaluunniit napparsimasoq allanik ti-maatigut imaluunniit peqqissusiatigut annertuumik navianartorsiortitsisinnaanera pinngitsoor-niarlugu. Taamaalilluni piumasqaataavoq allatut iliorsinnaajunnaarnikkut pinngitsaaliissum-mik nakorsaasoqarnissaata ingerlattariaqalerneranut, tassa napparsimasup imaluunniit nappar-simasumut siunnersuisup pinngitsaaliissummik nakorsarneqarneq pillugu naammagittaallium-mik saqqummiussisimappat. Taamaattorli navianartorsiornermut ersiut inuunermik navianar-torsiortitsinerumt killeqaannanngilaq, tassami peqqissutsip ajornerulernissaata nalorninartorsi-ortinneqarsinnaanera aamma taaneqarmat taamaattumillu ilaatinneqarluni navianartorsiortitsi-nerup periataarsinnaanera nalilerneqarpat.

Tarnimikkut Nappaatillit Maalaarutaannik Aalajangiisartut aalajangiinissaat utaqqinagu pin-ngitsaaliissummik katsorsaanissamut periarfissaaq taanna aammattaaq atuuppoq, naammagit-taalliutip saqqummiunneqarnermini kinguartitsinissamut sunniuteqartutut nalilerneqarpat, ki-siannili napparsimasup qanoq innera ajornerulersimalluni aalajangiisartut aalajangiinerata ti-guneqarnera sioqqullugu.

Pinngitsaaliissummik malittarineqarneq pillugu naammagittaalliuteqarneq § 19 naapertorlugu taamatutaaq kinguartitsinissamut sunniuteqassaaq.

§ 42-mut

Imm. 1-imut 2-mut

Aalajangersarneqarpoq sapinngisamik naammagittaalliuuteqarnissamut ilitersuisoqassasoq pinngitsaaliisummik iliuuseqarnissaq pillugu napparsimasup ilisimatinneqarneranut atatillugu. Taamaattorli pinngitsaaliisummik nakorsaasoqarnerani naammagittaalliuuteqarnissamut ilitersuisoqassaaq pinngitsaaliisummik nakorsaasoqarniarnerata aallartinnissaa sioqqullugu. Tamatumunnga pissutaavoq pinngitsaaliisummik nakorsaasoqarnera pillugu naammagittaalliorneq kinguartitsisoqarnissaanut sunniuteqarnera aallaavigineqarmat, tak. § 41, imm. 3.

§ 43-mut

Imm. 1-imut 2-mut

Aalajangersakkami pinngitsaaliissummik iliuseqarnerit taaneqartut pillugit napparsimasoq Tarnimikkut Nappaatillit Maalaarutaannik Aalajangiisartunut iliuseqarneq pillugu naammagittaalliornissaminut periarfissaqartoq. Tamatuma saniatigut napparsimasoq piumasaqarnini naapertorlugu Tarnimikkut Nappaatillit Maalaarutaannik Aalajangiisartunut naammagittaalliorneq pillugu periuseq pillugu ilitsersorneqassaaq, aammattaaq napparsimasup aamma napparsimasumut siunnersortip aalajangiisartunut suliamik saqqummiussinissamut pisinnaatitaaffiat pillugu. Tamatuma saniatigut napparsimasoq piumasaqarnini naapertorlugu aalajangiisartut piffissaq killiussaaf pillugu ilitsersorneqassaaq.

Aalajangersakkami qulakkeerneqarpoq napparsimasut tamarmik naammagittaalliutitut suliasat tamarmik pillugit qanoq periuseqartarnerup ataatsimoortumik isiginnissinnaanerisa piumasaqaataat, tassani apeqqutaatinnagit napparsimasut ataasiakkaat isumalluutaasa qanoq ittuunerat.

§ 44-mut

Aalajangersakkami aalajangersarneqarpoq naammagittaalliteqarsinnaanermut ilitsersuinerimi aallaaviussasoq tamatuma oqaasiinnartigut pinissaa. Taamatutaaq naammagittaalliornissamut ilitsersuut allaganngorlugu tunniunneqassaaq, pineqartup tamanna piumappagu.

§ 45-mut

Aalajangersakkami Naalackersuisut piginnaatinneqarput ingerlatsinikkut sukumiinerusumik maleruaqqusaliornissaminut qaqugu aamma kimit ilisimatitsisoqarnissaanut tunngatillugu, aammattaaq pinngitsaaliissummik iliuseqartoqarneranut atatillugu naammagittaalliteqarnissamut ilitsersuinerimut atatillugu.

*Kapitali 11**Naammagittaalliornissamut periarfissaq aamma
eqqartuussivikkut ingerlatitsisinnaaneq**§ 46-mut***Imm. 1-imut - 2-mut**

Kalaallit Nunanni napparsimasut naammagittaalliutaannik aalajangiisartunik eqqartuussissuserisumik, Nunatsinni Nakorsaaneermik aamma napparsimasut peqatigiiffiannit tarnimikkut napparsimasunut sinniisumik ilaasortalimmik pilersitsisoqarnissaa, aalajangersakkami siunnersuutigineqarpoq. Naalakkersuisut naammagittaalliuuteqarnermut aalajangiisartut pilersisavaat.

Siulittaasup (eqqartuussissuserisup) napparsimasup pisinnaatitaaffiisa eqquutsinneqarnissaat qulakkiissavaa, kisianni nalinginnaasumik paasinninneq tunngavigalugu napparsimasumut eqqartuussissuserisuunngilaq. Nunatsinni Nakorsaaneerup ilinniagaqassuseq tunngavigalugu peq-qinnissakkut sullissisut sinniisuuffigissavai. Tarnimikkut napparsimasunut sinniisooq soorlu assersuutigalugu Tarnimikkut eqqarsartaatsimikkullu nappaateqartut qanigisaasa peqatigiiffiannit Sugisaq toqqarneqarsinnaavoq.

Imm. 3-4-mut

Ilaasortat aamma sinniisussat ukiuni sisamani atasussatut toqqarneqassapput. Taamaalillutik ilaasortat aalajangiisartut sulineranni misilittagaqalersinnaapput. Akerlianik periarfissaqarpoq toqqaasoqarnerani tulliuttumi naaggaarnissaminut periarfissaqarpoq, tamanna ilaasortap kissaatigiguniuk. Ilaasortat namminneq aamma Naalakkersuisup tamanna kissaatigippagu.

Imm. 5-imut

Napparsimasut naammagittaalliutaannit aalajangiisartut Naalakkersuinut attuumassuteqannginnerat erseqqissarniarlugu oqaatigineqarpoq, suliat ataasiakkaat oqaluserineqarneranni aamma aalajangiiffiqineqarneranni aalajangiisartut ilitersuinernut attuumassuteqanngitsut.

Imm. 6-imut

§ 46, imm. 6-imi ersersinneqarpoq Nunatsinni Nakorsaaneqarfiup Tarnimikkut Nappaatillit Maalaarutaannik Aalajangiisartut allatseqarnikkut isumagisassarai. Nunatsinni Nakorsaaneqarfik, Sundhedsvæsenets Disciplinærnævnet i Danmark, timikkut nappaatit pillugit naammagittaalliutinut tunngatillugu, allatseqarfioreerpoq, taamaattumik pissusissamisoorpoq pinngitsaaliissummik atuinermut naammagittaalliutit pillugu allatseqarfik aamma tassaniippat.

Imm. 7-imut

Peqqissutsimut Naalakkersuisoqarfiup aalajangiisartut ingerlatsinerannut aningaasartuutit, tamatumunnga ilanngullugit aalajangiisartuni ilaasortat ajunngitsorsiaat, akilertassavai.

Tamakku saniatigut immikkoortoq 2.12-mi oqaaseqaatit nalinginnaasut innersuussutigineqarput.

§ 47-mut

Imm. 1-imut

Aalajangersakkami siunnersuutigineqarpoq napparsimavinni oqartussaasut pinngitsaaliissummik atuinernut naammagittaalliutit tamaasa Tarnimikkut Nappaatillit Maalaarutaannik Aalajangiisartunut ingerlatitsisarnissaat. Naammagittaalliut napparsimasumit namminermit imaluunniit napparsimasumik siunnersuisartumit pisinnaapput.

Napparsimavinni oqartussaasut tassaapput napparsimavissuarmi/napparsimavimmi imaluunniit peqqissaavimmi napparsimasup uninngaffigisimasaani imaluunniit uninngaffigisaani oqartussaasut. Peqqinnissaqarfiup ingerlatsiviata pisussaaffigaa naammagittaalliutip Tarnimikkut Nappaatillit Maalaarutaannik Aalajangiisartunut saqqummiunneqarnissaa, taassuma peqqinnissaqarfimmi sulisunut tunniunneqarata imaluunniit saqqummiunneqarnerata kinguninguatigut. Peqqinnissaqarfiup ingerlatsiviata, aalajangiisartut allattaa paasisutissat piumasai tamaasa, tunniutissavai. Periaaseq naleqquttoq tassaavoq paasisutissat katersorneqassapput Peqqissutsimut Pitsaaliuinernullu Aqutsisoqarfimmut nassiunneqarlutik, tassanngaanniit Tarnimikkut Nappaatillit Maalaarutaannik Aalajangiisartunut ingerlateqqinneqarlutik.

Imm. 2-mut

§ 47 imm. 2-mi naammagittaalliornissamut kingusinnerpaamik piffissarititaasoq pisup naammagittaalliutigisap pineraniit qaammatinut arfinilinnut killileqarpoq. Kingusinnerpaamik piffissaliussaq taanna aalajangiunneqarpoq taamaangippat napparsimasup aamma peqqinnissaqarfimmi sulisut, pinngitsaaliissummik atuinermut suna tunngaviusimanersoq pillugu paasisutissanik tunniussisinnaanerat ajornarsinnaammat. Naak pinngitsaaliissut pillugu nalunaarsuiffimmut aamma peqqissutsimut paasisutissanut allatuiffimmut allattuisoqaraluartoq, pisoq pillugu immikkuualuttui tamaasa ilanngullugit allanneqartanngillat. Taamatuttaaq kingusinnerpaamik piffissaliussaq aalajangerneqarneranut tunngaviuvoq napparsimasup naammagittaalliuteqarnermut ingerlanerani napparsimasumik siunnersuisumik pisariaqartumik tapersersorneqarnissaa eqqarsaatigalugu, taassuma isumagissavaa naammagittaalliutip sapinngisamik pilertortumik suliarineqarnissaa.

§ 48-mut

Imm. 1-imut

§ 48-mi aalajangersagaq Tarnimikkut Nappaatillit Maalaarutaannik Aalajangiisartut suliassaminnik ingerlatsinerannut maleruqqusanik ilaqarpoq. Peqqissutsimut Pitsaaliuinemullu Aqutsisoqarfiup suliassaq Tarnimikkut Nappaatillit Maalaarutaannik Aalajangiisartunut saqqummiutissavaa. Tamannali imatut paasineqassanngilaq napparsimasoq imaluunniit napparsimasunik siunnersuisartooq toqqaannartumik Aqutsisoqarfimmut naammagittaalliummik saqqummiussissasoq. Napparsimasup imaluunniit napparsimasunik siunnersuisartup naammagittaalliut immikkoortooq nakorsaannut, peqqissaasuinut aamma peqqissutsimik sullissisunut allanut napparsimasunik katsorsaanermmut peqataasunut tunniussinnaavaat. Immikkoortootami nakorsaasut, peqqissaasuusut imaluunniit peqqissutsimik sullissisut allat tamatuma kingornatigut pisussaaffeqarput sapinngisamik piaartumik tamanna Peqqissutsimut Pitsaaliuinemullu Aqutsisoqarfimmut ingerlateqqissallugu. Soorunami aammattaaq napparsimasoq imaluunniit napparsimasunik siunnersuisooq periarfissaqarput soorlu assersuutigalugu pinngitsaaliissummik iliuseqarfigineqarnermmut naammagittaalliut Tarnimikkut Nappaatillit Maalaarutaannik Aalajangiisartunut saqqummiussinnaallugu.

Peqqissutsimut Pitsaaliuinemullu Aqutsisoqarfiup aalajangiisartut oqartussaassuseqarfiannut tunngasumik naammagittaalliortoqarsimasoq paasiguniuk, taava suliassamut tunngassut taakkununga ilanngullugu naammagittaalliutigineqartup allannera, kiisalu Dronning Ingridip Napparsimavissuani tarnikkut nappaatilinnut Immikkoortooqarfianni nakorsaanerup aamma/imaluunniit nunap immikkoortuani pineqartumi nakorsap uppersaasnera Tarnimikkut Nappaatillit Maalaarutaannik Aalajangiisartunut nassiuutissavai. Aalajangiisartut paasissutissanik amerlanerusunik kissaateqarunik tamatumunnga aalajangiisartut namminneq iliuseqasapput. Soorlu assersuutigalugu tassaasinnaapput nakorsamit paasissutissanut ilassutissat imaluunniit immikkoortooqarfiup peqqissutsimik sullissisuunit oqaaseqaatit.

Suliamut tunngatillugu illuatungeriit tassaapput sumiiffimmi peqqinnissaqarfimmi oqartussasut aamma napparsimasoq. Naammagittaalliuuteqarnermi pinngitsaaliissummik atuineq kisimi pineqarnani kisianni aammattaaq peqqissutsimik sullissut peqataasimasut ilanngunneqarlutik, taava taakku aammattaaq naammagittaalliuuteqarnermi suliassamut illuatungiuussapput.

Imm. 2-mut

Napparsimasup aamma napparsimasunut siunnersuisut oqaasiinnakkut imaluunniit nalunaarsuartaatikkut atassuteqarneq atorlugu suliaq aalajangiisartunut saqqummiussinnaavaat, tak. § 48, imm. 2. Napparsimasoq nammineq ornigulluni peqataaniaruni angerlartinneqareersimaguni, Tarnimikkut Nappaatillit Maalaarutaannik Aalajangiisartunut Nuummum angalanissani nammineq aaqquissuutissavaa aningaasartuutigalugulu. Napparsimasup nalunaarsuartaatikkut atassuteqarneq atorlugu attaveqarnissani kissaatigippagu, sumiiffimmi peqqinnissaqarfiup immikkoortootaa Skype assigisaaluunniit atorlugu attaveqarnissamut ikiuussinnaavoq. Napparsimasoq Dronning Ingridip Napparsimavissuani suli uninngappat, taava naatsorsuutigineqasaaq Aalajangiisartut napparsimavissuarmi ataatsimiinnissaat. Napparsimasoq suliap Aalaja-

ngiisartuni suliassanngortinneqarnerata nalaani peqqinnissaqarfiup immikkoortuisa arlaanniikkuni, sumiiffimmi tassani nalunaarasuartaatikkut attaveqaataasut atorsinnaavai.

Immikkut ittunik pisoqartillugu napparsimasoq suliassap Aalajangiisartuni oqaluuserineqarnerani tamakkiisumik ilaannakortumilluunniit peeqataatinneqanngitsoorsinnaavoq, tak. § 48, imm. 2, imm. aappaat. Taamaattoqarpat napparsimasup peqataatinneqannginnerata taamaalliluni tunngavilersorluagaanissaa piunasaqaataavoq.

Peqqinnissaqarfimmi oqartussaasunut sinniisuutitaasup, immikkoortortaqarfimmi nakorsaa-neq, aammattaaq peqqinnissakkut sullissisut allat pineqarsinnaapput taakku suliamikkut naammagittaalliornermut attuumassuteqarunik napparsimasutulli, Tarnimikkut Nappaatillit Maalaarutaannik Aalajangiisartunit naammagittaalliutip oqaluuserineqarnerani najuunnissamut aamma peqataanissamut pisinnaatitaaffeqarput.

Illuatungeriit najuunnermikkut aamma suliamut tunngatillugu pisut saqqummiunneqarnerini peqataanissamut pisinnaatitaaffeqarnerisa kinguneraa, taakku nassuiaatinik pissutsit pillugit, Tarnimikkut Nappaatillit Maalaarutaannik Aalajangiisartut nalilersugaannut tunngasunik saqqummiussinnaapput. Aalajangiisartut taamatuttooq peqqissutsimik sullissisut attuumassuteqartut allat qinnuigisinnaavaat Aalajangiisartunut nassuiaassummik saqqummiusseqqullugit. Nassuiaassutit sukkulluunniit inatsisit tunngavigalugit eqqortumik oqaluttussaataitanermik tunngaveqartinneqanngillat.

Tarnimikkut Nappaatillit Maalaarutaannik Aalajangiisartut ataatsimiinneri tamanut ammasuussanngillat aamma Aalajangiisartuni ilaasortat nipangiussisussaataaapput.

Imm. 3-mut

Aalajangersakkap nassatarisaanik Tarnimikkut Nappaatillit Maalaarutaannik Aalajangiisartut pinngitsaaliissummik iliuseqarfigineqarneq aamma napparsimavimmit angerlareernerup kingornatigut pinngitsaaliissummik malinnaaffiginninnermut tunngasunut naammagittaalliutit suliassanngortinneqarsimasunik, kinguartitsinissamut sunniuteqartunik aalajangiisartussaapput, tak. § 41, imm. 3, naammagittaalliutip tiguneqarnerata kingornatigut ullut arfineq marluk qaangiutsinnagit aalajangiisoqassaaq. Suliassanut allanut tunngatillugu Aalajangiisartut sapinngisamik pilertortumik aalajangiissapput. Tamatuma kingunerisaanik nalinginnaasumik piviusumik naammagittaalliutip tiguneqarneranit ullut 14-it nallertinnagit. Ullunik 14-inik killiliineq qaqutigunnaq eqquutsinneqanngikkaluarpat Aalajangiisartut napparsimasoq aamma napparsimasumik siunnersuisartoq tamatumunnga patsisaasoq pillugu ilisimatissavaat, kiisalu aalajangiinerup qaqugu pisinnaaneranut tunngatillugu.

Aalajangiisartut aalajangigaat pinngitsaaliisummik iliuseqarsimanerup akuerineqarneranit imaluunniit iliuseqarnerup eqqunngitsuusimaneranik, soorlu assersuutigalugu inatsimmi taamatut iliortoqarnissaanut piunasaqaataasut naammassineqarsimangippata, inerneqarsinnaapput. Naammagittaallimmi iliuserineqarsimasoq kisimi pineqarsimangippat kisianni aammattaaq peqqissutsimut sullissisut, taamatut pinngitsaaliisummik iliuseqarsimanermut peqataasimasut pineqarlutik taava tamatumunnga ilutigitillugu Aalajangiisartut isummerfigisavaat, pineqartut/peqartup isornartorsiorneqarnissaanut tamanna tunngavissaqarneris.

Immikkut pinngitsaaliisummik iliuseqarnek § 14 naapertorlugu aamma angerlartinneqareernerup kingornatigut pinngitsaaliisummik malinnaaffiginninnermut § 19 naapertorlugu oqaatigineqassaaq, Aalajangiisartut piginnaatitaanerit iliuseqarnermut piunasaqaataasut ilumut eqquutsinneqarsimanerisa misissuinnermut killilerneqanngilaq, tak. § 14, imm. 1, aamma § 19, imm. 1, kiisalu pinngitsaaliisummik katsorsaanerit tunngatillugu pinngitsaaliisummik atornerqartumik naliliinnermut, tak. § 14, imm. 2, naggatit aappaat. Aalajangiisartut taamatuttaaq aalajangersaasinnaatitaapput katsorsaanermit nakorsap atugarisimasaanut, tamatumunnga ilanngullugit nakorsaat toqqarneqartoq aamma qanoq annertutigisumik atuisimanermut tunngatillugu, tak. § 14, imm. 4, aamma § 19, imm. 4, aamma § 5.

Tamakku saniatigut siunnersuummi § 41, imm. 3 malugeqquneqarpoq, taanna naapertorlugu pinngitsaaliisummik katsorsaanerup aallartinnera sioqqullugu naammagittaalliut saqqummiunneqarpat, tamatuma kingunerissavaa iliuserisap aalajangiisartut aalajangiinissaata tungaanut kinguartinneqarnera, imaanngippat nakorsarneqarnissap ingerlaannartumik aallartinneqarnissaa pisariaqarluni ilaatigut napparsimasup inuunerata imaluunniit peqqissusiata malunnaateqarluartumik navianartorsiorinissaa pinngitsoorniarlugu.

Aalajangiisartut pisinnaatitaaffiisa avataaniipput naammagittaalliutit nakorsartinnermut tunngasut, tassani pinngitsaaliisummik iliuseqarnerit atornerqarsimangippata. Naammagittaalliutit taamaattut Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersumi maleruaqqusat naapertorlugit suliarineqartarput.

Imm. 4-mut

§ 48, imm. 4-mi Naalakkersuisut pisinnaatinneqarput Tarnimikkut Nappaatillit Maalaarutaannik Aalajangiisartut suleriaasissaannik aalajangersaanissamut. Aalajangiisartuni sulianik ingerlatsineq tassani nassuiaaserneqassaaq.

§ 49-mut

Imm. 1-imut - 4-mut

Tarnimikkut Nappaatillit Maalaarutaannik Aalajangiisartut napparsimasup imaluunniit nap-

parsimasumik siunnersuisup qinnuteqarneratigut aalajangiinerit taaneqartut Kalaallit Nunaanni Eqqartuussivimmut suliassanngortissavai, Kalaallit Nunaanni pinerluttulerinermi inatsimmi kapitali 28-mi maleruaqqusat naapertorlugit.

Pinerluttulerinermi inatsimmi kapitali 28 immikkut pilertortumik aamma napparsimasumut pisariitsumik eqqartuussivimmi misiliinissamut periarfissiivoq. Aalajangiineq nammineersinnaajunnaarsinneqarnermut tunngasoq iliuuserisaq imatut annertutigaaq inatsisitigut isumannaatsuutitsinissaq pissutigalugu eqqartuussivimmi misilittariaqarluni. Eqqartuussivikkut misiliineq immikkut ittuummat suliassaq eqqartuussivimmit sapinngisamik piaarnerpaamik sularineqassaaq.

Siunnersuummi imm. 2 naapertorlugu suliap Kalaallit Nunaanni Eqqartuussivimmut tunniunneqarnissaanut Tarnimikkut Nappaatillit Maalaarutaannik Aalajangiisartut aalajangereernerisa kingornatigut sapaatit akunnerisa sisamaanissaat aallaaviuvoq. Piffissarititaasoq suliap sapinngisamik pilertortumik eqqartuussivimmut suliassanngortinneqarnissaanut tapertassaaq. Taamaalluni napparsimasup aammattaq pisimasoq eqqaamalluarsinnaavaa suliap qanoq ingerlasimanerata qulaajarneqarneranut atatillugu.

Tamatumunnga ilutigitillugu pisariaqarpoq immikkut ittumik pissutissaqartillugu kingusinnerpaamik piffissarititaasup saneqqunneqarsinnaanera, taamaaliornikkut napparsimasoq pinngitsaaliissummik iliuuseqarsimanerup inatsimmik unioqquutitsinertaqarsimanninneranik misilinnissaminut periarfissaajarneqassanngimmat, naak naammagittaalliut sapaatit akunnerisa sisamat qaangiutereersut tunniunneqaraluartoq. Taamaattumik immikkut tunngavissaqarpat Kalaallit Nunaanni Eqqartuussivimmi eqqartuussisup qaqutiguugaluartoq akuersissutigisinnavaa Tarnimikkut Nappaatillit Maalaarutaannik Aalajangiisartut aalajangeereernerisa kingornatigut qaammatit arfinillit angullugit naammagittaalliutip tunniunneqarsinnaanera. Naammagittaalliut Tarnimikkut Nappaatillit Maalaarutaannik Aalajangiisartut aalajangeereernerisa kingornatigut qaammatit arfinillit qaangiutereersut tunniunneqarpat naammagittaalliut sularineqarsinnaassanngilaq.

§ 49, imm. 3-mi allassimavoq Napparsimasut Maalaarutaannik Aalajangiisartut napparsimasup nammineersinnaatinneqarnissaa akuerippassuk, angerlartinneqarnissamut apeqqut aalajangiisartut aalajangiinerisa kingornatigut qaammatit marluk qaangiutereerpata, aatsaat tamanna Tarnimikkut Nappaatillit Maalaarutaannik Aalajangiisartunut nutaamik oqaluusereqqullugu qinnuteqaatigineqarsinnaavoq. Apeqqutip nammineersinnaajunnaarsinneqarnermut tunngasup unioqquutitsinerunnginnera eqqartuussivimmut ingerlatinneqarsimappat, tak. imm. 1, piffissaliussaq taaneqartoq eqqartuussiviup aalajangiineranit aallartittutut isigineqassaaq.

Unioqquutitsisumik nammineersinnaajunnaarsinneqarnermut oqartussaasunit taarsiiffigineqarnissamut piumasaaqat tunngavigalugu eqqartuussivimmi sulariarnermi aalajangiiffigineqas-

saaq, nammineersinnaajunnaarsinneqarnermut unioqqutitsinerusimannginnera pillugu, tak. pinnerluttulerinermi inatsimmi § 292-imi maleruaqqusat.

Tamakku saniatigut naammagittaalliornissamut periarfissanut il.il. tunngatillugu immikkoortoq 2.12-mi oqaaseqaatit nalinginnaasut innersuussutigineqarput.

Kapitali 12
Atuutsitsilernermut, atorunnaarsitsinermut aamma
ikaarsaariarnermut aalajangersakkat

50-imut

Imm. 1-imut

§ 50-imi aalajangersakkami qaammatisiutit ulluat atuutilersitsiffiusoq allanneqarpoq kiisalu ikaarsaariarnermi aalajangersakkatut siunnersuutigineqarput, maleruaqqusat nutaat tamarmik aalajangiinernut atuutsinneqassasut, tassa qaammatisiutit ulluata atuutilerfiusup kingornatigut, tamatuma akerlianik aalajangiinerit pisoqaanerusut Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq naapertorlugu nalilersorneqassapput.

Qaammatisiutit ulluat atuutilerfissatut 1. juli 2019 aalajangiunneqarpoq.

Imm. 2-mut

§ 50, imm. 2 naapertorlugu inatsisip atuutilerneratigut Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq atorunnaarsinneqarpoq.

Imm. 3-mut

Nalunaarutit aamma maleruaqqusat allat Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq, kiisalu Inatsisartut Inatsisaat nr. 12, 3. juni 2015-imeersumi allanngortinneqarsimasoq tunngavigalugit aalajangersarneqarsimasut aamma atuutsinneqarsimasut, atorunnaarsinneqarnissamik tungaannut atuutiinnassapput.